



BIBL. NAZ.
VITT. EMANUELE III

L

A

6

NAPOLI

LEGATORIA

Niola Salvatore

Via' Giovanni Paladino, 19,

NAPOLI

I A. 6

B.

D.

C.

EP.

AL.

Ac.

D.

J.

EX.

A.

EX.

A.

EX.

A.

B. ALBERTI
DOCTORIS MAGNI
ex Ordine Prædicatorum
EPISCOPI RATISPONENSIS
D E

ADHÆRENDO DEO
LIBELLVS.

Accedit eiusdem ALBERTI Vita,
DEO ADHÆRENTIS exemplar.



ANTVERPIAE,
EX OFFICINA PLANTINIANA;
Apud Balthasarem Moretum, & Viduam
Ioannis Moreti, & Io. Meursium.

4 M. DC. XXI.





Reuerendo Domino
IO. ANTONIO
G A B V T I O
CONGREGATIONIS
CLERICORVM REGVLARIVM
S. P A V L I
P R E S B Y T E R O
Balthasar Moretus
S. P.



EATI ALBERTI,
Doct̃oris nomine
& re MAGNI, De
adhærendo Deo
Libellum, aui mei Plantini
(cuius animæ Deus æternũm
A 2 bene-

benefaciat) typis olim editum,
quia non semel, R^{de} DOMINE,
à me postulasti, nunc recusum
ad te mitto. Libellum mo-
le exiguum, argumento exi-
mium: & hoc vnico abs te
æstimari & probari scio. nec
proinde, quod præfando alij.
solent, gratum acceptumque
vti habeas, rogo: an verò gra-
tiores quàm antehac haberi
oporteat, quòd antiquæ edi-
tionis ope, mea que operâ, ali-
quantò iam melior prodeat,
beneuolentiæ tuæ dispicien-
dum committo. Si aliquando
manuscriptum bonæ fidei co-
dicem nancisci contingat; eius-
modi spongiâ, si qui forsitan
superfint, næui eluentur.

Paradisus Animæ eiusdem

Aucto-

Auctoris comitari Libellum
hunc solet : sed quoniam à
P. Sommalio Societatis IESV
Sacerdote nuper recensitus, ab-
undè etiā nunc seorsim exstat,
vniones istos modò haud con-
iungo. Vt tamen illustrior hic
appareat, in animumque vtentis
impleat, B. ALBERTI Vi-
tam, à præclaro olim Sacri Pa-
trum Prædicatorum Ordinis
Théologo conscriptam, ve-
rum Deo adhærentis exemplar
subiungo.

Tuas hîc laudes minimè
attingo, à quibus singularis
tua Modestia me terret : non
Doctrinam, non Pietatē ex-
tollo ; quarum alteram PII V.
Sanctissimi Pontificis Vita
quàm elegantissimè descripta

testatur , alteram vel deside-
rium huius Libelli confirmat:
neque enim delectari eo po-
test , qui non ad summam Pie-
tatis perfectionem adspirat.
Vale Illustre Congregationis
tuæ decus , tuo & communi
tuorum bono. Antuerpiæ , in
Officinâ Plantinianâ, Kalend.
Mart. M. DC. XXI.



B. A L-

B. A L B E R T I
 DOCTORIS MAGNI
 ex Ordine Prædicatorum
 EPISCOPI RATISPONENSIS
 D E
 ADHÆRENDO DEO
 L I B E L L V S.

CAPVT I.

*De vltima & summa perfectione
 hominis, quantum in hac vita
 possibile est.*



COGITAVI mihi ali-
 quid vltimatè (in quan-
 tum possibile est in hu-
 ius exilij & peregrina-
 tionis immoratione)
 depingere, scriptitando
 de & super ab omnibus plena & possi-
 bili abstractione, & cum solo Domino

Deo expedita, secuta, & nuda firmaque
adhæſione: præſertim cùm ipſius Chri-
ſtianæ perfectionis finis ſit charitas,
qua Domino Deo adhæretur. Ad quam
quidem adhæſionem charitatiuam om-
nis homo de neceſſitate ſalutis tenetur;
quod ſit præceptorum obſeruantia, &
diuinæ voluntatis conformitate: quo-
rum obſeruantia excludit omne quod
repugnat charitatis eſſentiæ & habitui;
cuiusmodi ſunt peccata mortalia. Reli-
gioſi verò adſtrinxerunt ſe etiam ad
Euangelicam perfectionē, atque ad ea
quæ ſupererogationis & conſilij ſunt,
per quæ expeditius ad vltimum finem,
qui Deus eſt, peruenitur: per quorum
obſeruantiam excluduntur ea etiam
quæ impediunt actum ſeu feruorem
charitatis, quod minùs poſſit quis in
Dominum Deum ferri; cuiusmodi ſunt
abrenuntiatio omnium rerum, corpo-
ris inſuper & animæ, profeſſionis dum-
taxat voto excepto. Quoniam quidem
*ſpiritus cùm ſit Dominus Deus, & eos
qui adorant eum, in ſpiritu & veritate
oportet adorare; id eſt, cognitione &
amore, intellectu & affectu, ab omni-
bus phantaſmatibus nudis. Hinc eſt &
illud*

Ioan. 4.

illud Matth.6. *Cùm adoraueris, intra in* Matth.6.
cubiculum tuum, id est, cordis tui intima: & *clauso ostio*, scilicet sensuum tuorum, & inibi corde puro, & conscientia bona, & fide non ficta *ora Patrem tuum* in spiritu & veritate *in absconso*. Quod tunc congruè fit, cùm homo ab omnibus alijs fuerit exoccupatus & exutus, & totus intra se receptus; vbi vniuersis & singulis exclusis & oblitis, coram Iesu Christo, tacito ore, sola mens desideria sua securè Domino Deo suo fiducialiter pandit, ac per hoc toto cordis & amoris affectu se in eum intimissimis medullis omnium virium suarum sincerissimè ac plenissimè diffundit & immergit, dilatat & inflamat, & resoluit in se.

CAPVT II.

*Qualiter quis omnibus alijs spretis
 soli Christo inhareat & intendat.*

VERVMTAMEN quicumque talem statum aggredi & ingredi désiderat & satagit, opus est omnino, vt velut clausis oculis & sensibus, de nullo se

A 5 peni-

penitus implicet aut perturbet, sollicitus sit aut curet; sed cuncta tamquam impertinentia & noxia ac pernicioſa funditus excutiat. deinde ſe totum intra ſe recipiat, nec aliud vñquam obiectum inibi mente attendat, quàm ſolum Ieſum Chriſtum vulneratum; ſicque per eum in eum, id eſt, per hominem in Deum, per vulnera humanitatis ad intima diuinitatis ſuæ, ſedulò & obnixè intendat: ibique ſe ſuaque ſingula ac cuncta, indiſcuſſè, ſuæ inſatigabili prouidentiae committat expedite & ſecurè, iuxta illud Petri: *Omneſſollicitudinem proicietes in eum*, qui poteſt omnia. Et iterum: *Nihil ſolliciti ſitis*. Et ruruſus: *Iacta cogitatum tuum in Dominum, & ipſe te enutriet*. Et iterum: *Mihi adherere Deo, bonum eſt*. Et: *Prouidebam Dominum in conſpectu meo ſemper*. Et Sponſa in Canticis: *Inueni quem diligit anima mea*. quippe *venerunt mihi omnia bona pariter cum illa*. Nempe hic eſt theſaurus ille cæleſtis abſconditus, nec non margarita pretioſa, quæ præ omnibus comparata fiducia humili, conatu inſtantiſſimo, taciturnitate tranquilla, etiam uſque ad corporaliſ commodi, laudis

1. Pet. 5.

Philip. 4.

Pſal. 54.

Pſal. 74.

Pſal. 15.

Cant. 3.

Sap. 7.

DE ADHÆRENDO DEO LIB. II
dis vel honoris iacturam, in fortitudine
spiritus quæritur. Alioquin quid pro-
ficit Religiosus, si totum mundum lu-
cretur, & animæ suæ detrimentum pa-
tiatur? Aut quid releuat status, profes-
sionis sanctitas, perfectionis habitus,
tonsura, & exterioris dispositio conuer-
sationis; sine vita in spiritu humilitatis
& veritatis, ubi Christus habitat per
fidem charitate formatam? Hinc est il-
lud Lucæ 17. *Regnum Dei intra vos est*, Luc. 17.
quod est Christus Iesus.

CAPVT III.

*Quæ sit conformitas perfectionis
hominis in hac vita.*

PORRO quantò plus mens sollicita
est ad ista inferiora & humana co-
gitanda & tractanda, tantò plus à supe-
rioribus & cælestibus per deuotionis
intimam elongatur: & quantò feruentius
ab inferiorum memoria, affectu & in-
tellectu ad superiora sensus colligitur,
tantò perfectior erit oratio, & purior
contemplatio: quia simul perfectè non
potest esse vtrisque intentæ, quæ sicut

lux & tenebræ sunt diuisa. Quippe qui Deo adhæret, versatur in lumine: qui verò mundo adhæret, in tenebris est. Qua ex re, est hominis in hac vita sublimior perfectio, ita Deo vniri vt tota anima cum omnibus potentijs suis & viribus in Dominum Deum suum sit collecta, vt vnus fiat spiritus cum eo, & nihil meminerit nisi Deum, nihil sentiat vel intelligat nisi Deum, & omnes affectiones in amoris gaudio vnitæ, in sola Conditoris fruitione suauiter quiescant. Imago enim Dei in his tribus potentijs in anima expressa consistit, videlicet, ratione, memoria, & voluntate. Et quamdiu illæ ex toto, Deo impressæ non sunt, non est anima deiformis iuxta primariam animæ creationem. Forma nempe animæ Deus est, cui debet imprimi, sicut cera sigillo, & signatum signo signatur. Hoc autem numquam plenè fit, nisi cùm ratio perfectè iuxta capacitatem suam illuminatur ad cognitionem Dei, qui est summa veritas; & voluntas perfectè afficitur ad amandam summam bonitatem, & memoria plenè absorbetur ad intuendum & fruendum æterna felicitate, & ad
sua-

DE ADHÆRENDO DEO LIB. 13
suauiter & delectabiliter in ea quiescendum. Et quia in horum consummata adeptione consistit gloria beatitudinis, quæ perficietur in patria; liquet quòd istorum perfecta inchoatio est perfectio in hac vita.

CAPVT IV.

*Qualiter operatio humana debeat
esse in solo intellectu, & non in
sensibus.*

FELIX ergo, qui per abstersionem continuam phantasmatum & imaginum, ac per introuersionem & inibi per sursum-ductionem mentis in Deum, tandem aliquando obliuiscitur phantasmatum quodammodò, ac per hoc consequenter operatur interius nudo ac simplici ac puro intellectu & affectu circa obiectum simplicissimum Deum. Omnia igitur phantasmata, species, imagines, ac formas rerum omnium citra Deum à mente reiicias, vt in solo nudo intellectu & affectu ac voluntate tuum pendeat exercitium circa Deum intra te. Nempe finis omnium exerci-

tiorum hic est, scilicet intendere & quiescere in Domino Deo intra te per purissimum intellectum, & deuotissimum affectum sine phantasmatibus & implicationibus. Huiusmodi autem exercitium non fit in organis carneis, & sensibus exterioribus, sed per quod quis homo est. homo verò quis est intellectu & affectu. Et idcirco quamdiu homo cum phantasmatibus & sensibus ludit, & eis insistit, videtur nondum exisse motus & limites bestialitatis sue, hoc est, illius quod cum bestiis habet commune. Quia illæ per phantasmata & per tales sensitiuas seu sensibiles species cognoscunt & afficiuntur, & non aliter, eò quòd altiore vim animæ non habeant. Secus est de homine, secundum intellectum & affectum & liberum arbitrium, ad Dei imaginem & similitudinem creato; quibus debet Deo immediatè, purè & nudè imprimi, & vniri, firmiterque inhærere. Quamobrem diabolus diligentissimè & maximè conatur impedire illud exercitium, quantum potest, ex quo est quodammodò præambulum & initium vitæ æternæ, inuidens super hoc homi-
ni.

ni. Idcirco nititur semper mentem hominis alienare à Domino Deo, nunc per istas, nunc per illas tentationes seu passionēs, nunc sollicitudine superflua & cura indiscreta, nunc turbatione, & conuersatione dissoluta, curiositateque irrationabili: nunc per studia librorum subtilium, colloquia aliena, rumores & nouitatem: nunc per aspera, nunc per contraria, &c. Quæ tamen etsi nonnumquam leuia & tamquam nulla videantur peccata; tamen magna sunt impedimenta huius sancti exercitij & operis. Et ideo, etiam si vtilia & necessaria visa fuerint, siue magna siue parua, vt noxia & pernicioſa illico sunt reicienda penitus, & à sensibus propel-
lenda. Summoperè igitur necessarium est, vt audita, visa, facta, & dicta, & cetera similia sine phantasmatibus, imaginibus & occupationibus recipiantur, nec etiam ex consequenti vel antea vel tunc super hoc phantasmata & implicationes formentur & nutriantur. Et ita quando phantasma non venit ad memoriam & mentem, tunc non impedit hominem, siue in oratione, meditatione, & psalmodia, siue in alia quacumque

que operatione & exercitatione spiri-
tuali; nec rursus iteratò occurreret ei. Et
sic expeditè secureque te totum, etiam
plenè omnia & singula committe infal-
libili & certissimæ diuinæ prouidentix
cum silentio & quiete, & ipse pugnabit
pro te: & meliùs, honestiùs ac dulciùs
liberabit te & consolabitur, quàm si tu
semper die noctuque de hoc continuè
phantasiareris, & vana vagaque ac ca-
ptiua mente fatuè sic & sic, hinc & inde
discurreres errabundus, necnon mente
& corpore deficiens tempus perderes,
& vires stultè ac irrationabiliter consu-
meres. Cuncta ergo & singula, vnde-
cumque & qualitercumque occurren-
tia ortum habeant, sic accipe cum taci-
turnitate & tranquillitate æquanimi-
ter, quemadmodum de manu pater-
næ diuinæque prouidentix tibi veni-
rent. Nuda igitur te à phantasmatibus
omnibus rerum corporearum, iuxta
tui status & professionis exigentiam;
vt nuda mente & sincerè inhæreas ei
cui te multipliciter & totaliter deuo-
uisti, vt nihil quodammodò possibi-
le sit medij inter animam tuam & ip-
sum, vt purè fixeque fluere possis à
vul-

DE ADMÆRENDO DEO LIB. 17
vulneribus humanitatis in lumen suæ
diuinitatis.

CAPVT V.

*Decordis puritate, quæ est præ
omnibus sectanda.*

SI igitur recto & securo tramite ac
breuiter ad finem beatitudinis viæ
& patriæ, gratiæ & gloriæ, peruenire
desideras & satagis; tunc intenta men-
te sedulo aspira ad perpetuam cordis
munditiā, & puritatem mentis, ac
sensuum tranquillitatem: atque cordis
affectum recollige, & iugiter defige
sursum in Dominum Deum. & inter
hæc abstrahere te à familiaribus tuis, &
ab omnibus hominibus, in quantum in
te est, & negotiis huiusmodi propo-
situm tuum impredientibus; semper ca-
ptans opportunitatem, vbi & quando
possis locum, tempus, & modum reperi-
re quietis ac contemplationis, carpens
silentij secreta, præsentisque sæculi vi-
tare naufragia, necnon perstreptentis
mundi fugere perturbationes. Qua de
re omni tempore puritati, munditiæ, ac
quieti

quieti cordis principaliter stude: vt videlicet continuè, velut clausis carnalibus sensibus, in temetipsum conuertaris; & cordis ostia à formis & phantasmatibus sensibilibus, & imaginationibus terrenorum, quantum possibile est, habeas diligenter serata. Nempe cordis puritas, inter omnia exercitia spiritualia quodammodò (tamquam finalis intentio, ac laborum omnium retributio, quam in hac vita spiritualis quisque & verè religiosus recipere consuevit) sibi vendicat principatû. Idcirco cor tuum, sensus, & affectum, cum omni diligentia, solertia & conatu, absolvas ab his omnibus quæ libertatem ipsius possent impedire; insuper ab omni re mundi possibilitatem habente alligandi & vincendi te. Sicque cunctas dispersiones cordis, & affectiones mentis, in vnum verum, simplex, & principalissimum bonum recolligere, & intra te tamquam in vno loco collectas habere agoniza; ac per hoc rebus diuinis Deoque mente semper inhærere, atque derelicta fragilitate terrena cor ad superna in intimis tuis in Iesu Christo iugiter transformare conare. Quapropter si
inci-

incipis te nudare & purificare à phantasmatibus & imaginibus, & simplificare & tranquillare fiducialiter in Domino Deo cor tuum & mentem tuam, vt haurias & sentias fontem diuini beneplaciti in omnibus interioribus tuis, & per bonam voluntatem sis Deo vnitus in intellectu; sufficit tibi hoc pro omni studio & lectione sacræ Scripturæ, & ad dilectionem Dei & proximi, vt vnctio docet. Omni igitur studio, conatu, & labore simplifica cor tuum, vt à phantasmatibus immobilis & tranquillus conuertaris, & stes in Domino semper intra te, tamquã si anima tua sit in illo NVNC æternitatis, id est, diuinitatis, taliter scilicet, vt amore Iesu Christi, de corde puro, conscientia bona, & fide non ficta teipsum deseras, & totum te Deo in omni tribulatione & euentu totaliter plenè committas, eiusque voluntati & beneplacito parere semper & patienter affectes. Quod vt fiat, necesse est, vt frequenter ad cor redeas, & in eo persistas; & ab omnibus, quantum possibile est, teipsum absolvas: mentis oculum semper in puritate & tranquillitate custodias; intellectum à phan-

à phantasmatibus & formis rerum infirmarum præserues: voluntatis affectum à curis terrenorum penitus absoluas, & summo vero bono amore feruido radicitus inhæreas: memoriam quoque iugiter habeas sursum eleuatam, & in ipso eodem vero summo bono ac solo essentiali & increato firmiter stabilitam: ita duntaxat, vt tota anima cum omnibus potentiis & viribus suis in Deum recollecta, vnus fiat spiritus cum eo, in quo summa perfectio viæ consistere cognoscitur. Hæc verò veritas spiritus & amoris est, quo homo omnibus votis supernæ & æternæ voluntati conformis efficitur, vt sit per gratiam, quod Deus est per naturam. Interea animaduertendum, quòd in eo ipso momento, quo quis suam Dei auxilio potest vincere voluntatem, id est, inordinatum amorem aut zelum à seipso abiicere, sic scilicet, vt Domino Deo de omni sua necessitate audeat planè totaliter confidere; hoc ipso facto in tantum Deo complacet, vt suam ei gratiam largiatur, & per ipsam gratiam veram sentiat charitatem & dilectionem, omnem ambiguitatem & timorem

rem expellentem, in Deo quæ confiden-
ter sperantem. Itaque nihil beatius esse
potest, quàm omnia in illo ponere, in
quo nullus est defectus. Proinde quam-
diu stas in te, & non stas, proice te to-
tum in Deum securè; & suscipiet te, sa-
nabit & saluabit te. Hæc si continuè in-
tra te veraciter reuolueris, plus tibi ad
beatam vitam conferent, quàm omnes
diuitiæ, deliciæ, honores, insuper &
omnis sapientia & scientia huius sæculi
fallacis, & corruptibilis mundi & vi-
tæ, etiam si in his excelleres omnes qui
vniquam fuerunt.

CAPVT VI.

*Quòd adharere debet homo deuotus
Deo, nudato intellectu & affectu.*

ET quia quantò magis te nudaueris
à phantasmatibus & implicationi-
bus exterioribus mundanis & sensibi-
libus, tantò magis anima tua recupera-
bit vires & interiores sensus suos, vt sa-
pient ei quæ sursum sunt: disce ergo
abstinere à phantasmatibus & imagini-
bus rerum corporalium; quia super
omnia

omnia placet Deo mens nuda ab huiusmodi formis & speciebus, cuius etiam deliciae sunt esse cum filiis hominum; videlicet qui à talibus occupationibus & distractionibus & passionibus tranquilla, pura & simplici mente sibi intendunt, vacant & adhærent. Alioquin si in talibus memoria, imaginatio & cogitatio tua sæpè vacat, necesse est, vel rebus nouis, vel reliquijs antiquorum deliniri, vel secundùm alia obiecta variè qualificari. Vnde Spiritus sanctus aufert se à cogitationibus quæ sunt sine intellectu. Verus itaque Iesu Christi amator sic debet esse vnitus intellectu per bonam voluntatem diuinæ voluntati & bonitati, & nudus ab omnibus phantasmatibus & passionibus, vt non aduertat si derideatur, diligatur, vel quidquid sibi inferatur. Voluntas namque bona omnia complet, super omnia est. Vnde si voluntas adsit bona, & Deo in intellectu purè conformis & vnita fuerit, non nocet si caro & sensualitas & exterior homo moueatur ad malum, & torpeat ad bonum, aut etiam si interior homo torpet deuotionem affectare; sed tantùm fide & bona voluntate

luntate adhærere debet Deo in intellectu nudè. Et hoc facit, si omnem imperfectionem & nihilitatem suam animaduertat, & cognoscat bonum suum in solo Creatore consistere, & cum suis potentiis & viribus se ac cunctas creaturas relinquit, atque ex toto & totum se in Creatorem suum immergit; ita quòd omnes operationes suas dirigit purè ex toto in Dominũ Deum suum, nec extra eum quidquam quærit, in quo percipit inuenisse omne bonum, & omnem felicitatem perfectionis. Et sic transformatur quodammodò in Deum, quòd nec cogitare, nec intelligere, nec amare, nec memorare potest, nisi Deum pariter & de Deo: creaturas autem alias & seipsum non videt, nisi tantum in Deo, nec diligit nisi solum Deum, nec memoratur de eis vel de se, nisi in Deo. Hæc verò cognitio veritatis semper facit animam humilem, seipsam, non alium iudicantem: sed econtrà mundana sapientia facit animam superbam, vanam, turgidam, & vento inflatam. Sit itaque hæc spiritualis & fundamentalis doctrina, quòd accedens ad Dei notitiam, seruitium & familia-

miliaritatem, & si vis Deum veraciter possidere, necesse est, quod cor tuum denudes omni amore sensibili, non tantum cuiuscumque personæ, sed etiam cuiuscumque creaturæ; ut simplici ac toto corde, secundum omne tuum posse, tendas in Dominum Deum tuum creatorem, liberè, absque omni duplicitate, cura & sollicitudine, plena fiducia in sola eius providentia de omnibus.

CAPVT VII.

*Qualiter cor sit recolligendum
intra se.*

PRÆTEREA, sicut dicitur in libro De spiritu & anima cap. xxi. ascendere ad Deum, hoc est intrare in seipsum. Qui enim interiùs intrans, & intrinsicùs penetrans seipsum transcendit, ille veraciter ad Deum ascendit. Ab huius ergo mundi distractionibus cor nostrum colligamus, & ad interiora gaudia reuocemus, ut aliquando in diuinæ contemplationis lumine hoc figere valeamus. Nam hæc est vita & requies
cordis

cordis nostri, cum in Dei amore per desiderium figitur, & eius consolatione suauiter reficitur. Sed quòd in huius rei experimentalì degustatione multipliciter impedimur, & nequaquam ad ipsum pertingere sufficiamus; ratio in promptu est, quia mens humana sollicitudinibus distracta, non intrat se per memoriam, phantasmatibus obumbrata; non redit ad se per intellectum, concupiscentiis illecta; ad seipsam nequaquam reuertitur per desiderium suauitatis internæ & lætitiæ spiritualis; ita totaliter in his sensibilibus & præsentibus iacens, non potest ad se tamquam ad imaginem Dei intrare. Oportet ergo & necesse est, vt cum humilitatis reuerentia ac fiducia nimia mens eleuet se supra se & omne creatum per abnegationem omnium, & vt dicat intra se: Quem ex omnibus, & præ omnibus, & super omnia quæro, diligo, appeto, & desidero; non est sensibilis neque imaginabilis, sed super omne sensibile & intelligibile: nullo vmquam sensu est perceptibilis, sed pleno desiderio totus desiderabilis: non insuper est figurabilis, sed intimo affectu perfectissimè ap-

petibilis : non est æstimabilis, sed mundo corde totus affectibilis; quia super omnia amabilis & delectabilis, infinitæque bonitatis & perfectionis. Et tunc fertur in mentis caliginem, & altiùs intra se eleuatur, & profundius ingreditur. Et hic modus ascendendi vsque ad ænigmaticum contuitum sanctissimæ Trinitatis in vnitate, vnitatis in Trinitate, in Iesu Christo, tantò est ardentior, quantò vis ascendens illi est intimior; & tantò fructuosior, quantò affectu proximior. Quippe in spiritualibus illa sunt superiora quæ intimiora, quo ad experientias spirituales. Quapropter numquam desistas, numquã quiescas, donec futuræ illius plenitudinis aliquas (vt ita dicam) arrhas seu experientias degustes, & donec diuinæ suauitatis dulcedinem per quantulascumque primitias obtineas, & in odorem ipsius post eam currere non desinas, donec videas Deum deorum in Sion. In spirituali enim profectu, & cum Dei intrate vnione & adhæsione, non quiescas, nec retrocedas, donec affectus fueris quod intendis. Exemplum huius accipe in simili ab ascendentibus montem naturalern

turalem. Si enim spiritus noster, in his
 quæ deorsum transeunt, se per cupidi-
 nem immerferit ; statim per infinitas
 distractiones & itinera obliqua rapitur,
 & à se quodāmodò diuisus dissipatur,
 & quasi in tot spargitur, quot ea sunt
 quæ per desideria concupiscit. Hinc
 motus sine stabilitate, cursus sine per-
 uentione, labor sine requie. Si verò cor
 & spiritus noster ab hac infimorum in-
 finita distractione, quæ deorsum est, per
 desiderium & amorem se traxerit, &
 hæc infima deferens paulatim se intra
 se in vnum immutabile sufficiens bo-
 num colligens, secum esse didicerit, &
 ei inseparabiliter quodam affectu in-
 hæserit ; tantò ampliùs in vnum colli-
 gitur & fortificatur, quantò magis ag-
 nitione & desiderio sursum eleuatur, &
 in ipso vero summo bono intra se habi-
 tuatur, donec tandem omnino immu-
 tabilis fiat, & ad illam veram vitam,
 quæ ipse Dominus Deus est, immuta-
 biliter perueniat: vt perpetuò, sine om-
 ni mutabilitatis & temporis vicissitu-
 dine, requiescat iam in illo intrinseco,
 & quieto, ac secreto diuinitatis mane-
 rio, perfectè collocatus intra se in Chri-

sto Iesu ; qui est via ad se venientibus,
veritas, & vita.

CAPVT VIII.

*Quomodo in quolibet euentu homo
denotus se debeat Deo committere.*

CREDO iam & arbitror , quòd ex
hucusque deductis cognoscas,
quòd quantò magis magisque te nuda-
ueris à phantasmatibus , & omnibus
rebus mundialibus & creatis , ac per
bonam voluntatem intellectu Deo vni-
tus fueris, tantò magis ad statum inno-
centiæ & perfectionis appropinquas.
Quo quid melius? quidve felicius ac
iucundius? Super omnia ergo valet, vt
teneas mentem nudam sine phantasma-
tibus & imaginibus, & à quibuscum-
que implicationibus, vt nec de mundo,
nec de amicis, nec de prosperis, nec de
aduersis, præsentibus , præteritis , vel
futuris, in te nec in alijs, nec etiam ni-
mis de proprijs peccatis solliciteris: sed
cum quadam puritatis simplicitate te
esse cum Deo extra mundum nudè co-
gita, ac si anima tua iam esset in aterni-
tate

tate extra corpus separata ; vtique non tractaret sæcularia , nec curaret de statu mundi , nec de pace , nec de guerra , nec de sereno , nec de pluuiā , & planè nec de aliquo huius sæculi ; sed soli Deo conformiter totaliter intenderet , vacaret , & inhæreret . Sic suo modo vel nunc relinque corpus tuum , & omnia præsentia & futura creata ; & defige aciem mentis ac spiritus tui fixè , secundum omne tuum posse , nudè & expeditè , in illud increatum lumen . Et sic ab omnibus phantasmatibus & inuolutionibus ac obnubilationibus depuratus sit spiritus tuus , tamquam angelus corpori alligatus , qui per operationem carnis non impeditur , nec cogitationibus vanis ac vagis implicatur . Fortificet ergo se spiritus contra quascumque tentationes , vexationes , iniurias , vt æquanimitè inconcussè in vtraque fortuna perseveret in Deo . Et cùm adest turbatio , aut acedia , vel mentis confusio , non proptereà insolescas , aut pusillanimis sis , nec propter hoc curras ad orationes vocales , aut alias consolationes ; sed hoc solùm , vt resuscites te per voluntatem bonam in intellectu , vt adhæreas Deo

mente, velit nolit sensualitas corporis. Deuota namque anima sic debet esse cum Deo vnita, & suam voluntatem diuinæ voluntati tam conformem habere & facere, quòd se cum nulla creatura occupet, seu adhæreat, sicut dum non erat creata; ac si nihil sit præter solum Deum, & ipsam animam. Et sic vniuersa & singula æquanimiter de manu diuinæ prouidentiae securè & infallibiliter accipiat, sustinens vniformiter in omnibus Dominum in patientia, tranquillitate, & silentio. Qua de re nudare mentem ab omnibus phantasmatibus super omnia valet ad vitam spiritualem, vt sis per bonam voluntatem vnitus Deo in intellectu & conformis. Prætereà nihil erit medium inter te & Deum: quod sic patet, quia nec res aliqua ab extra erit medium, cum per votum voluntariæ paupertatis ablata sit omnis rei possessio vsque ad vltimum; & per castitatis votum corpus, & per obedientiam voluntas & ipsa anima; & sic quodammodò nihil relinquitur, quod mediat inter te & Deum. Quòd autē Religiosus sis, probat professio ipsa, status tuus, & nunc habitus tuus,

DE ADHÆRENDO DEO LIB. 31
tuus, & tonsura, & similia huiusmodi:
sed an fictus, an verus Religiosus sis,
tu videris. Animaduerte ergo, quàm
grauiter de generes & pecces in Domi-
num Deum tuum, & in omnem eius
iustitiam, si secùs egeris, & creaturæ
potiùs quàm Creatori ipsi voluntate
& amore inhæseris, creaturam præpo-
nens Creatori.

CAPVT IX.

*Contemplatio in Deo, quatenus om-
nibus aliis exercitijs est præponenda.*

ET quia omnia citra Deum sunt ef-
fectus & opus ipsius Creatoris, ha-
bentia posse & esse, & quidquid sunt &
possunt, limitatum, & vt ex nihilo pro-
ducta nihilitatibus circumdata, & ex
se ad nihilum tendentia; necessariò mo-
mentis singulis suum existere, conser-
uari, operari, & si quid in eis est, & sic
per omnia ab ipso summo opifice Deo
recipiunt, tamquam verè ex seipsis sibi
& alijs insufficientia, ad cuius opera-
tionem sunt, sicut nihil ad aliquid, fini-
tum ad infinitum. Quapropter in solo

eo, & circa eum, & propter eum, & in eum sit omnis recta nostra contemplatio, vita, & operatio: qui etiam vno voluntatis natu posset & sciret in infinitum omnibus modò creatis perfectiora producere. Nulla ergo, siue secundum intellectum, siue secundum affectum, contemplatio & amoris fruitio utilior, perfectior, & felicior, quàm in ipso Deo creatore summo & vero bono; à quo, in quo, per quem, & ad quem omnia: sibi & omnibus sufficiens est in infinitum, qui omnium in se continet perfectiones simplicissimè ab æterno, in quo nihil quod non sit ipse: apud quem, & per quem, omnium instabiliū stant causæ: in quo omnium mutabilium immutabiles manent origines, necnon omnium rationabilium, irrationabiliumque, atque temporalium in eo sempiternæ viuunt rationes: qui omnia complet, vniuersa singulaque se toto essentialiter implet: cuiq; rei intimior est & præsentior per essentiam, quàm res sibiipsi: in quo omnia simul sunt vnita, & in eo sempiternè viuunt. Præterea si ex infirmitate, aut inusitatione intellectus, quis magis tenetur

netur in creaturis contemplari, tunc hæc optima, vera, & fructuosa contemplatio videtur homini mortali possibilis, vt saltem in cunctis suis contemplationibus & meditationibus, siue circa creaturas, siue circa Creatorem fiunt, consurgat delectatio in ipso Creatore Deo vno & trino intra se, vt inardescat ignis diuini amoris, & veræ vitæ in se, & in alijs, ad meritum felicitatis æternæ vitæ. Animaduertenda est etiam in hoc differentia inter contemplationem Catholicorum fidelium, & Philosophorum gentilium: quia contemplatio Philosophorum est propter perfectionem contemplantis, & ided sistit in intellectu; & ita finis eorum in hoc est cognitio intellectus. Sed contemplatio Sanctorum, quæ est Catholicorum, est propter amorem ipsius, scilicet contemplati Dei: idcirco non sistit in fine ultimo in intellectu per cognitionem, sed transit ad affectum per amorem. Vnde Sancti in contemplatione sua habent amorem Dei tamquam principaliter intentum; quia felicius est etiam Dominum Iesum Christum cognoscere, & habere spiritualiter per gratiam, quàm

sine gratia corporaliter, vel etiam essentialiter. Porro dum anima ab omnibus abstrahitur, & in seipsam reflectitur, contemplationis oculus dilatatur; & se scalam erigit, per quam transeat ad contemplandum Deum. Ex qua contemplatione anima inardescit ad bona cœlestia & diuina, & ad æterna; & omnia temporalia à longè prospicit tamquam nihil sint. Vnde quando in Deum procedimus per viam remotionis; primò negamus ab eo omnia corporalia & sensibilia & imaginabilia; secundò, etiam intelligibilia; ad vltimum, hoc ipsum esse secundùm quod in creaturis remanet. Sic quantum ad statum viæ pertinet, optimè Deo coniungimur, secundùm Dionysium. Et hæc est caligo, quam Deus inhabitare dicitur, quam Moyses intrauit, ac per hanc ad lucem inaccessibilem. Verùm non prius quod spirituale, sed quod animale: ideò consueto ordine procedendum est à labore actionis ad quietem contemplationis, à virtutibus moralibus ad theoricæ & speculatiuas. Denique, ô anima mea, quid occuparis circa plurima superuacua, & semper in his egēs? Intende & ama

DE ADHÆRENDO DEO LIB. 35
ama hoc vnum optimum bonum, in
quo omne bonum; & sufficit. Infelix
ergo, qui omnia scit præter ipsum &
habet, ipsum autem nescit. Et si hæc
omnia & ipsum sciat, non propter hoc,
sed propter ipsum beator. Vnde Ioan-
nis 17. *Hæc est vita æterna, ut cognoscant* Ioan. 17.
te, &c. & Propheta: Satiabor cum appa- Psal. 16.
ruerit gloria tua.

CAPVT X.

*Actiualis deuotio & sensibilis non
tantum curanda est, sicut volun-
tate Deo adherere.*

PRÆTEREA non multum cures a-
ctiualem deuotionem, aut sensibi-
lem dulcedinem, vel lacrymas; sed tan-
tum per bonam voluntatem in intelle-
ctu sis mente cum Deo intra te vnitus.
Quippe super omnia placet Deo mens
nuda à phantasmatibus, id est, imagini-
bus, speciebus, ac similitudinibus re-
rum creatarum. Decet namque mona-
chum esse alienum ab omni creatura,
vt soli Deo intra se nudè & expeditè in-
tendat, vacet, & adhæreat. Quamobrem

abnegetes temetipsum, vt nudè sequaris Christum Dominum Deum tuum, qui verè pauper, obediens, castus, humiliatus est, & passus : in cuius etiam vita & morte multi scandalizati fuerunt, vt liquet ex decursu Euangelij. Præterea, anima separata à corpore non aduertit, quomodo aut quid agatur de suo corpore derelicto, siue comburatur, siue suspendatur, siue maledicatur ; & nihil propter has iniurias corpori illatas contristatur ; sed solum cogitat illud NVNC æternitatis, & illud vnum quod dixit Dominus in Euangelio necessarium. Sic & tu te habeas ad corpus tuum, quasi iam non sis in corpore ; & cogita semper de æternitate animæ tuæ in Deo, & dirige sedulò cogitatum tuum in illud vnum de quo Christus dixit : *Porro vnum est necessarium.* & senties ex hoc magnam gratiam, ad mentis nuditatem & cordis simplificationem acquirendam. Verumtamen istud vnum est tibi præsentissimum, si te nudaueris à phantasmatibus, & quibuscumq; alijs implicationibus ; moxque senties sic esse, videlicet te nuda & expedita mente vacare & adhærere Deo.

Luc. 10.

Deo: & sic eris inuictus etiam in omnibus qualitercumque inferri possunt, sicut & sancti Martyres, Patres, & electi, beatiq̃ue omnes: qui, despectis omnibus, solùm cogitabant animæ securitatem & æternitatem in Deo; & ita armati intus, & per bonam voluntatem Deo vniti, omnia mundi spreuerunt, ac si omnino anima iam diuisa esset à corpore. Ex his ergo perpende, quantum potest bona voluntas cum Deo vnita, imò per illam animæ impressionem in Deo, vt per eius à carne virtualem & spiritualem diuisionem, anima quodammodò respiciat à longè hominem exteriorem suum tamquam non suum; & sic vilipendit omnia quæ inferuntur sibi vel carni suæ, ac si fierent alteri, vel non homini. Qui enim adhæret Deo, vnus spiritus est cum eo. Numquam ergo audeas omnino coram Domino Deo tuo intrate aliquid cogitare, vel imaginari, quod coram hominibus erubesceres vel audiri, vel videri, propter Dei reuerentiam principalem. Est etiam hoc iustum, omnem tuum cogitatum & cogitationem ad solum Deum erigere; eumq̃ue, tamquam nihil aliud

præter ipsum sit, sola mentis acie intueri, sicque inhærendo frui, quod est perfecta inchoatio vitæ futuræ.

CAPVT XI.

Qualiter tentationibus sit resistendum, & tribulationes qualiter sustinenda.

PROINDE nemo accedens ad Deum vero & integro corde est, quin vexationibus & tentationibus probetur. Idcirco in omnibus tentationibus vel hoc obseruetur, vt si sentiatur, non consentiatur, & patienter ac æquanimiter cum humilitate & longanimitate portetur. Si verò blasphemix sint & turpissimæ, hoc omnino firmiter teneas, quòd nihil meliùs aut veriùs contra easdem facere potes, quàm omnino huiusmodi phantasias pro nihilo reputare: quamquam blasphemix nequissimæ & fœdissimæ & horribiles sint, solùm non cura eas, sed pro nihilo reputa & contemne, & tibi non imputa, nec velis tibi super huiusmodi conscientiam formare. Fugiet proculdubio inimicus, si eum
sic

DE ADHÆRENDO DEO LIB. 39
sic & suas factiones contempseris. Superbus enim est valdè, non patitur se contemni & sperni. Omnino ergo talia penitus non curare, summum est remedium, sicut de muscis volantibus coram oculis contra voluntatem. Prouideat ergo seruus Iesu Christi, tam facile non importunè fugere à facie Domini, & hinc inde indignari, murmurare, & querulari super vnus muscæ vexatione, videlicet leuis tentationis, suspicionis, tristitiæ, & detractionis, insufficienciæ, & cuiuscumque aduersitatis, cùm sola manu bonæ voluntatis in Deum erectæ possunt omnia hæc fugari. Nempe per bonam voluntatem habet homo Deum in possessorem, sanctos Angelos custodes & protectores. Insuper & per bonam voluntatem omnis tentatio superatur, sicut musca manu de caluitie capitis fugatur. Pax ergo hominibus bonæ voluntatis. Proinde ergo nec aliquid ditius offertur Deo bona voluntate. Quippe bona voluntas in anima, est origo omnium bonorum, & omnium mater virtutum: quam qui habere incipit, securè habet quidquid ei ad benè viuendum opus est. Si ergo
volue-

volueris bonum, & non potes, factum Deus compensat. Igitur secundum hoc æterna lex incommutabili stabilitate firmavit, ut in voluntate meritum sit; in beatitudine, aut in miseria, præmium, atque supplicium. Dilectio enim est magna voluntas Deo seruiendi, dulcis affectus Deo placendi, feruentissimum desiderium Deo fruendi. Demum tentari non est peccatum, sed materia exercendæ virtutis, ut homo ad multa bona proficiat tentatione, cum tota vita hominis super terram tentatio censeatur.

CAPVT XII.

De amore Dei, quàm efficax sit.

ENIMVERO omnia supradicta, & quæcumque saluti necessaria, non melius, nec propinquiùs, nec salubriùs perfici possunt, nisi per amorem: per quem suppleri potest omnis necessarij ad salutem indigentia; & in eo habetur omnis boni abundantia, nec deest summi desiderij præsentia. Quippe solus amor est, quo conuertimur ad Deum, transformamur in Deum, adhæremus Deo,

Deo, vnimur Deo, vt simus vnus spiritus cum eo, & beatificemur hîc in gratia, & ibi in gloria, ab eo, & per eum. Amor enim ipse non quiescit, nisi in amato. quod fit, cùm obtinet ipsum possessione plenaria atque pacifica. Nempe amor ipse, qui & charitas, est via Dei ad homines, & via hominis ad Deum: & mansionem Deus habere non potest, vbi charitas non est. Si igitur charitatem habemus, Deum habemus, quia Deus charitas est. Proinde nihil amore acutius, nihil subtilius aut penetrabilius: nec quiescit, donec naturaliter totam amabilis penetrauerit virtutem & profunditatem ac totalitatem; & vnum se vult facere cum amato, &, si fieri potest, vt hoc idem ipse sit quod amatum. Et ita nullum patitur medium inter se & obiectum dilectum quod amat, quod est Deus, sed vehementer tendit in eum: & ideò numquam quiescit, donec omnia transeat, & ad ipsum in ipsum veniat. Est enim amor ipse virtutis vnitivæ & transformativæ, transformans amantem in amatum, & econtrâ, vt sit vnum amatorum in altero, & econuersò, in quantum intimiùs potest.

potest. Quod liquet primò quantum ad vires apprehensiuas, qualiter amatum sit in amante; videlicet in quantum dulciter & delectabiliter reuocatur in apprehensione amantis, & è regione, prout scilicet amans nititur singula quæ ad amatum pertinent, non superficialiter, sed intrinsecùs discernere, & quasi ad interiora eius ingredi. Sed quantum ad vires appetitiuas & affectiuas, amatum dicitur in amante, prout videlicet est in affectuosa eius complacentia, & in iucunda eius delectatione interiùs radicata: econuersò, amans est in amato, toto desiderio & conformitate secundùm idem velle & nolle, & in eodem gaudere & tristari, tamquam idem ipse. Trahit enim amor (*quia fortis est ut mors dilectio*) amantem extra se, & collocat eum in amato, faciens ei intimissimè inhærere. Plus enim est anima vbi amat, quàm vbi animat; quia sic est in amato secundùm propriam naturam, rationem, & voluntatem: sed in eo quod animat, tantùm est secundùm quod est forma; quod etiam brutis conuenit. Non est ergo aliud quod nos ab exterioribus sensibilibus intra nos, &

exinde

Cant. 2.

exinde in Iesu Christi intima & diuina trahit, quàm amor Christi, quàm desiderium dulcedinis Christi, ad sentiendum, percipiendum, & degustandum præsentiam diuinitatis Christi. Non itaque aliud est quàm amoris vis, quæ etiam animam de terris ad fastigia cæli celsa perducit. Nec ad summam beatitudinem quis peruenire potest, nisi amore & desiderio prouocante. Ipse etiam amor est vita animæ, vestis nuptialis, & perfectio ipsius, in quo omnis lex & Prophetæ, & Domini edictum pender. Vnde Apostolus ad Romanos: *Plenitudo legis est dilectio.* Et prima ad Timotheum: *Finis præcepti est charitas.* Rom. 13.
1. Tim. 1.

CAPVT XIII.

Orationis qualitas & utilitas : & quomodo cor sit recolligendum intra se.

PRÆTEREA, cùm ad hæc & ad quæcumque alia bona omnino simus ex nobis insufficientes, nec aliquid de nobis ipsi Domino Deo (à quo solo omne bonum) exhibere possumus, quod non
fit

fit prius suum, solo vno excepto, quod
superest; quemadmodum ipse per se
benedicto suo ore etiam & exemplo
nos instruere dignatus est; vt videlicet
in omni casu & euentu ad ipsam ora-
tionem recurramus, sicut rei, miseri,
pauperes, mendici, infirmi, inopes, sub-
diti, serui, & filij, ac totaliter in nobis
ipsis desolati, humillima mentis pro-
stratione, in timore & amore, recollectè
& compositè, maturo, vero, nudoque
affectu erubescentiæ, cum magnitudi-
ne desiderij & ardore, necnon in gemitu
cordis, & simplicitate & sinceritate
mentis, supplicemus & exponamus ipsi
plena cum fiducia vndique nobis im-
minentia pericula; ita dumtaxat, vt ex-
peditè, securè, & nudè nos ei totaliter
vsque ad vltimum fideliter committa-
mus, & offeramus, tamquam verè &
per omnia sui, nihil nobis ipsis reser-
uantes, vt impleatur in nobis illud
beati patris Isaac, qui loquitur de hac
ipsa oratione, dicens: Tunc erimus
vnum in Deo, & Dominus Deus erit
in nobis omnia in omnibus & solus,
quando illa sua perfecta dilectio, qua
prior ille nos dilexit, in nostri quoque
cordis

DE ADHÆRENDO DEO LIB. 45
cordis transierit affectum. Quod ita
fiet, cū nobis omnis amor, omne de-
siderium, omne studium, omnis cona-
tus, denique omnis cogitatio nostra,
omneque quod videmus, loquimur,
quodque speramus, Deus erit; illaque
vnitas quæ nunc est Patris cum Filio, &
Filij cum Patre, in nostrum fuerit sen-
sum mentemque transfusa: vt quem-
admodum ille nos sincera & pura at-
que indissolubili charitate diligit, nos
quoque ei perpetua & inseparabili di-
lectione iungamur; ita scilicet eidem
copulati, vt quidquid speramus, quid-
quid intelligimus, quidquid loquimur
& oramus, Deus sit. Hæc ergo intentio,
hic conatus, & finis spiritualis hominis
esse debet, vt imaginem futuræ beatitu-
dinis in hoc corruptibili corpore possi-
dere mereatur, & quodāmodò arrham
illius cælestis beatitudinis & conuersa-
tionis & gloriæ incipiat in hoc sæculo
prægustare. Hic inquam finis totius
perfectionis est, vt eò vsque extenuata
mens ab omni situ carnali, ad spiritua-
lia quotidie sublimetur, donec omnis
conuersatio, omnisque voluntas cor-
dis, vna & iugis efficiatur oratio.
Cumque

Cumque ita mens, deposita face terrena, ad Deum, in quo solo semper defixa debet esse intentio spiritualis hominis, respirauerit (cui ab illo summo bono vel parua separatio, mors praesens ac perniciosissimus interitus est credendus) praemissaque fuerit tranquillitate fundata, vel ab omnium carnalium passionum nexibus absoluta, & illi vni summoque bono tenacissima adhæserit intentione, Apostolicum illud implebit: *Sine intermissione orate, & in omni loco, levantes puras manus, sine ira & disceptatione.* Hac enim puritate (si dici potest) sensu mentis absorpto, ac de terreno situ ad spiritualem siue angelicam similitudinem transformato, quidquid in se receperit, quidquid tractauerit, quidquid egerit, purissima atque sincerissima oratio erit. Hæc proinde si continuaueris indisruptè, quemadmodum vsque ab initio disseruimus, erit tibi in tua introuersione & recollectione iam facile ac promptum contemplari ac frui, sicut viuere in natura.

1. Thess. 5.

1. Tim. 2.

CAPVT XIV.

*Conscientiæ attestatio in omni
iudicio requirenda est.*

DEMVM ad spiritualementis perfectionem, puritatem, & tranquillitatem in Deo consequendam, non mediocriter ad hoc proficere videtur, vt in omni quod de nobis dicitur, sentitur, & agitur, semper tacite ad interiora mentis arcana recurramus; & inibi ab omnibus alijs abstracti, & intra nos totaliter recollecti, statuamus nos in cognitionem veritatis ante nos, & vtrique inueniemus atque videbimus penitus nihil proficere nobis, sed plurimum obesse, si laudati vel honorati ab extra fuerimus, & ab intra in veritatis cognitione de nobis culpabiles & rei existimus. Et sicut tunc nihil prodest, si quempiam ab extra homines laudant, & conscientia ab intra accusat: ita è regione nihil obest, si ab extra quis contemptus, vituperatus, & persecutus fuerit, ab intra tantum innocens, irreprehensibilis, & innoxius existat: imò
quàm

quàm plurimum super hæc cum patientia, & silentio, & quiete, non immeritò in Domino gratulari habet: siquidem nulla nocebit aduersitas, vbi non dominatur iniquitas. Et sicut nullum malum impunitum, ita nullum bonum irremuneratum. Neque cum hypocritis velimus mercedem & præmium expectare, vel recipere ab hominibus: sed solùm à Domino Deo, non in præfenti, sed in futuro; non transitorio in tempore, sed in æternitate. Liquet ergo, quòd nec maius aliquid, nec melius, quàm semper in omni tribulatione & euentu ire ad interiora mentis secreta, & ibi inuocare ipsum Dominum Iesum Christum, adiutorem in tentationibus & tribulationibus; ac inibi humiliari in confessione peccati, & laudare ipsum Deum & Patrem, corripientem & consolantem: insuper & omnia & singula, in se vel in alijs, prospera siue aduersa, æquanimiter accipere, expeditè & securè, de manu suæ infallibilis prouidentiae aut dispositionis ordinatæ. Ex quibus sequitur etiam peccatorum remissio, amaritudinis expressio, collatio dulcedinis & securitatis, infusio gratiæ
& mi-

& misericordiæ, attractio & corroboratio familiaritatis, atque abundans in ipso consolatio, firmaque adhæſio & vnio. Sed nec velimus imitari eos, qui per hypocrifiſim, & more Phariſaico, ſe ipſos cariùs & aliter videri, haberi & apparere ab extra coram hominibus fatagunt, quàm ab intra in veritate de ſe didicerunt: quod quidem extremæ dementiæ eſt, ſic videlicet quærere, appetere aut expetere laudem humanam vel gloriam à ſe vel ab alijs, cùm nihilominùs interiùs repletus ſit illecebris & peccatis grauiffimis. Et certè qui poſt huiusmodi vaniſſima currit, fugient ab eo prædicta bona, & dedecus incurret. Semper ergo præ oculis tuis habeas mala tua, & inidoneitatem tuam, & cognoſce te, vt humilieris; & tamquam peripſema indigniſſimum, viliſſimum, abiectiſſimumque ab omnibus haberi non refugias, propter grauiffima peccata & maxima mala tua. Quæ de te reputa te inter alios, vt ſcoriam inter aurum, zizaniam inter triticum, paleam inter grana, lupum inter oues, ſatan inter filios Dei. Sed nec velis reuereri ab alijs, alijsque præferri: imò

Psal 9.

Isaia 3.

Luc 6.

potiùs toto corde & spiritu fuge virus
huius pestilentia, venenum laudis, re-
putationem iactantia & ostentationis;
ne videlicet, iuxta Prophetam, laude-
tur *peccator in desideriis anima sua*. Et
Isaia tertio: *Qui beatum te dicunt, ipsi te
decipiunt, & viam gressuum tuorum dis-
spant*. Et Dominus Lucæ sexto: *Va-
cùm benedixerint vobis homines*.

CAPVT XV.

*Contemptus sui, qualiter causetur in
homine, & quàm utilis sit.*

PROINDE quantò quis vilitatis suæ
cognitor est, tantò plus & limpi-
diùs diuinæ maiestatis est inspector: &
quantò aliquis propter Deum, verita-
tem & iustitiam, sibi ipsi in oculis suis
est vilior, tantò in oculis Dei est pretio-
sior. Quapropter studeamus toto desi-
derij conatu nos vilissimos reputare, &
credere indignos omni beneficio; nobis
displicere, soli Deo placere, ab alijs in-
dignissimi & vilissimi reputari: insuper
super tribulationibus, afflictionibus, &
iniurijs non moueri, nec super huius-
modi

DE ADHÆRENDO DEO LIB. 51
modi inferentes conturbari, nec cogitationibus contra eos inuolui, vel indignari; sed æquo animo credere velis, te cunctis iniurijs, vilipensionibus, flagellis, & derelictionibus esse dignum. Nam reverà, qui verè secundum Deum pœnitet & luget, ille ab omnibus honorari ac diligì abhorret, nec subterfugit nec renuit se quodammodò odiri, conculcari, despici, vsque in finem; vt verè humilietur, & puro corde soli Domino Deo sincerè adhæreat. Verum tamen ad Dominum Deum solùm diligendum, & seipsum super omnia abhorrendum, & ab alijs appetere vilipendi, non requiritur labor extrinsecus, nec corporis valetudo, sed potiùs solitudo corporis, labor cordis, & quies mentis; vt scilicet labore cordis, & affectione mentis intimæ surgat, & corporaliter se ab illis infimis euellat, & sic ad cælestia & diuina surgat & ascendat. Nempe hoc facientes, mutamus nos in Deum: & præcipuè tunc fit, quando ex corde eligimus, sine iudicio, damnatione & contemptu proximi, nos vt peripsèma & opprobrium ab omnibus æstimari, imò ab omnibus tamquam

lutum fœdum abhorreret, quàm quibuscumque deliciis abundare, vel ab hominibus honorari aut eleuari, seu qualicumque corporali & transitoria sospitate vel commodo perfrui; nec aliam præsentis huius mortalitatis & corporalis vitæ consolationem desiderare, quàm nostras offensiones, culpas, & peccata sine intermissione lugere, deplangere, & plorare; perfectè nos vilipendere & annihilare, & de die in diem ab alijs magis magisque viliores haberi, & in omni vilitate indigni in nostris oculis quotidie fieri, vt soli Deo placeamus, eumque solam diligamus, sicque ei adhæreamus: nec circa aliquid velimus affici, nisi solùm circa ipsum Dominum Iesum Christum, qui solus iaceat in nostro affectu; nec de vllò sollicitari & curare, nisi de ipso, in cuius ditione & prouidentia vniuersa & singula currunt & subsistunt. Non ergo tuum erit amodò deliciarì, sed verè toto corde lugere. Quamobrem, si non luges, propter hoc luge: si verò luges, propter hoc magis lamentare, quia doloris causam tibi superinduxisti, propter tuas offensiones maximas & pec-

cata infinita. Sicut ergo non sollicitudinem gerit super spiculatorum dispositionem, qui sententiam suscipit condemnatus; sic qui lamentatur, & efficaciter luget, neque delicijs, neque iræ, aut gloriæ, vel indignationi, vel huiusmodi aliquando attendat. Et sicut alia ciuium, alia sunt damnatorum habitacula; ita lugentium, & habentium ad pœnam obligantia delicta, statio & institutio ab innoxijs & non obligatis aliena penitus debet esse & remota. Alioquin non esset differentia rei obnoxij & innocentis, in compensatione & satisfactionis pœna, quæ tamen magna erat in præuagationis culpa; & liberior esset iniustitia, quàm innocentia. Omnia ergo abneganda, omnia contemnenda, omnia excutienda & vitanda, ut plena fide bonum luctui pœnitentiæ iaciatur fundamentum. Igitur in veritate Iesum Christum diligens, & post eum lugens, & eum in corde & in corpore portans, in veritate dolorem de suis peccatis & offensionibus habens, in veritate futurum regnum percipere inquirens, necnon in vera fide memoriam tormentorum & iudicij æterni

possidens, & sui exitus timorem & memoriam firmiter perfecteque reassumens, non ulterius conabitur, nec curabit, nec sollicitus erit de aliquo alio. Propter quod qui ad beatam impassibilitatem & ad Deum currere festinat, omni die in qua non maledicatur & contemnitur, se multum damnum arbitretur sustinuisse. Impassibilitas autem est, à vitijs & passionibus libertas; cordis munditia, & virtutum ornatus. Æstima igitur te iam mortuum, quem non ambigis de necessitate moriturum. Et postremum argumentum omnium cogitationum, locutionum, operum tuorum, an secundum Deum sint, sit tibi indicium hoc, videlicet si his magis humilis, & intra te, & in Deo plus recollectus & confortatus fueris. Si autem aliter in te reppereris, suspectum tibi sit, ne non sit secundum Deum, nec sibi acceptum, nec tibi proficuum.

CAPVT XVI.

*Providentia Dei, qualiter ad
omnia se extendat.*

VERVMTAMEN, vt iuxta præfata,
sine impedimento, expeditè, se-
curè & nudè in Dominum Deum no-
strum liberè & tranquillè feramur,
coniungamur & vniamur, ei que firmiter
adhæreamus, æquanimiter in pro-
speris & aduersis, in vita siue in mor-
te; opus est, vt cuncta & singula indis-
cussæ suæ infallibili prouidentia indu-
biè committamus & certissimè. Nec
mirum, cum ipse solus sit qui omnibus
dat esse, posse, & operari, id est, substan-
tiam, virtutem, & operationem, spe-
ciem, modum, & ordinem in numero,
pondere, & mensura. Præsertim cum
sicut opus artis præsupponit opus na-
turæ; ita opus naturæ præsupponit opus
Dei creantis, conseruantis, ordinantis,
& administrantis: eò quod ipsius solius
sit infinita potentia, sapientia, bonitas,
& essentialis misericordia, iustitia, &
veritas, charitasque; immutabilis æter-

nitas & immensitas. Nulla ergo res potest propria virtute subsistere, nec agere, nisi agat in virtute ipsius Dei, scilicet primi mouentis, primi principij, qui est causa omnis actionis, & operatur in omni agente. Quippe quantum ad rationem ordinis pertinet, Deus immediatè omnibus prouidet, & vsque ad vltima singularia. Nihil igitur à maximo vsque ad minimum sempiternam Dei prouidentiam effugit, nec declinat etiam, siue in naturalibus, siue in voluntarijs, siue in casualibus, siue in fortuitis nec de se intentis. Sed nec aliquid Deus facere potest, quin sub ordinem suæ prouidentiae cadat; sicut non potest facere aliquid, quod eius operationi non subdatur. Extendit igitur se prouidentia diuina ad omnia & singula, etiam vsque ad hominum cogitata. Qua de re Scriptura, iuxta illud primæ Petri 5. *Omnem sollicitudinem vestram projicientes in eum, quoniam ipsi cura est de vobis.* Et rursus Propheta: *Iacta cogitatum tuum in Domino, & ipse te enutriet.* Et Ecclesiastici secundo: *Respicite filij hominum, & scitote, quia nullus sperauit in Domino, & confusus est; perman-*
sit

1. Pet. 5.

Psal. 54.

Eccli. 2.

fit in mandatis eius, & derelictus est. Et Dominus ait: Nolite solliciti esse, dicentes: Quid manducabimus? Quidquid ergo, & quantumcumque magnum à Deo sperare possumus, erimus sine dubio accepturi, secundum illud Deuteronomij: Omnem locum quem calcauerit pes vester, vester erit. Quia quantumcumque desiderare quis poterit, tantum est accepturus: & quatenus fiducia pedem porrexerit, eatenus possidebit. Vnde Bernardus: Auctor omnium Deus tanta abundat visceribus pietatis, ut ad quantamcumque gratiam fiducia sinum extendere poterimus, tantum erimus sine dubio accepturi.

Math. 6.

Deut. 11.

Vnde Marci 11. *Quacumque orantes petitis, credite quia accipietis, & euenient vobis.* Porro quantò hæc fiducia in Deum fortior est & instantior, & quantò in Deo cum humilitate & reuerentia se violentiùs erigit; tantò securiùs, & abundantius, & citiùs, quod sperabat, impetrabit ac obtinebit. At verò, si inter hæc propter multitudinem & magnitudinem peccatorum fiducia in Deum se erigere tependo retardat; animaduertat qui huiusmodi est, quòd

Marc. 11.

omnia possibilis sunt apud Deum : & quod vult , necesse est quòd fiat ; & quod non vult , impossibile est vt fiat : & quòd tam facile est ei , tam innumera-
abilia peccata , quantumcumque enor-
mia , remittere & delere , sicut vnum
peccatum . Et sicut peccator non potest ,
quantum in se est , ab innumerabilibus
peccatis surgere , & se ab eis excutere
& absolvere , sic nec ab vno peccato .

2. Cor. 3.

Non enim possumus non solùm face-
re , sed nec cogitare bonum à nobis ,
quasi ex nobis , sed hoc ex Deo est .
Attamen vtique multò periculosius est ,
pluribus irretitum esse peccatis , ceteris
paribus , quàm vno solo : quia nullum
malum impunitum , & cuique peccato
mortali debetur infinita pœna ; & hoc
de rigore iustitiæ , eò quòd quodlibet
tale peccatum sit contra Deum , qui est
actu infinitæ reuerentiæ , dignitatis , &
honorificentiae . Prætereà , secundum
Apostolum , scit Dominus qui sunt
eius . & impossibile est aliquem illorum
perire , inter quoscumque anfractus &
fluctus errorum , scandalorum , schi-
smatum , persecutionū , discordiarum ,
hæresum , tribulationum , aduersitatum ,
atque

atque temptationum qualiumcunque,
 eò quòd numerus electorum suorum,
 & terminus meritorum sit æternaliter
 & immutabiliter ab eo præuisus; in
 tantum, vt etiam omnia bona & mala,
 propria & aliena, prospera & aduersa
 eis cooperentur in bonum; nisi fortè in
 hoc quòd gloriosiores & probatiores
 appareant in aduersis. Securè ergo &
 expeditè cuncta & singula committa-
 mus, plena cum fiducia, diuinæ prou-
 dentia, quæ idcirco permittit mala
 qualiacumque qualitercumque fieri: &
 bonum est, & benè fit, vt sinat ea fieri:
 nec fierent nisi permetteret ea fieri: nec
 aliter nec plus fieri possunt, nisi in
 quantum permittit; quia scit, potest, &
 vult ea in melius conuertere & dispo-
 nere. Sicut enim eius operatione, om-
 nia bona fiunt; sic eius permissione om-
 nia mala, bona fiunt: vt certè ex hoc
 appareat eius potentia, sapientia, cle-
 mentia per reparatorem Christum, mi-
 sericordia & iustitia, virtus gratiæ, &
 defectus naturæ, pulchritudo vniuersi
 comparatione oppositorum, laus bono-
 rum, reproborum malitia atque pœna.
 Similiter in peccatore conuerso con-

60 B. ALB. MAGNI DE ADHÆR. DEO LIB.
tritio, confessio, & pœnitentia, mansue-
tudo Dei, pietas, & charitas, lausque
eius, & bonitas. Non tamen eis semper
cedit in bonum, qui malè agunt: sed ut
communiter in periculum magnum, &
maximum malum, priuationis scilicet
gratiæ & gloriæ, & incursionis culpæ
& pœnæ; nonnumquam etiam æternæ,
à qua nos custodiat IESVS CHRISTVS.
Amen.



VITA

V I T A
B. A L B E R T I
DOCTORIS MAGNI
ex Ordine Prædicatorum
EPISCOPI RATISPONENSIS,
C O M P I L A T O R E
R. P. F. P E T R O D E P R V S S I A
eiusdem Ordinis Theologo.

PROLOGVS.



GLORIOSVS Deus in
 Sanctis suis: cuius ma-
 gnitudinis numerus
 non est, cum infinitus
 sit atque incompre-
 hensibilis; ut merito non solum op-
 primi à gloria eius dicantur scruta-
 tores maiestatis temerarij, verum &
 excellentium virorum, licet humiles
 ac sancti perspicacisq; ingenij fuerint,
 reuerberentur obtutus: ne dicam ip-
 sum intueri, sed & illius verborum
 celsitudinem, quæ tamquam radij ex
 luminis fonte prodeunt, capere non
 prævalent; adeò quòd summa cum ad-
 miratione clamare habeant Prophe-
 ticum illud: Mirabilis facta est Psal. 138.
 scientia tua ex me; confortata est,
 & non potero ad eam. ipse tamen,
 cuius natura bonitas, qui vult saluos
 fieri

fieri omnes, & ad sui agnitionem venire, non destitit mysteria nobis multa de se salubriter reuelare; cognitum ut coleremus, colendo amaremus, amando beati essemus. Et quia inuisibilis est, inhabitans lucem inaccessibilem, infirmitati nostræ ut pius pater consulens, copiosa gratia sua, viros magnos in Ecclesia ut montes eleuatos per virtutum cacumina, ac illuminatos mirabiliter scientia statuit, per quos ad excelsum illum gigantem ipsorum vestigiis inherendo adscendere, doctrinis etiam illuminati, ut per lucidissimas nubes Solem iustitiæ utcumque intueri possemus. Reuerà enim Deo proximior existit omnis qui montium horum arduis bonæ actionis pedem infixerit: & iterum, cui tenebræ ignorantie lumen intelligentiæ excluderant, his luminosis illuminatus montibus, illicò Deo in gratiarum actione; Illuminans tum mirabiliter à montibus æternis,
lata-

letabundus exclamat. E quibus sanè
montibus venerabilis ille Pater Fra-
ter Albertus Prædicatorum Ordinis,
Ratisponensis quondam Ecclesiæ Epi-
scopus, non minima sanctitatis cul-
mine excreuit: qui ab ipso puerili ævo,
ut ipse testatur, ad decrepitam usque
ætatem iugum Domini mira cum hi-
laritate in eodem Ordine portauit; ex
primis Patribus existens præcipuus,
primitias Spiritus habens, quemad-
modum de ipso testantur, qui illum in
carne adhuc manentem viderunt,
conuersationisq; ipsius insignia sunt
experti. quare & posteris ea quæ no-
uerant per scripta intimare non du-
bitarunt, gloriosèque eundem extol-
lere laudibus voluerunt, quem ce-
teris constantiorem nullo posse adu-
lationis vento inflecti certa scien-
tia probabant, sicut prosequuntur
eius contemporanei in verbis, quæ
infra scripto commendare dignum
duximus.

Quan-

Iob 1.

Quanta vera sapientiæ copia ac doctrina radiis Ecclesiam illustrat, non tam hominis stylo, aut disertissimæ eloquentiæ coloribus effari, quàm suis codicibus valet cognosci. Unde quia magnus vitæ & doctrinæ extitit, non incongruè illud in libro Iob exaratum ipsi adscribere possumus, dicentes: Erat vir ille magnus inter omnes Orientales. In quibus verbis venerabilis, imò; ut credimus sine hesitatione; beati Alberti laus cunctis aptissimè insinuatur mortalibus. Cùm enim Orientales, sacro testante eloquio, hi dicendi sunt, in quibus lumen gratiæ Dei principaliter fulget; sacrorum verborum expositorem hunc singularem Albertum, & panè primum inter modernos, qui antiquis sanctissimisq; Doëtoribus doctrinando ac sanctè conuersando simillimus est, aptè Orientalem nominamus: maximè cùm Matris gratiæ Mariæ sit scriba eximius, atque familiarissimus

*mus confabulator ; quæ nobis virum,
cui nomen Oriens est , edidit ad salu-
tem. Tantò enim gratia plenior cre-
dendus est , quantò familiarior per
devotionem , huic quæ plena est gra-
tia, fuisse cognoscitur;prasertim cùm
suo tempore vberior gratia Fratri-
bus cunctis de Prædicatorum Ordine
à misericordia Patre largiebatur. In-
ter quos erat vir ille magnus , vir
utique virens & germinans , quasi
lignum viride iuxta decursus aqua-
rum plantatum , perfectione animi
viriliter contra bifformes fortune
insultus uniformi constantia mentis
militans , nec aduersitate pusillani-
mis , nec prosperitate elatus, in tan-
tum fortitudine dotatus contra tela
inimici & tentationum, atque ad Or-
dinis onera portanda , ut giganteos
diceretur habere humeros in omnibus
his , iuxta veridicum testimonium
venerabilis Patris Fratris Humberti
Magistri Ordinis. Cruce etiam arma-
tus,*

tus, malignis terribilis, ut unico obiectu salutiferi signaculi hostem in specie Fratris apparentem prosterneret, qui studio eius aduersabatur fructifero. Insuper hæreticorum massa, Apostolica doctrina munitus, erat malleus inflexibilis. Demonstrabilis proinde ille in omni claritate, quod ipso demonstratio optimè designatur, quia in consilio impiorum non abiit, nec in peccatorum stetit via: qui & pestilentia cathedram non ascendit, sed montem excelsæ atque perfectæ iustitiæ in omni virtute aggressus est; unde serpentum sibilos virulentos, ut visione monstratum est mirifica, conatusq; reprobos suo spiritu eliminavit de sanctuario Ecclesiæ. Quare rectissimè nomen magnitudinis meruit. Is namque verè magnus est, qui vniuersaliter inclutus habetur; quem nullus veris diuitiis, nullus morum honestate, nullus solemnitate famæ, nullus spectabili-

tate

tate ob eloquentiæ doctrinæq; splendorem præcedit; ut magnificari super vniuersos possit, dum omnibus superior inuenitur. Erat sanè talis iste Beatus, non pro parte aliqua temporis tantum in præterito, sed ita progrediens atque succrescens per continuum præsens vsque in illud futurum, quo NVNC aternitatis cum Deo viuendo est ingressus; tantò illic iam Omnipotenti vicinior, quantò hic olim carnem vegetans semper erat virtutum donis præsentior; tantò iam sublimior, quantò in mortali vita humilitate abiectus sibi videbatur vilior. Huius igitur sancti viri famam celeberrimam cum in orbe toto omnes proclamant, delectatq; vniuersos loqui vel audire de ipsius magnitudine, ob doctrinæ singularitatem, atque bonorum operum qualitatem; in tantum ut simplicissimi in omni mundi angulo gestiunt sine discretionis iudicio narrare de ipso, falsa

falsa pro veris assumentes; nec absque laude pronuntiant Alberti, quidquid fingere de illo possunt. Alij autem plurimum pra desiderio nosse capiunt conditionem eius, non solummodò qualis per scientiae habitum vsumque fuerit, sed & de religione, sanctitate, statu, quâve aetate temporis hoc in mundo conuersatus est, atque morte qua hinc transiit, & miraculis, requirunt; pro indubitato habentes, sanctissima hunc fuisse conuersationis, cui singularem spiritum affuisse, ex scriptis suis Theologicis sciunt: scientes quòd sicut Hierotheus passus diuina; diuina didicit; ita pari modo Albertum docere tam copiosè non ob aliud posse diuina (praesertim cùm illius eloquium incendium parit plurimum diuinae dilectionis in nostris cordibus) nisi & ipse vehementer amore illo, qui otiosum in bono permanere sinis neminem, fuisset affectus: ex abundantia

dantia enim cordis os loquitur,
& bonus homo de bono corde profert bona.

Vnde illorum desiderio satisfacere cupiens iuxta mei ingenioli qualitatem, compilare in vnum venerabilis istius viri Legendam placuit. Sed ne quispiam de veritate dubitare horum quæ scribo possit, nosse debet quilibet Lector, quia non leuitate aut suspitione hæc confecta, sed à fide dignis dudum antè notata in codicibus sunt, illo in tempore quo testibus probari poterant; imò pro maiori parte adhuc illo viuente scripto fuerunt commendata. Qui autem Scriptores omnium horum sunt, & qui libri vnde sumpta, breuiter subiungendum est. In primis namque Frater Thomas Brabantinus, Ordinis Prædicatorum, ad multos annos Alberti discipulus dum viueret vterque in hac vita; qui Thomas librum de Naturis rerum conscripsit, & alium librum de Apibus
inti-

intitulatum, quem Bonum uniuersale nominat, composuit, quem Magistro Humberto Generali Ordinis Prædicatorum misit, à quo & confirmatus est, auctoritatemq; sumpsit: in hoc siquidem Libro ait de Prælati & subditis, aliisq; multis, puta de Alberto, Iordane, atque Ioanne, sanctissimis viris Prædicatorum Ordinis, ac ceteris Sanctis qui sua ætate floruerunt. Hic Liber notus est multis, præcipuè in Alemannia partibus. Secundus autem est Frater Vlricus Engelberti de Argentina, eiusdem Ordinis, aquè Alberti discipulus sicut & primus: qui ambo ad pedes tanti Magistri didicerunt sapientiam, ut ipsimet testantur. Tertius verò est Frater Bernardus in castris sancti Vincentij, ibidem Prior Fratrum, contemporaneus Alberti, ut ipse dicit qui Chronicam Ordinis scripsit ab initio Ordinis usque ad sua tempora fideliter. Quartus est

est compiler Legenda beati Thomæ de Aquino, ex qua nonnulla hîc posita sunt. Cetera autem ex Vitis Fratrum Ordinis Predicatorum, cui Libello Magister Ordinis Humbertus auctoritatem tribuit, sunt scripta: & quadam ex Legenda sanctæ Cordulæ virginis & martyris, quam venerabilis Albertus transtulit de pomerio in ecclesiam sancti Ioannis: aliqua etiam ex reuelationibus alterius virginis Sanctimonialis. Insuper & testimonia adducta multa ex propriis scriptis eiusdem Doctõris. Omnia verò alia in Legenda ipsius Alberti continentur, quæ apud nos Colonia & multos Conuentus Ordinis nostri inuenitur. Sunt tamen quadam etiam ex Actis Capitulorum Prouincialium Teutoniæ prouinciæ, eodem existente Prouinciali, transumpta. Et hæc omnia si de ipso scripta non fuissent, doctrinæ tamen ipsius de sanctitate magnum nobis &

D

certum

certum reddunt testimonium. Magis enim nobis de beati Bernardi sanctitate & mirabili deuotione persuadent eius dicta, quàm mille miracula, dum quamdam vultus interioris pulcherrimam similitudinem efficacius quàm signa legenti representant. Et cui non probant beatissimi Augustini ignita eloquia, hunc gessasse cor iaculo diuinæ charitatis transfixum? Sic proculdubiò si Alberti quis legerit dicta, sentiet quanta spiritus eius gesserit, & quòd nuptiali veste semper fuerit circumdatus non dubitabit. Et quamuis plura alia laudabilia de hoc venerabili referre possemus Doctore, non tamen necessarium ea ponere fuit; ne fortassis veritatis amatorem & defensorem opinionibus incertis videremur laudasse: hæc autem scribendo notare volui ad honorem Domini nostri Iesu & gloriosissima Virginis Mariæ immaculatæ eius Genitricis,
atque

atque excellentissimi Doct̃oris laudem, qui sua intercessione apud vniuersorum Dominum & Iudicem, in illa hora qua ante tribunal stabimus iudicantis, excusatos nos habeat ab omni quam nostris excessibus contraximus culpa; ne fratrum accusator, noster insatiabilis inimicus, praeualeat, magis autem confusus atque damnatus abscedat. Sic insuper agatur, vt corona iustitiæ vnà cum electis in æternum victuris nobis doneatur. Amen.

Quòd si cui visum fuerit vt aliqua addat his quæ iam dicta sunt, non hoc faciat inconsultè aut ex abrupto, nisi sciat de veritate, & constet vbi contineatur, vel à quo scriptum habeatur. hoc enim maximè in hac Legenda tenui, ne aliquid ponerem ex vaga relatione vel suspitione: quod & quilibet perpendere potest: vnde & notare volui, quo anno ab Incarnatione ipse Ordinem

*est ingressus, à quo tempore obiit, vel
ea quæ notata sunt quando perfe-
cerit, seu quando gesta sint quæ de
ipso narrantur; ne alicui suspicio de
his quæ scribo sinistra generetur:
non enim Sancti nostris delectantur
mendaciis, qui iam veritatis lumen
sunt adepti.*



VITA

V I T A
 B. A L B E R T I
 DOCTORIS MAGNI
 ex Ordine Prædicatorum
 EPISCOPI RATISPONENSIS.

CAPVT I.

*De pueritia eius, & qualiter à beata
 Virgine in visione admonitus sit
 vt Ordinem intraret Fratrum
 Prædicatorum.*



ADMINISTRANTE per
 orbem Rempubicam
 Friderico huius nomi-
 nis Secundo, floruit
 in sacro Prædicatorum
 Ordine gloriosus Pa-
 ter Frater Albertus Magnus, Doctor
 egregius almæ Vniuersitatis Parisiens-
 sis, decus & splendor Ecclesiæ vniuers-
 D 3 salis,

salis, in qua ut miles strenuus fidei cly-
peo protectus, verbi Dei insuper gla-
dio accinctus, hæreticorum conuentus
zelo Dei succensus potenter deiecit.
Hic de militari cum esset progenie, na-
tione Alamannus, ex Laugingensi op-
pido, Prouinciæ Sueuiæ, Augustensis
diœcesis, à pijs parentibus viam Do-
mini à pueritia esse doctus, traditus ab
eisdem litteris imbuendus. Cum autem
sedecim ferè esset annorum, & die qua-
dam ecclesiam ingressus, innocens puer
spiritum suum ad orandum virginem
gloriosam Mariam, cuius à puerili æuo
vsque in finem suæ vitæ amator extitit
feruenter & laudator præcipuus, colle-
gisset, statum suum toto mentis affectu
humiliter recommendat, flagitans ip-
sius patrocinium. Et ecce illa cæli Re-
gina, Domina mundi, quæ sui memo-
rum immemor nequaquam existit, ap-
parens Alberto, placido vultu dixit:
Alberte, mundum fuge, Prædicatorum
ingredere Ordinem, quem pro mundi
salute nouissimis dirigendum tempori-
bus à Filio meo expetij. deuotioni à
studio efficaciter intende; nam Deus
tanta sapientiæ suæ copia te dotabit,

ut tota Ecclesia per doctrinæ tuæ libros illustretur.

CAPVT II.

Quòd Ordinem intrauit in iuuentute, ex propriis verbis ipsius habetur: & de modo quo ingressus est, & qualiter à beato Iordane vestitus Padua.

TALI itaque Virginis gloriosæ animatus sponſione, puerilia rudimenta in Grammaticalibus adeptus est studio insistendo, suæ interuentrici non ingratus, assiduum illi obsequium quàm deuotè impendebat. Sed prudenter animaduertens secum has fallacias, nec tutum fore cohabitare serpenti, diuinis monitis acquiescens, Prædicatorum Ordinis habitum, ne talentum sibi creditum cum seruo pigro in terram abscondere videretur, multa cum deuotione suscepit. De qua susceptione ita in Libro qui Vitas-Fratrum Ordinis Prædicatorum inscribitur, parte quarta cap. x. narratur: *Dominus Albertus*

fama eximia & excellentis status & scientia, magnus in Philosophia, cum adhuc iuuenulus Padua studeret, ex admonitionibus Fratrum, & maximè ex predicationibus Magistri Iordanis, habebat voluntatem intrandi Ordinem Predicatorum, sed non plenam; auunculus enim eius contradicebat illi: unde & iurare ipsum compulit, ne infra tantum tempus iret ad domum Fratrum Predicatorum. Post quod transactum veniebat frequenter ad Fratres eosdem, firmabatque propositum: sed timor ne exiret, faciebat eum vacillare multoties. Quadam autem nocte vidit in somnis quòd intrasset Ordinem, postmodumque exisset. euigilans ergo, mirabiliter gauisus est, eò quòd non intrauerat; in animo suo dicens: Nunc video quia id quod timebam inde eueniret si umquam intrarem. Contigit autem eodem die eum interesse sermoni Magistri Iordanis, qui inter cetera loquens de tentationibus diaboli, dixit quam subtiliter decipiat aliquos. Sunt enim, ait, aliqui, qui relinquere mundum proponunt, & Ordinem intrare; sed diabolus eis impressiones facit in somnis quòd intrant & postea exeunt, equitantes in rubeis vestibus, vel se solos derelictos inueniant;

ueniant; ut sic scilicet eis incutiat timorem intrandi, quasi perseuerare non possent. Tunc inuenis miratus vehementer, post sermonem Magistrum accessit, & ait: Magister, quis reuelauit cor meum vobis? exposuitque Albertus omnes suas cogitationes & somnium Magistro Iordani; qui firma de Deo percepta fiducia, multis monitis confortauit eundem contra tentationem iam dictam. Ad verba ergo eius Albertus ex toto conuersus, & omnem moram rescindens, Ordinem Predicatorum est ingressus. hæc ibidem.

Quòd verò Paduæ studuerit, ipse Albertus propriis verbis suis simplicitè insinuat in suo Libro de Natura locorum, distinctione tertia cap. secundo; vbi trinitates terrarum enumerat, de ipsa tamquam sibi nota ait sic: *Patanium, quæ nunc Padua vocatur, ciuitas est in qua floruit studium ante paruum tempus.* Sic pariformiter & apertius in tertio libro Meteororum, capitulo duodecimo secundi Tractatus, patet ipsum ibidem habitasse in studio, quia sic ait: *Ego autem vidi in Paduana ciuitate Lombardie, quòd putens ab aliquo tempore clausus inuentus fuit, qui cum aperire-*

tur, & quidam intraret ad purgandum puteum, mortuus fuit ex vapore cauernæ illius; & similiter mortuus est secundus. & tertius voluit scire quare duo moras agerent, inclinans in puteum, adeò debilitatus est, quòd spatio duorum dierum vix rediit ad seipsum: cùm autem expirasset vapor putrefactus in puteo, factus est bonus & potabilis. Hæc ille loco iam allegato. Si enim non ibi tunc temporis habitasset, non utique dixisset se hæc vidisse, quæ successiuè non vno die contigerunt.

Nec utique in dubium venire alicui potest, quin iugum Domini suave in iuuentute assumpserit per Religionis ingressum, cùm hoc idem Albertus suo testimonio clarisque verbis exprimit in Orationibus Dominicalibus, de quibus infra dicetur. Nam in Oratione circa Euangelium Septuagesimæ, videlicet,

Matth. 10. *Simile est regnum celorum homini patri-
familias; ita orationem fundens ad Do-
minum, ait: Domine Iesu Christe, summe
paterfamilias, qui me primo manè in vi-
neam tuam vocasti, dum me à iuuentute
mea ad laborandum in Religione pro de-
nario vite æternæ conduxisti: cùm serò fa-
ctum*

Etum fuerit in Iudicio, & reddes operariis mercedem, quid dabis mihi, qui non solum in foro seculi, sed in ipsa vinea Religionis tota die vitæ meæ otiosus steti. Domine, qui non ponderas opera nostra ad pondus publicum, sed ad pondus Sanctuarij, fac me saltem in undecima hora resipiscere; ne quia tu bonus es, oculus meus omnino nequam inueniatur. hæc Albertus.

Qualiter autem venerabilis Albertus Coloniensi Conuentui sit assignatus, licet Paduæ indutus, facile perpendi potest. Prædicatorum enim Ordo nouiter tunc institutus, multiplicandis Conuentibus & personis congruis insistebat; & ideò Fratres Nouitij, vbicumque vestiti fuissent, nouis Conuentibus ob defectum personarum assignabantur, maximè si de lingua terræ illius in qua recipiebantur non fuissent. sicut Frater Henricus de Colonia, ibidem primus Prior; similiter & Frater Leo, eidem in Prioratu successor; licet Parisiis cum beato Iordane ambo habitum receperint anno Domini m. cc. in die Cinerum: Coloniæ tamen mittuntur, quia Teuto-

nici erant, vt nouum Conuentum adificent. Sic pari modo Albertum à Padua missum Coloniam non dubitamus: quod verbis sequentibus ex Vitis Fratrum euidenter ostenditur. Illo enim in tempore, sanctissimo Patre Dominico cælis inuecto, beatus Iordanis Teutonicus, verus Israëlita, in Magistrum Parisiis est electus, anno Domini M. CC. XXII. qui quantus qualisque fuerit, in Vitis Fratrum Ordinis clarè describitur: vbi inter alias eius virtutes habetur, quòd plures quàm mille ad Ordinem traxerit Fratres: dilatauit enim iste gloriam gentis suæ. De quo consequenter ibidem ita habetur: *Frequentabat hic Pater beatus ciuitates ac villas, vnde Quadragesimam vno anno Parisiis, alio Bononiæ faciebat. Tunicas verò fieri faciebat, fiduciam habens in Deo quòd Fratres ei idoneos pro dilatatione mitteret. Multoties autem tot & ex insperato intrabant, quòd vix poterant pro induendis vestes inueniri: quos conuenienter instructos diuersis domibus deputabat: de quorum numero plures fuere postea Regentes in Theologia.* Receptus igitur tunc temporis Albertus à iam memora-

to Magistro Iordane, Prædicatoris collegio est hinc sociatus in Agrippina Colonia, vbi paulò antè Prædicatorum Ordinis Fratres ecclesiam sanctæ Crucis cum Hospitali & cappella sanctæ Mariæ Magdalenæ ad inhabitandum à reuerendissimo Domino Archiepiscopo Domino Engelberto Primo gratiose susceperant, anno videlicet Domini M. CC. XXI. post secundum Capitulum Bononiæ per beatum Dominicum celebratum.

CAPVT III.

Quòd oratione magis adeptus sit scientiam quàm studio & labore, & quòd præcipuus fuerit inter deuotiores Fratres.

ALBERTVS igitur, vt infrà clariùs patebit, per visum ad studium & Religionis amorem à gloriola Virgine Maria animatus, feruentissimè studens, puritati mentis litterisque non segniter operam dabat. Erat enim modus ipsius primò oratione & deuotione mentem

ad alta diuinorum sustollere, vt scientiam illam quæ mirabilis est & confortata, ad quam non poterat humanus intellectus pertingere naturaliter, gratia cooperante deuotionis posset inuenire efficaciter. Testabatur autem nonnumquam discipulis, ea sæpiùs oratione impetrasse, quæ aliàs labore & studio capere non valuit. Quare & in principio Summæ suæ, de mirabili scientia Dei ita dicit: *Oratione & deuotione plus acquiritur in diuinis scientiis quàm studio.* illud Sapientiæ dictum pro confirmatione inducens: *Optaui, & datus est mihi sensus; & inuocaui, & venit in me spiritus sapientiæ.* quasi diceret: Optaui deuotione, inuocaui autem assidua oratione: *diuina namque sapientia imprimitur nobis, nobis ascendentibus ad Deum & ad ipsam sapientiam, sicut cera ascendit ad sigillum, & non e conversò.* hæc ille.

Tantus, vt ait Magister Humbertus, tunc feruor Fratrum in Ordine fuit, quòd nullus enarrare sufficiat: siquidem spiritus vitæ erat in rotis, cuius virtute animalia ibant & reuertebantur, & eleuabantur secundum voluntatem

Sap. 7.

tem spiritus dirigentis. Sed inter hos iste Albertus mirabiliter fulsit: vnde tres viri præclari vita & scientia, qui ipsum nouerant, fidele testimonium dant suis in scriptis. Humbertus inquit de ipso in Epistola, quòd maximè diuinam Scripturam & puritatem conscientiae amauerit, haberetque giganteos humeros ad quæuis onera Ordinis sustinenda; & his similia de ipso prosequens. Thomas autem Brabantinus in libro Apum ait de eodem Alberto, quòd non mirabile cuiquam videri debeat quòd supra hominem in scientia profecit, qui tam perfectus in virtutibus fuit. Vlricus autem in Summa de Alberto ait: *Adeò diuinus fuit Albertus, ut congruè nostro tempore stupor & miraculum dici possit.* Ecce testimonia credibilia nimis ab ipsis prolata, qui vitam viri familiariter nouerant: Humbertus enim Magister Ordinis tamquam Superior; alij verò duo Fratres, uti discipuli.

CAPVT IV.

*Quòd adhuc iuuenis existens habuit
notitiam naturalium rerum ; &
quòd vulgari vocabulo Philoso-
phus vocabatur.*

IN breui igitur Albertus, supra cun-
ctos suos coætaneos, tam mirabiliter
in studio, Dei cooperante gratia pro-
fecit, vt ab Ecclesiasticis personis vul-
gari vocabulo tunc Philosophus no-
minaretur. Ab ipsa enim iuuentute sua,
omnium scientiarum sæcularium api-
cem perfectè est adeptus, vt de occul-
tis in natura, quæ à magnis etiam ne-
sciuntur in Philosophia, ipsi datum sit
veritatis scientiam vlla absque delibe-
ratione proferre in medium, quemad-
modum suis verbis in Tractatu de La-
pidibus habetur, vbi ita dicit: *Volo pri-
mò narrare quæ vidi & expertus sum
ego ipse, & postea ostendere causam &
modum per quem à natura efficitur ima-
go. Dico igitur, quòd me existente Vene-
tiis cùm essem iuuenis, inuidebantur mar-*

mora

mora per ferras ad parietes templi ornandos. Contigit autem in uno marmore iam inciso, tabulis incisis sibi applicatis, apparere pictum caput pulcherrimum Regis cum corona & longa barba: neque in aliquo peccare videbatur pictura, nisi in hoc solo, quod frontem videbatur habere in medio nimis altam & ascendentem versus verticem capitis. Sciimus autem omnes qui aderamus, hoc à natura fuisse pictum in lapide. Cum à me quareretur causa inordinationis frontis, dixi, lapidem illum ex vapore fuisse coagulatum, & in medio per calorem fortio- rem & vaporem inordinatè ascendisse ultra modum. Fuit autem pictura eiusdem coloris cum lapide. hæc Albertus. Vnde probatur, ipsum iam in iuuenili ætate naturalium sciuisse rationes. Quare autem imagines variè ita à natura depictæ inveniuntur in lapidibus pretiosis, ipse idem Albertus in iam dicto libro de Lapidibus plenius prosequitur: de quibus in præsentī non intendimus dicere.

CAPVT V.

Quòd Lector ordinatur in multis locis, in quo officio præ alijs excellentior extitit, non tamen propter scientiam elatior.

AD probitatis ergo honestatem & scientiæ claritatem, quibus ceteris ordinator extitit Fratribus, per maiores suos, paucis ab ingressu Ordinis transactis annis, Lector Fratrum ordinatur: in quo gradu tamquam lucerna supra candelabrum positus, omnibus prodesse studuit, ac si natus omnibus fuisset, in Colonia bis legens gloriose Sententias. In Hildensemensi autem Conuentu, nunc Saxoniae tunc verò Teutoniae Prouinciæ, deinde factus Lector, quia ibidem Conuentus tunc temporis ædificabatur, videlicet anno M. CC. XXXIII. deinde fit Lector in Friburgo: post hoc duobus annis in Ratispona: demum verò in Argentina. At cum vltimò Lector Coloniae ante Magisterium suum Albertus existeret, sancto Thoma post biennium soluto de car-

carcere, missus est idem sanctus Thomas Parisios. Sed non diu post distulit, ut ait Auctor libri Apum, satan insidias spargere adolescenti : instinctu enim fratrum suorum carnalium & amicorum quos habebat in curia, per litteras Apostolicas iterum mandatus est. Venienti igitur mox à Papa præcipitur ut regimen Abbatiae montis Cassini susceperet, & in Ordine suo & habitu præesset officio. Noluit ille; & clam prolapsus à curia fugit, & in Coloniam Agrippinam venit, studuitque in loco illo, quousque præclarus Lector Fratrum ibidem Frater Albertus Parisios est translatus, & pro incomparabili scientia Theologiae cathedram sortitus est. hæc in libro Apum.

Verè Lector præ ceteris clarus fuit iste Beatus, singulariter planè edoctus à scriba velociter scribente, cui proprium est non tantum bonitatem & disciplinam, sed & scientiam his parare, qui humiles esse didicerunt, non inflati sensu carnis suæ: nam humilitas omnium virtutum custos & fundamentum, in mentis eius domicilio firmissimam sibi sedem collocauerat; ut quàm
magnus

magnus in scientia & singularis fuerit, tamen superbia, quæ comes sæpenu-
merò scientiæ solet fieri, dominari illi nequaquam poterat. Vnde non tantum cum in minori gradu legeret, verum etiam iam Doctoratus honore sublimatus, vel Pontificali auctoritate cunctis præstantior, sanctitate insuper vitæ dum polleret, labe criminis quæ animam inuoluit tenebris carens, necnon gloriosæ Virginis Mariæ æternæ Sapientiæ matris laudator insatiabilis ac confabulator mirabilis effectus, non maioris præsumptionis nec elatior effectus est; imò quantò magis addebat intellectui scientiam, tantò in veræ humilitatis virtute incrementum sumebat & gratiam. Et ideò, sicut Gregorius Dictatum suum fursur nominat, sic iste ea quæ scribit minùs digna ad legendum à magnis, quamquam magna sint, reputat: quemadmodum in Prologo sui libri de Laudibus Virginis gloriosæ insinuat; vbi post multa verba suam ostendentia humilitatem, ita concludit, vtique humiliter satis: *Non intendimus, inquit, gloriosam Virginem nostris mendaciis adornare, vel cum stylo altiloquo captio-*

capitioribus intelligentiis aliquid noni aut
magni cudere, & non gloriosam Virginem
laudare, & nosmetipsos ostentare; sed ru-
dibus & simplicibus mei similibus devo-
tionis munus per verba simplicia mini-
strare. Mecum enim benè agitur, quamvis
nihil dignum reputatione, de benedictissi-
ma Domina, tamquam indignus vita &
minimus scientia, si nihil mei pectoris ore
prompsero, si tantum occasionem de ipsa
scribendi & loquendi sapientibus submi-
nistro. hæc ille. Qui similiter in omni-
bus suis scriptis hunc humilitatis mo-
dum servat, ut cum alta mirabiliter
validissimis rationibus sacrae Scripturae
ac Sanctorum auctoritatibus muniens
scriptitat, nulli tamen umquam Do-
ctori præiudicium in suis opinionibus
voluit generare: unde quàm sæpè pro-
prias opiniones ponens, præmittit sic
inquiens: *Sine præiudicio loquor, Salva
pace videtur sic dicendum, Ita cum aliis
Magistris sentio, Hæc opinio videtur mihi
probabilior, & his similia.* in quo modo
scribendi nullus Doctorum ipsi similis
reperitur: arbitrabatur nimirum, ma-
gnæ esse præsumptionis, suam velle
præferre sententiam in talibus quæ sine
peri-

periculo nesciuntur, aut sacra Scripturæ certissimis testimoniis probari nequeunt, vel quæ Sanctorum dictis obuiare noscuntur; quia in iis magis tutum est opinari quàm loqui categoricè, quia diffinitiuæ regula de multis in Sacro eloquio haberi non potest: vir enim hic beatus sanctorum Doctorum collegio se socians, summa cum reuerentia Sacra eloquia tractare studuit; sciens quòd perscrutator maiestatis opprimeretur à gloria: vnde maluit inscius in quibusdam reputari, quàm temerarius diffinitor in periculosis & arduis non necessariis quæstionibus haberi, sicut ex diuersis locis dictorum suorum lucidiùs inuenitur. Sanè mos iste sobrietatis apud sanctos ac veteres Doctores fuit, vt timorem reuerentialem ad diuina eloquia seruantes, nihil temerè diffinire ausi sint. Paulus nempe ad tertium cælum raptus, an in corpore vel extra corpus esset, sub dubio dereliquit, se
2. Cor. 12. autem nescire p̄fiteatur, dicens: *Nescio, Deus scit.* Bernardus mellifluus Doctor præ humilitate sua de Stephani visione loquens, an corporeis vel incorporeis oculis perspexerit Iesum à dexteris

dexteris virtutis Dei, non est ausus determinare. Repleuit ergo Dominus dilectum sibi Albertum non tantum sapientiæ sed & timoris spiritu; ut ostenderetur, quia Unigenito repleto spiritu timoris Domini, is qui humilior multis repertus est, & vicinior in sapientia haberetur, cum spiritus Christi non nisi in humilibus requiescere (teste Isa. 66. Scriptura) solet.

CAPVT VI.

Quòd Parisios mittitur, ubi magistralem cathedram ascendit, & qualiter malignus spiritus per ipsum fugatur signo sanctæ Crucis.

Cum igitur venerabilis Albertus adhuc Lector Fratrum tam excelenter in scientia clareret, mittitur ob spem maioris profectus Parisios. Veniens verò ad eundem locum, legens Sententias cum omnium admiratione solemniter compleuit: erat enim disputator acutissimus, Lector sufficiens, utpote in tali officio iam frequenter exercitatus, & multum facundus eloquio;
mel

mel siquidem & lac in lingua eius, ideoque dulcedinem non modicam discipulorum mentibus infundebat. Tantam etiam copiam scholarium Parisiis fertur habuisse, ut nec schola numerum audientium posset continere: quare compulsus est hac necessitate in loco quodam publico scholasticos exercere actus. unde usque in hodiernum diem platea ipsa, in qua lectionem facere consuevit, lingua Francigenarum *La place Maubert*, id est, Platea magni Alberti vocatur. Studio tamen sic intendebat, ut nec contemplatione scibilium in actiua vita minoraretur, vel actione à diuinorum speculatione esset alienus: sed in utrisque eò perfectior, quò discretionis libramine plus abundabat. Sciebat nempe quo fine studendum esset, nec ignorabat malum fore & damnable, si ea quæ agenda erant ob studij intensionem negligeret. Studium igitur ipsius non turpis lucri causa vel vanitatis, sed summæ virtutis fuit: unde solerter aduertendum est, in quanto perfectionis gradu extitit, cum ipsum humani generis inimicus ab illo studio retrahere conabatur; quod etiam perfectio-

etioribus, vt vitiis implicet, persuadere solitus est. Qui enim studio inuigilant, quamuis recta intentione, superbix tamen iaculo quandoque vulnerantur, cum scientia inflat; aut certè à melioribus bonis vel necessariis nonnumquam scimus retrahuntur : hunc autem, vt subsequens probat tentatio, neutrum læsit. Auctor namque libri Apum, Alberti discipulus, refert in vltimo capitulo secundi Libri nominati, eundem Albertum sibi de seipso retulisse, quòd dum Parisijs in cella residens studio diligenter intenderet, apparuit ei malignus in specie Fratris cuiusdam, vt eum à studio reuocaret. Ille autem mox vt dolum intellexit esse inimici, facto contra eum signo Crucis, umbraticum illud phantasma disparuit : inuidebat enim iam ille saluti plurimorum, qui pabulo doctrinæ viri Dei ad vitam erant nutriendi æternam; & timore anxius seminator errorum, lumine scientiæ, quo Doctor mirabilis fulsit, suas pertimescebat tenebras à multorum cordibus eliminandas; nec sui quidquam in illo ob scientiam superbię persuasor inuenit, cui tam aperta contra-

riari in studio voluit visione, dum ipsum cerneret in humilitate fixum suum aliorumque profectum studio perutili procurare. Magistralem ergo cathedram in Theologica facultate sortitus, in omnibus erat scientiis singularis excellentiæ, vt meritò illud ei dicatur:

*Cunctis luxisti, scriptis præclarus
fuiſti:*

*Mundo luxisti, quia totum scibile
scisti.*

Sed nunc illud etiam inferendum, quod in Vitis Fratrum Ordinis de ipso & aliis Patribus in scientijs & moribus probatis commemoratur, vnde ipsius excellentia euidenter apparet: nam in præfato Libro approbato per Magistrum Humbertum ita reperitur, quòd de Ordine Fratrum Prædicatorum à tempore beatæ memoriæ Magistri Iordanis, qui obiit anno M. CC. XXXVI. Idib. Februarij, vsque ad annũ M. CC. LIX. fuerunt Magistri Licentiati à Cancellario Parisiensi, & actu ordinariè legentes sacram paginam Fratribus & scholaribus infrà nominati Fratres: Rolandus Cremonensis; Hugo Viennensis, postmodum Cardinalis; Ioannes de sancto Ægidio,

Ægidio, Anglicus; Guerricus de sancto Quintino; Gaufridus de Bleuello, Burgundus; Albertus Teutonicus, postmodum Ratisponensis Episcopus; Laurentius Brito, Stephanus Altisiodorensis, Guilhelmus de Stamphis, Ioannes Pungens-asinum, Parisiensis; Bonus-homo Brito; Elias Prouincialis, Florentius Gallicus; Thomas de Aquino, Apulus; Hugo Metensis, Bartholomæus Turo-nensis; Petrus Tarantasiensis, postmodum Innocentius Papa. Hi omnes in Domo sancti Iacobi Ordinis Prædicatorum Parisiis duo & duo legerunt & disputauerunt in Scholis, præsentibus scholaribus & Religiosis, multisque Ecclesiarum Prælatiis, Deo & hominibus gratiosi, multum fructum in Dei Ecclesia facientes. Quamuis nonnulli ex Magistris, præcipuè quatuor, vt narrat Præfatus Auctor libri Apum, fuerint infatigabiles incentores malorum, qui simplicitatem scholarum Parisiis contra dictos Fratres feraliter concitarunt, in tantum, vt nisi se piissimus ac deuotissimus Rex Franciæ Ludouicus & frater eius Comes Pictauiaë Alfonsus pro Fratribus murum posuissent,

sent, abdicatos Fratres rebus & corporibus exterminassent. Facta est autem hæc Magistrorum contradictio anno Domini M. CC. LV. cum legeret in Scholis Frater Bonus-homo, sic appellatus cum socio suo supradicto. Nam ante illum præcipui in scientia fuerunt Hugo Viennensis, Guericus, & Albertus, qui tres ob sanctitatem & scientiam dignis laudum præconiis extolluntur. Cum ergo in tempore illo Hugo ad Prouincialatus officium in Prouincia Franciæ electus, & paulò post effectus Cardinalis; Albertus etiam de Parisiis rediens in Alamanniam, & in Prouincialem Teutoniæ electus; Magistri præfati quatuor malorum incentores odium quod ceperant prius, iam acrius protendebant, dum maiores absentes, qui resistere poterant, viderant. Postmodum autem vnus ex quatuor Magistris aduersarijs Fratrum, nomine Christianus Beluacensis, infirmatus, amarissimo corde contritus, recognouit, se nihil & complices suos contra dictos Fratres habuisse, nisi quòd eis æquari scientia non valerent, & ob hoc eos paruipenderent Auditores, sicut Auctor libri

Apum

Apum apertè suis scriptis testatur. Hic etiam Christianus iam nominatùs condemnatus fuit ab Alberto ob errorem suum, eò quòd dixerat, ante finem mundi Sanctos existere sine peccato originali; & quòd Christus cum eis corporaliter comedens & bibens, liberaret eos ab omnibus malis per mille annos. Quam hæresim dixit Albertus se condemnasse cum aliis Magistris super Matthæum circa illum textum, *Sed libera nos à malo.* vbi eundem præfatum Christianum Beluacensem auctorem huius erroris nominatim exprimit.

CAPVT VII.

Quòd beatus Thomas studuit sub Alberto, & qualiter spiritu Prophetico præuidit beati Thomæ in studio profectum.

TERTIO autem anno Magisterij sui, Albertus iterùm mittitur Coloniæ ad legendum. Factumque est in illis diebus, vt sanctus Thomas iam in Ordine stabilitus, cùm fratres sui carnales ab omni impugnatione cessassent,

mitteretur ad Magistrum Ordinis, videlicet Fratrem Ioannem Teutonicum, quondam Episcopum Bosuensem, ut eidem Thomæ de studio generali prouideret. Quem cum idem Magister Ioannes in filium charissimū in Christo suscepisset, duxit Thomam, ut in Legenda eius habetur, de Parisiis in Coloniam, ubi sub Fratre Alberto, Magistro in Theologia eiusdem Ordinis, florebat studium generale, qui reputabatur in omni scientia singularis. Quod cum peruenisset sanctus adolescens, audissetque in omni scientia profundā & miranda docentem; gaudius est se citò inuenisse quod quæreretur, à quo haurire posset auidius quod sitiret. Cum autem Frater Thomas miro modo taciturnus, orationi & studio, propter quod venerat, sollicitè esset intentus, cœpit Magister Albertus librum de Diuinis nominibus legere, Thomas verò præfatus de Aquino cum alijs lectionem ipsius audire. Quadam autem vice cum scheda, in qua collecta à Fratre Thoma, Magistro allata fuisset, admirans ille discipuli ingenium, & aduertens in ipso tam diuturnum silentium
cum

cum tanta simplicitate & puritate conuersationis; non dubitat quin magnæ alicuius gratiæ occultæ id priuilegium foret. Assignat igitur illi quæstionem difficilem satis, de qua in crastino responderet; cumque ad omnia argumenta soluendo sufficientissimè respondisset, fertur Magistrum Albertum per spiritum prophetiæ sic dixisse: *Vos bonem mutum esse ipsum dicitis, sed talem adhuc in doctrina dabit mugitum, ut totus mirabitur mundus.* Vnde post hoc Magister, sui discipuli probata sufficientia, omnes difficiles actus scholasticos tamquam magis idoneo committit. At verò Magister Albertus cum libros Ethicorum cum quæstionibus legeret, Frater Thomas Magistri lectionem studiose colligens, redegit in scriptis Opus stilo disertum, subtilitate profundum, sicut à fonte tanti Doctoris haurire potuit, qui in scientia omnem hominem in sui temporis ætate præcessit. Hæc omnia in Legenda sancti Thomæ: in qua & hoc sequitur, quòd Magister Albertus præuidens velocem in doctrina discipuli profectum, persuasit Magistro Ordinis, ut Fratrem Thomam

pro Baccalaureo in Parisiensi studio acceptaret, describens ipsum in scientia sufficientem, & in vita probatum. Quanto autem tempore beatus Thomas discipulus Magistri Alberti fuerit, certum non habemus: bis tamen ipsum Coloniae sub Alberto studuisse probamus. Primò enim prolapsus à curia, ut priùs notatum est, studuit Coloniae, quousque ipse Albertus præclarus Lector Parisios promouendus in Magistrum est translatus. Secundò verò, ut iam diximus ex Legenda ipsius, cum post Magisterium Alberti reductus est per Ioannem Magistrum Ordinis Coloniam. Communi autem fama in Coloniensi Conuentu dici solet, beatum Thomam Coloniae sub Alberto nouem annis studuisse; ubi & utrorumque cellæ, in quibus habitauerunt, demonstrantur. Vnde ex iam notatis considerandum est, & Magistri quanta fuerit excellentia & facundia in docendo, simulque quòd Prophetico spiritu clauerit; discipuli & quantus amor discendi, cum hic, ut suum adimpleret desiderium, toties per multarum spatia terrarum, patriæ oblitus, honoribusque

reie-

reiectis, ad hunc singularem Doctorem Albertum, utpote ad fontem sapientiæ, præ alijs Magistris sitibundus ut ceruus non fastidiuit declinare. Creditur etiam absque omni ambiguitatis scrupulo, magnum apicem scientiæ ab Alberto sanctum Thomam sumpsisse; quod euidenter apparet si libri utrorumque inspiciantur: nam reperies frequenter easdem sententias sub eisdem verbis expressas, articulos etiam per omnia sub eadem forma in argumentis & solutionibus positos. Nec hoc derogat sanctitati Thomæ, cum sit humilitatis; nec minor ideò est in scientia, cum hoc ipsum apud Hieronymum inuenies, dum suis dictis quædam ex aliorum Commentariis interserit, ut Ambrosij & Theophili. Sed etiam in hac re formam videmus summæ humilitatis Alberti, qui numquam pænè opinionem ponit propriam, quin Sanctorum dictis ipsam confirmare studet, non mutando verba, ut quibusdam moris est; sed tenorem verborum in omnibus seruans. Notat enim ipse Albertus in quodam passu suorum Librorum, vanitatis amatores reprehendendo, cum dicit: *Sunt*

E s

quidam,

quidam, dum nihil inuenire possant ex se, ea quæ dicta sunt ab aliis, ipsi scribere sub alia forma verborum nituntur. Illos verò collaudat in sua Metaphysica, qui non ad ostentationem, sed pro maiori elucidatione Doctoris cuiuscumque dicta terminando explanant.

CAPVT VIII.

Qua intentione scripsit tantum in Philosophia, & quàm necessarium fuit hoc fieri sua ætate.

ET antequam de Alberti vita prosequimur, alia quoad eius doctrinam sunt præmittenda. In primis igitur notandū, quòd mouere non debet quempiam res ista, quia Albertus non solummodò Sacrarum litterarum lucidissimus est Doctor, verumetiam Philosophorum pænè omnium fidelis interpres, ita vt nullus illi hac in re similis inueniatur. vnde quorundam fortassis falsa imaginatio, vel pūra ignorantia, aut etiam nonnumquam vitiosissima inuidia curiosum ipsum in naturalibus nimis fuisse affirmare præsumit. Sed si
tales

tales vaniloqui prudentium virorum
vigerent ingenio, necnon illius dicta
utili inspicerent diligentia, aut qua in-
tentione, in quem finem, siue qua ætate
sæculi id suo perfecerit excellenti inge-
nio, non canino dente viri Dei famam
rodere ausi fuissent; magis autem illi
gratiarum actiones pro perutili doctri-
na pijs labijs frequentius personarent.
Suo enim tempore hæresis importuna,
ut met testatur, nimium diuersis in
mundi partibus Dominici gregis caulas
fœdauerat: varia insuper superstition-
um germina pullularant: maledictio-
rum turba nigromanticorum, magna
suis falsis miraculis multos fascinauit è
populo, ut Annalium Scriptores com-
memorant. Inter Doctores variæ opi-
niones erroneæ. Sed hi omnes sui erro-
ris non tantum ex Sacris eloquiis malè
intellectis sophisticas sumplerunt pro-
bationes, sed & Philosophicis dictis,
imò naturalium etiam causarum actio-
ne, ea quæ naturali ordine fieri ipsa na-
tura prohibet, quandoque malefici ex-
hibere se mendaciter promittebant, ex
scientijs nimirum Astronomiæ, Ma-
thematicæ, Alchimix, aliisque pluribus

paucissis tunc sicut & nunc notis, suæ
vesaniæ falsam habentes excusationem.
Necessarium ergo fuit, virum in omni
scientia plenissimè edoctum, & expe-
rientijs multarum rerum ignotarum
certissimum, sanctæ Ecclesiæ ad sepa-
randum pretiosum à vili, vt sciretur
quid veritatis aut falsitatis quibusdam
scientijs admixtum esset, ex Prædicato-
rum Fratrum mittere collegio, quibus
omnia probare, & quod bonum est te-
nere, iuxta suæ professionis tenorem
competit. Attendant igitur omnes, to-
tius Philosophiæ Albertum interpre-
tem, non pro curiositate, vt suspicari
fortè quidam possent, fuisse, sed diuer-
sis motum vtilitatibus, vel precibus a-
liorum, tam Fratrum sui Ordinis quàm
sæcularium virorum, qui vtiliter scien-
tiji istis intendebant, quibus scientijs
etiam frequenter studiosus adiuuatur
ad sacre Theologiæ pleniorẽ intelle-
ctum. Vnde in principio libri Physico-
rum sic ait: *Intentio nostra est, in scientia
naturali etiam satisfacere pro nostra possi-
bilitate Fratribus Ordinis nostri, nos ro-
gantibus ex pluribus iam antecedentibus
annis, vt talem librum de Physicis eis com-
ponere-*

poneremus, in quo & scientiam naturalem perfectam haberent, ex quo libros Aristotelis competenter intelligere possent. Ad quod opus licet nos insufficientes reputemus, tamen precibus Fratrum deesse non volentes, quod multoties abnuimus, tandem suscepimus denicti precibus aliquorum: ad laudem primò Dei omnipotentis, qui est fons sapientiæ, & naturæ faëtor, & institutor, & reëtor, & ad utilitatem Fratrum, & per consequens omnium in eo legentium, & desiderantium adipisci scientiam naturalem. Addemus autem alicubi partes Librorum quos vel Aristoteles non fecit, vel si fecit, ad nos non pervenerunt, cum sint tres partes essentielles Philosophiæ, Physica, Metaphysica, & Mathematica. Intentio nostra est, omnes prædictas partes satisfacere Latinis intelligibiles. Primò, complebimus Deo dante scientiam naturalem: deinde loquemur de Mathematicis omnibus, & intentionem nostram in scientia divina finiemus. hæc Albertus. Ex quibus clarè audis suis ex proprijs verbis intentionem suam. Et licet omnia dicta Philosophorum interpretatus est, non tamen ea quæ falsa sunt, vel probabilia videntur, approbare

vult, tamquam aliter esse non possint:
 unde ait in fine Metaphysicæ suæ ita:
*Hic finis Disputationis istius, in qua non
 dixi aliquid secundum opinionem meam;
 sed omnia quæ dicta sunt, secundum posi-
 tionem Peripateticorum: & qui hoc volue-
 rit probare, diligenter legat Libros eorum,
 & non me sed illos laudet vel reprehendat.*
 Item idem in fine libri de Causis sic ait:
*Eligat unusquisque quod vult. Ea enim
 quæ dicta sunt, secundum Peripatetico-
 rum rationes determinata sunt, & non
 assertionibus nostris inducta, & assiduis
 postulationibus sociorum nostrorum po-
 tius extorta quam impetrata.* hæc idem.
 Qui licet Magister esset omnium, Fra-
 tres tamen suos & socios recognoscit,
 quos etiam in libro de Lapidibus so-
 ciorum nomine designat. Quid verò
 sentiat de Philosophia, in fine libri de
 Animalibus insinuat, vbi sic ait: *Iam
 completus est Liber Animalium, & in ipso
 completum est totum opus naturarum, in
 quo sic moderamen tenui, quòd dicta Peri-
 pateticorum, prout melius potui, exposui;
 nec aliquis in eo potest deprehendere quid
 ego ipse sentiam in Philosophia naturali.*
Sed quicumque dubitat, comparet quæ in
nostris

nostris Libris dicta sunt dictis Peripateticorum, & tunc vel reprehendat vel consentiat, me dicens scientia ipsorum interpretem & expositorem. Si autem non legens & comparans reprehenderit, tunc constat ex odio eum reprehendere vel ignorantia, & ego talium hominum parum curo reprehensiones. hæc Albertus. Notandum etiam, quod in Philosophia non tantum proprias ponit opiniones, sed voluit magis explanare sententiam Peripateticorum. unde in tertio libro de Somno & vigilia, Tract. i. cap. xii. ita ait: *Est autem & aliud genus visionis & prophetie secundum altissimos Theologos qui de divinis loquuntur inspirationibus, de quibus nos ad præsens omnino nihil dicimus, eo quod hæc ex Physicis rationibus nullo modo potest cognosci; Physica enim tantum suscepimus dicenda, plus secundum Peripateticorum sententiam prosequentes ea qua intendimus, quam etiam ex nostra scientia aliquid vellemus inducere. Si quid enim fortè propriæ opinionis habemus, in Theologicis magis quam in Philosophicis Deo volente à nobis proferretur.* hæc Albertus loco præallegato. Et ideò notandum, quod multa, in Physicis

cis præsertim, posuit recitatiuè quàm affirmatiuè: nec hoc mirum, cùm idem fecerit Hieronymus & Augustinus in Theologicis ex Platoniorum doctrinis: vnde eos quandoque consueuimus excusare, cùm nobis videantur quædam erronea inseruisse codicibus suis: sicut quandoque inuenies Albertum & Thomam excusantes antiquos Doctores, dicendo quòd non errauerint, sed recitauerint dogmata Philosophorum, in quorum vijs erant enutriti; Platonici enim fuerunt omnes pænè Doctores antiqui.

CAPVT IX.

Qualiter Albertus reprehendit Nigromantiam & alias scientias conterminales Nigromantie, & quòd laudandus sit specialiter ob hoc cum Daniele & Moyse.

INSUPER annotare placet, quàm utilis fuit hic Albertus sanctæ Ecclesiæ, non tantùm in Theologicis & naturalibus doctrinando, verùm & Nigromanticorum dogmata sine culpa inspiciendo

do & refutando: nam magno zelo fidei succensus, Nigromanticorum dicta, vt impugnare eosdem fortiùs posset, sine peccato, imò meritoriè perlegere voluit; quemadmodum Paulus Apostolus apud Athenienses perlustrando aras dæmonum & Poëtarum dicta, ad prædicandum Christum verum Deum, ipso-
rumque errores vt citiùs eliminaret, occasionem sumpsit. Hic enim venerabilis Albertus Speculum Mathematicę composuit, vbi Astronomiæ libros utiles & bonos à Nigromanticis separat, datque intelligere qualiter licita ab illicitis discerni possint. Nigromantici namque per Astronomiam quandoque, vt ait Albertus, fidè dignos se reddunt apud inscios. Inde & aliqui inexperti Astronomiæ libros contemnunt, & tamquam noxios accusant. Sed quid licitum, quid illicitum, quidve suspectum, vel quid dubium esse possit, Alberti doctrinâ aperitur in Speculo iam nominato, quod sic incipit: *Occasione quorundam librorum, apud quos non est radix scientiæ, qui cum sint vera sapientiæ inimici, hoc est Domini nostri Iesu Christi, qui est imago Patris, & sapientia per quam*

quam fecit & sacula, Catholica fidei amatoribus merito sunt suspecti; placuit quibusdam magnis viris, ut libros quosdam alios, & fortè innoxios accusarent. Quia enim plures antedictorum librorum Nigromantiam palliant, professionem Astronomie mentientes, nobiles libros de eadem scientia apud bonos & graues abominabiles reddiderunt. Quare vir quidam Zelandor fidei & Philosophia utriusque, Frater in Ordine suo, applicuit animum ut faceret memoriam utrorumque librorum, exponens numerum, titulos, initia, continentiam singulorum in generali, & qui fuerint eorum Auctores, ut scilicet liciti ab illicitis separentur; & aggressus est ut diceret nutu Dei: Duae sunt magna sapientia, & utraq; Astronomia nomine censetur, &c. hæc verba Alberti initio Speculi præfati, qui ibidem post enumerationem librorum aliquorum ita adiecit dicens: Isti sunt utiliores ex libris Astronomie qui in lingua Latina inueniuntur; Perspectiua enim Aristotelis ad supradicta non descendit specialiter. Et isti sunt libri, qui si aspectibus virorum desideriorum subtracti fuerint, magna pars & valdè nobilis Philosophia erit sepulta, saltem ad
tempus,

tempus, donec scilicet consilio saniori resurgat: quia sicut dicit Thebit filius Chore, non est lumen Geometria, cum euacuata fuerit Astronomia. Et iam sciunt inspectores prædictorum librorum, quod in eis nec etiam unicum verbum inuenitur quod sit vel esse appareat contra fidei Catholicæ honestatem. Neque etiam forsitan iustum est, quod hi qui eos numquam attigerunt, eos indicare præsumant. hæc singula verba Alberti in Speculo; quibus verbis in eodem ita adiungit, dicens: Secunda magna scientia, qua similiter Astronomia dicitur, est scientia indiciorum astrorum. Huic parti supponitur illa pars que est de Imaginibus, de qua dictum est, Astronomia est imaginum scientia. Sed isti partem associantur illi libri maledicti Nigromantici de Imaginibus, præstigiis, characteribus, annulis, & sigillis, eo quod simulationis gratia sibi mutant quasdam observationes Astronomicas, ut sic se reddant aliquantulum fide dignos, quorum venenum in subsequens manifestum faciam nutu Dei. hæc Albertus ubi supra.

Ecce, Lector, Alberti testimonio tibi dictum est, imagines, præstigias, characteres, annulos & sigilla ad maledictos Nigro-

Nigromanticos pertinere; etiamſi aliquid obſerues in huiusmodi de ſcientia Aſtronomiæ, immiſcens bona malis, vera falſis: hæc eſt enim aſtutia diaboli, vt faciliùs decipiat. Sed vt Nigromanticorum ſacrilega ſtultitia clariùs cunctis appareat, alia ex eodem Speculo teſtimonia placet adducere: ait namque conſequenter idem Albertus, ſic inquiens: *Parti autem electionum dixi ſupponi imaginum ſcientiam, non tamen quarumcumque, ſed Aſtronicarum; quoniam imagines ſunt tribus modis. Vnus modus eſt abominabilis, qui ſuffumigationes & inuocationes exigat: quales ſunt imagines Toëth Graci & Garmath Babylo-nienſis, quæ habent ſtationes ad cultum Veneris: quales ſunt Balemim & Hermetis, quæ exorcizantur per viginti nomina angelorum, qui ſubſervire dicuntur imaginibus Luna in circulo eius, & fortè potiùs ſunt nomina: & ſculpuntur in eis ſeptem nomina recto ordine. Subſumigantur etiam pro re bona cum ligno aloës, per quæ proſectò ſpiritus non coguntur; ſed quando Dominus permittit, peccatis noſtris exigentibus, vt decipiant homines, exhibent ſe coactos. Hæc eſt idololatria peſſima,*
qua

quæ ut reddat se aliquammodo fide dignam; observat 28. mansiones Luna, & horas diei & noctis, cum quibusdam nominibus dierum, horarum, mansionum ipsarum. A nobis longè sit modus iste; absit enim ut exhibeamus creatura honorem, debitum Creatori. Est alius modus minùs incommodus, detestabilis tamen, qui sit per inscriptionem characterum, per quadam nomina exorcizandorum; ut sunt quatuor annuli Salomonis, & concaudaria, & tres figura spirituum qui dicuntur principes in quatuor plagis mundi, & Alamanda Salomonis, & Sigillum ad demoniacos; ampliùs, septem nomina ex libro Mahometh, & duodecim alia ex eodem, & rursus nomina ex libro Instructionis qui dicitur Rachielis, scilicet terra, maris, aëris, aquæ, ignis, ventorum & mundicardinum, signorum & planetarum, & angulorum eorum secundum quod singuli in diei & noctis triplicitatibus diversa nomina sortiantur. Hic modus etiam longè sit à nobis, suspectus est enim ne saltem sub ignota lingua nominibus lateat, quod sit contra honestatem fidei Catholicæ. Isti sunt modi imaginum Nigromanticarum, qui nobile nomen Astronomie usurpare præsumunt, & iam
diu

diu est quòd ex eis multos libros inspexi; sed quoniam abhorruí eos, non extat mihi perfecta memoria super eorum numero, titulis, initiis, aut continentiis, vel Auctori- bus eorundem: spiritus enim meus numquam requiescebat in illis; benè tamen volui transeundo vidisse, vt saltem non ignorarem qualiter esset eorum miseris secta- toribus irridendum, & haberem de suo vn- de repellerem excusationes eorum, vel quod potissimum est, vt de consimilibus de cetero non tentarer, cùm persuasiones eorũ inua- lidas, & ideò non admittendas censerem.
hæc Albertus venerabilis in Speculo.

Vt reor autem, clarissimè agnoscis, Lector quicumque, impietatem falla- ciamque Nigromanticorum; insuper & huius viri iusti sinceritatem, cuius spi- ritus intantum abhorruit nefas illo- rum, vt nec quidem transeundo dum voluit vidisse hos libros vtiliter, suam vellet memoriam ijs spurcitijs macula- re. Intelligis etiam, ni fallor, quòd ad plenum Nigromanticorum ora non possunt obstrui, dum nituntur se excu- sare per Astronomiam, nisi redarguan- tur ex proprijs: & ideò ipse Albertus perlegere hos libros voluit, vt sciret qua-

qualiter essent irridendi sectatores ipsorum, & quod potissimum est, ne de cetero disputando cum ipsis Nigromanticis, fallacibus argumentis tentaretur, ut rationes admitteret eorum tamquam concludentes: tentant enim Sophistæ, concludere cupientes, aduersarios suos. Sed plenius ut agnoscas, ô Lector, de imaginibus Astronomicis, ipsum Albertum audi in iam sæpè nominato Speculo, ubi consequenter sic ait: *Tertius modus est imaginum Astronomicarum, qui eliminat istas spurcicias, suffumigationes & inuocationes non habet, neque exorcizationes aut characteris impressiones admittit, sed virtutem nanciscitur ex celesti figura: ut si fuerit imago destructionis alicuius speciei ab aliquo loco, &c. ipsæ sunt imagines Astronomicæ, quarum nominibus se insignant Nigromantica antedicta; & si tacite conditiones Nigromantica sunt, intolerabilis est, sicut & ceteri maledicti, quos nullus sanæ mentis præsumit excusare.* hæc Albertus, qui ibidem in Speculo adhuc de eisdem imaginibus Astronomicis ita adiungit, sic inquit: *Partem verò quæ est de imaginibus Astronomicis, propter vicinitatem*

tatem quam habent ad Nigromanticas, non defendo, nec quidem commendo eas. hæc Albertus.

Notandum insuper, quòd idem Albertus in iam sæpè nominato Speculo de ipsis imaginibus Astronomicis dicit, quòd non debent iniquitatem aliarum portare imaginum, vt sibi videtur: & ratio ibi in promptu habetur, quia in alijs imaginibus est aperta idololatria, vt superius patuit; in Astronomicis autem implicita, & vicinitas est aliqua ad Nigromanticas. & hoc dixit Albertus, vt sciretur gradus malitiæ in istis imaginibus. Ponit deinde venerabilis Albertus in præfato Speculo nomina multorum librorum Nigromanticorum, & qui Auctores eorum, sed & initia Librorum, vt Lectores caueant se ab eis. Sunt autem numero quasi viginti & amplius, inter quos multi subdividuntur in distinctos Tractatus: post quorum Librorum enumerationem in fine ita concludit, dicens: *Sed qui omnium pessimus inuenitur, est Liber quem scripsit Aristoteles ad Regem Alexandrum, & incipit: Dixit Aristoteles Regi Alexandro: Si vis recipere. Et quidam*
vocant

vocant eum mortem anima. Isti sunt libri quos mihi ad memoriam renoco, licet plures viderim ex illis; scilicet de imaginibus quas dixi fieri cum suffumigationibus, invocationibus, exorcizationibus, & characteris impressionibus, qui sunt duo modi imaginum Nigromanticarum. hæc Albertus.

Hic etiam Albertus de eodem Aristotele, inculcando ipsum in secundo scripto, distinctione septima, quæstione quarta dicit, quòd Aristoteles ait in Libro de Mansionibus Lunæ sic: *Quando descendit Selmy, Albethaym fac ad amorem Dominatoris terra, idola conflagra, angelos ad te clama, &c.* post quæ verba in scripto dicit consequenter Albertus sic: *Constat quòd non intelligitur de bonis Angelis, ergo mali faciliùs tunc veniunt quàm alio tempore: Selmy enim idem est quod Luna; Albethaym autem constellatio quedam quæ est in secunda mansione Arietis.* hæc Albertus de Aristotele.

Quare autem dæmones libentiùs sub vna quàm alia constellatione apparent Nigromanticis, dat Albertus in secundo scripto in præfata distinctione tres rationes. Prima, Quia malignus sua
F opera

opera sciens imperfecta, constellatione quandoque adiuuatur in operationibus suis, & sic potentior apparet mago. Secunda, Ne magum vel Chaldaum faciat horrere, dum videatur cælum cooperari sibi in operationibus. Tertia, Quia vellet magum seducere spiritus malignus, vt crederet aliquid numinis stellis inesse, vt sic in apostasiam abducat. Notandum consequenter, quòd Albertus adhuc in eadem distinctione dicit, semper esse in talibus non tantum oris sed etiam operis, & semper fieri contumeliam fidei in characteribus & speculis, etiamsi nulla fiat inuocatio. Hęc omnia tibi, ô Lector, per Albertum narrata cognosce, vt scias impietatem Nigromanticorum, & abhorreas apostasiæ crimen incurrere. Hic ergo taceant præsumptuosè garrientes, qui ita Aristotelem extollere gestiunt, vt dicant non esse dubium quin saluatus sit, cum tamen contrarium clamat Albertus venerabilis & doctissimus vir, ostendens ipsum Aristotelem in præfato Speculo non tantum circa creationem mundi errasse, verum etiam pessimum auctorem Nigromantiæ extitisse.

CAPVT X.

Quòd nemo debet studere Nigromantiam nec magicam artem.

QUOD autem Nigromantiam nemo potest studere propter scire tantum, etiam si non utatur ipsa, probatur per Alberti verba in secunda Parte de Mirabili scientia Dei. In vna solutione dicit sic: *Omnis curiosa & superflua inuestigatio rerum ad sensus interiores vel exteriores pertinentium, reducitur ad concupiscentiam oculorum: studia tamen laudabilium & bonorum, sicut sunt studia liberalium scientiarum, bona sunt, & idè ad malam radicem non ordinantur; sed studia magorum & Nigromanticorum, quia mala sunt & superflua, & ab Ecclesiis interdicta.* hæc ille. Quare & ipse Albertus met de se dicit, ut superius habitum est, quòd eas non studuit, cum studium sit vehemens animi applicatio ad sciendum aliquid; sed tantum transitoriè perlegisse Libros illos se testatur, ut posset reprobare eosdem. quod certissimè peccatum non est, sed virtu-

tis operatio: hoc enim factò caput Goliath proprio amputatum est gladio. Sic & de Daniele legimus sancto Propheta & socijs eius, Danielis primo capite, vbi sic habetur: *Pueris istis dedit Deus scientiam & disciplinam in omni libro & sapientia: Danieli autem dedit intelligentiam omnium visionum & somniorum.* Circa quem Textum beatus Hieronymus sic ait: *Vt de Chaldaorum scientia iudicaret.* Quæ verò fuerit sapientia & doctrina Chaldaeorum, ipse Albertus in sua Postilla super eundem Danielem circa illum Textum vbi dicitur, *Vt doceret eos litteras Chaldaicas,* exponit, sic subiungens: *Scilicet quæ maxime sunt de diuinatorijs scientijs.* constat ergo, quòd Daniel eiusmodi scientias sciuit, sed non exercuit. Et hoc idem beatus Hieronymus suo dicto confirmat super Danielem, circa illum Textum vbi dicitur: *Proposuit autem Daniel in corde suo ne pollueretur de mensa Regis, neque de vino potus eius.* vbi Hieronymus ita adiungit, dicens: *Qui de mensa Regis & vino potus non vult comedere ne polluetur, utique si sapientiam atque doctrinam Babyloniorum sciret esse peccatum, numquam*

quam acquiesceret discere quod non licebat: discunt autem non ut sequantur, sed ut iudicent atque conuincant. quo modo si quispiam aduersum Mathematicos velit scribere imperitus Mathematicus, risui pateat; & aduersum Philosophos disputans, si ignorat dogmata Philosophorum. Discunt ergo ea mente doctrinam Chaldaicam, qua Moyses omnem sapientiam Aegyptiorum didicerat. hæc omnia gloriatus Hieronymus loco præfato. Sed & venerabilis & sanctus Ambrosius huic sententiæ consentit, vbi dicit super Lucam, & habetur in Decreto sic: *Legimus aliqua ne negligantur, legimus ne ignoremus, legimus ut non teneamus, sed ut repudiemus.* hæc Ambrosius. Cum ergo Spiritus sanctus Daniele laudare voluit ob peritiam sapientiæ Chaldaeorum, quæ mala erat in vsu Gentilium; profectò laudandus erit Albertus, qui huiusmodi diabolicam scientiam perlustrare voluit, ut damnaret eandem cum suis Auctoribus. vnde & ipse Frater Vlricus Engelberti de Argentina, Prædicatorum Ordinis Religiosus, & doctissimus vir, Alberti discipulus, Magistrum suum Albertum de tali pe-

ritia commendare specialiter voluit: dicit enim hic Vlricus in sua Summa Theologiæ libro quarto, vbi loquitur de apparitionibus Angelorum, narrando Magistrorum opiniones, de hac re sic concludens: *Aliter autem ab omnibus præmissis sentit Doctor meus Dominus Albertus, Episcopus quondam Ratisponensis, vir in omni scientia adeò diuinus, ut nostri temporis stupor & miraculum congruè vocari possit, & in magicis expertus, ex quibus multum dependet huius materia scientia.* hæc Vlricus. Ecce Frater Vlricus Magistrum de experientia magicarum artium laudare voluit, tamquam si singulare sit bonum, iuxta Apostoli vocem, non ignorare fallacias inimici; nec vtique diuinum hominem Albertum dixisset, si hunc cum peccato magicas scientias iudicasset habuisse. Experientia enim non dicit operationem, sed iuxta Alberti sententiam in tertio scripto distinctione xxiv. experimentum est cognitio in singularibus accepta. Accipimus autem cognitionem particularium quandoque visu, quandoque auditu, vel etiam scripto: sicut consueuimus dicere hunc esse expertum

pertum Confessorem, qui multorum licet peccatorum particularium quoad varias circumstantias non sit operator, ipsorum tamen fuit auditor, & propter aliorum salutem extitit curiosus explorator. Sic & illum in multis malis expertum dicimus, qui paucorum malitias sustinendo, persecutiones & tribulationes est perpeßus, sicut de venerabili Patre Humberto Magistro Ordinis Prædicatorum legitur, quòd fuerit multum expertus, quia multis tribulationibus excoctus: sic & Albertum hunc in omnibus dicimus expertum, quia omnia legendo, examinando, inquirendo, disputando perlustravit. Et quia Albertus perlustrando nugas Nigromanticorum, sacrilegia opera ipsorum iudicabat, benè adiecit in Speculo præfato, ita subiungens de libris Nigromanticis: *De libris Nigromanticis sine præiudicio melioris sententia dico, quòd videtur quòd magis debeant servari quàm destrui: tempus enim fortè iam propè est, quia propter quasdam causas, quas modò taceo, eos saltem occasionaliter proderit inspexisse. Nihilominus tamen ab ipso usu caveant inspectores eorum.* Hæc Albertus;

bertus; qui, vt audis, manifestè interdic-
cit vsum Nigromanticorum librorum:
quare autem, vt ei videtur, seruari de-
beant, superiùs audisti, ni fallor. Et hoc
idem nostro tempore quibusdā sapien-
tibus videtur, qui dicunt vtile fore si
committeretur conscientiosis viris &
iuratis, vt huiusmodi perlegerent li-
bros, eorumque Professores oris sui
gladio interficerent. Vnde & ipse Ma-
gister Ioannes de Grissona, qui contra
Nigromanticos aliqua scribit, in Quæ-
stione quam ponit in fine Trilogij sui;
in quarta propositione sic dicit: *Expe-
diens videtur, si sine periculo abusus ser-
uarentur libri Nigromantici.*

CAPVT XI.

*De gradu malitiæ artium contermi-
natum Nigromantiæ: & quare no-
minatur ab Alberto Garrimantiæ,
& non merentur nomen scientiæ.*

CONSEQUENTER aliorum supersti-
tiosorum sectas conuincit & dam-
nat venerabilis Albertus sui oris spiritu
in Speculo præfato; vnde ait ibidem sic:

Sunt

Sunt praterea quidam libri experimentales, quorum nomina Nigromantia sunt conterminalia; ut sunt Geomantia, Hydromantia, Aërimantia, Pyromantia, Chiromantia; quæ non merentur dici scientiæ, sed potius Garrimantia. Sanè cùm Hydromantia in extis animalium abluendis, inspicendisquæ fibris; & Pyromantia in figura ignis, quo consumitur holocaustum, fieri consueverunt: proculdubio idololatriæ speciem non excludunt. In Geomantia verò nihil talium inuenio, sed confidit in Saturno. & in domino hora, qui ei pro radice ponantur; gaudet numeri ratione fulciri, & sunt multi qui ei testimonium perhibent. Non sic autem de Aërimantia; frivola enim est, licet ratione numeri se iactare præsumat. De Chiromantia nolo determinationem præcipitem ad præsens dare vel facere, quia fortè pars est Physiognomïa: quæ collecta videtur ex significationibus magisterij astrorum super corpus & super animam, dum mores animi conijcit ab exteriori figura corporis. hæc Albertus. Ecce quinque Artes prænominatæ, secundum Albertum non merentur dici scientiæ, ergo nec scientiæ sunt. Verbo igitur isto tibi persuasum sit, quòd nec verorum

sint, nec necessariorum: quid autem potius sint, consequenter Albertus exponit, dicens: *Potius sunt Garrimantia.* Garrimantiæ autem fictitiæ sunt Apollinis vel Pythonis; cuius oracula partim fuerunt vera, partim falsa, quandoque etiam dubia; quod ex Libris Augustini de Ciuitate Dei apertissimè patet, qui dicit, quandoque de Christo & Christianis populis vera, quandoque falsa, imò blasphemias dixisse. Iste Apollo, ut fabulantur Gentiles & idololatræ, inuenit carmina & incantationes ad ægritudines depellendas; & hæc carmina, ut dicebant, habuit ex reuelatione quæ fit etiam pueris, sicut Dánieli: & ideò depingebatur in delubris Gentilium imberbis tamquam iuuenis. Hic autem dæmon quia multa garrere & futura prædicere solebat præ alijs dijs, ideò contingebat ut quandoque verum contingenter diceret, sicut & diuinantes in hoc spiritu immundo aliqua vera dicere consueuerunt, licet multò plura falsa profarentur vel dubia, quæ tamen miseri non attendebant. Quòd autem vera quandoque dixit hic spiritus, habetur Actuum xvi. de puella obuiente Paulo

Paulo

Paulo & socio suo Lucæ, quæ dicebat
Gentilibus per spiritum Pythonem
prophetans ita: *Isti homines serui Dei* Act. 16.
excelsi sunt, qui annuntiant vobis viam
salutis. Hoc autem faciebat multis die-
bis. Et hic spiritus licet coniecturaliter
vel ex reuelatione bonorum Angelo-
rum dicat quandoque vera, seducere
tamen intendit: quare & fictitijs suis
reuelationibus huiusmodi scientias di-
uinituas creditur tradidisse suis cultoribus,
admiscens aliqua obseruanda ex
scientia Astronomiæ, vt minùs appa-
reat falsitas occultata; & ideò rectè de
illis diuinatoribus dicit ipse Albertus
super illud Isaia xliiij. *Et quæ ventura*
sunt, annuntient eis. Quod Mathematici
vel idololatra aliquando annuntiant, ex
coniecturis est & presumptionibus fatuis,
& non ex certitudine. Nominat etiam
ipse Albertus in alio loco Postillæ suæ
hunc dæmonem, Pythonem ventrilo-
quum, quasi ex ventre hominum lo-
quentem, quia per illum diuinant &
garriunt multa. Conuenienter igitur
Albertus huiusmodi fictas scientias à
ventriloquo spiritu inuentas Garri-
mantias appellat, quasi diuinationes

spiritus multum garrientis: nec absque ratione; aiunt enim, hunc Apollinem habuisse filium nomine Garramas; & sic non incongruè etiam sectatores illius Garrimantici sunt appellati, & falsa eorum scientia, Garrimantia. Sed, ni fallor, aduertisti inter quinque præmissas Artes gradum malitiæ ex Alberti verbis: Hydromantia enim & Pyromantia pertinent apertè ad idololatriam; Aërimantia superstitiosa & friuola est, nulla ratione fulcita; Geomantia autem, licet non sit scientia, sed Garrimantia, minùs tamen illicita alijs, quia rationibus quibusdam se videretur defendere; propter quod dixit Albertus, quòd ei testimonium perhibent multi. Sed ipse contrarium sentiens illis, nominat eam Garrimantiam, & conterminalem Nigromantiæ. Imò in Postilla super Ezechielem cap. xxi. circa illum Textum ubi dicitur, *Et manu capiet coniecturam;* ita adiecit Albertus, dicens: *Nam Rex Babylonis stetit in binio, ubi diuiditur via in Ierusalem & in Rabbath Ammon, & dubitans quò iret, inscripsit multas valdè sagittas nominibus terrarum quas expugnare voleat, & sic inscriptas in pharetra casua-*

casualiter commiscuit, ut quancumque commixtarum casuali motu manus comprehenderet, terra illi sagitta inscripta capienda esset: dicunt enim Mathematici, quòd quando homo est sollicitus de statu suo, quòd tunc calum mouet manum, sicut determinatur in Geomantia in proiectione punctorum, dummodò proyiciens manum non moueat; intentio enim excludit motum cali, eò quòd intentio propinquior motus est & fortior, & instinctum cali facit non percipere, & hoc determinatur in scientiis talibus coniecturalibus, quæ sortionales vocantur, quæ tamen interdictæ sunt Numer. xxiv. Non est augurium in Iacob, & diuinitio in Israël. hæc Albertus; qui etiam Isaia xlvi. damnat Geomanticos circa illud, Sta cum incantatoribus tuis. Defeciisti in multitudine consiliorum tuorum. sic enim ait, Textum exponens: Sunt tria adiutoria quorundam hominum, scilicet maleficorum, incantatorum, & Mathematicorum, quæ in veritate non consilia sed stultitiæ sunt; talibus enim innuebantur Chaldaei: Mathematici enim effectus stellarum ad determinatas horas reducere querunt, & à sola scientia Domini separati sunt qui hæc inuestigant. hæc

Albertus. Ex quibus verbis stultitia & præsumptio Geomanticorum reprehenditur, quamvis sibi pro radice ponant Saturnum & dominum horæ. Quare autem Albertus de Chiromantia sententiam præcipitem dare noluit, facillimè deprehenditur ex verbis suis, cùm dixit; *Quia fortè pars est Physiognomia.* & hoc verum est, non quoad illa quæ superstitiosi homines prædicere solent ex figura vel lineamentis manuum, vt nostro tempore faciunt vetulæ quædam, & illi Ægyptiaci qui per totum mundum vagantur; sed vt Philosophi probati de inclinationibus hominum ad mores vel infirmitates per Philosophicas formas membrorum coniecturaliter prognosticantur, nec tamen huiusmodi dispositiones membrorum necessitatem imponunt: de quibus ab ipso Alberto in suo Libro de Animalibus aliqua narrantur, nulla habentia superstitionem, quæ hîc narrare longum esset. Et cùm ita sit, nihilominus tamen Chiromantia non scientia sed Garri-mantia ab Alberto appellata est, eò quòd multa superstitiosa, quædam dubiosa habet admixta. Contermina-
lis

lis ergo secundum ipsum est Nigromantiæ, & non sectanda.

CAPVT XII.

Quòd fascinatio non est naturaliter, sed ministerio demonum fit. quòd autem homines quidam generantur qui mira agunt, raro tamen, per Albertum declaratur.

QVI autem fascinationem defendere nituntur cum Auicenna, qui dixit cum aliquibus Philosophis, quòd anima in tantum posset esse eleuata conceptu mentis & imaginationis, quòd non solum corpora moueat hominum; sed etiam eius virtutis, vt eleuet nubes, & producat pluuias, & ignes faciat coruscare per solum imperium, propter obedientiam quam habet materia generabilium ad huiusmodi animam: & hanc dixerunt potestatem Prophetarum esse, qui signa & portenta ostendunt: audiant Albertum in suo Libro de Motibus animalium, qui dicit omnino falsam esse hanc opinionem, quam etiam ibidem magistraliter impugnat

pugnat & destruit. Hanc eandem opinionem Auicennæ falsissimam etiam impugnat in De somno & vigilia, dicens quòd non potest probari per Philosophiam. Item adhuc in secundo scripto, distinctione vii. ipsam præfatam opinionem recitat & adiungit, sic dicens: *Non approbo dictum Auicenna & Agazel de fascinatione: quia credo quòd fidem firmam in Domino habenti non nocet fasciatio, nec nocere potest ars magica, nec facit aliquid ex ijs quæ timentur de talibus.* Ex his verbis Alberti habes, quòd fasciatio pertinet ad Magos; & quòd aliquando fit, non utique idèd fit, quia hanc homo naturaliter potest, ligando scilicet alium; sed ob perfidiam hominum: qui non firmi in fide timent huiusmodi; tunc profectò non mirum quòd diabolus sit fascinationis operator, mediantibus malis & superstitiosis, quibus diabolus utitur ut instrumento. Et si aliquando homines generantur qui mira agunt, sicut recitat Albertus in præfato Libro de Motibus animalium de duobus geminis suo tempore in Germania natis, quòd ubicumque portabantur ad seras, aperiebantur: & quòd

quòd vnus habuit in dextro latere hoc, frater eius in sinistro : rarò tamen contingit, & qualiter fit, per venerabilem Albertum declaratur, qui ad longum de hac materia ibidem disputat in De motibus animalium.

CAPVT XIII.

Quòd sculpturæ lapidum ad aspectus astrorum sunt prohibita: & quòd imagines sculptæ ad aspectus astrorum non possunt loqui. Insuper de pygmaeis & psittaco aue quæ loquuntur quo modo intelligentur.

DE sculpturis lapidum aliqui se intromittentes, proculdubiò errores periculosos quandoque non euadunt. Vnde sciendum, quòd de eiusmodi sculpturis ad longum determinat hic venerabilis Albertus in suo Libro Mineralium, reprobando primò errorem illorum qui dixerunt, lapides habere animas, eò quòd mirabilia quandoque operantur per lapides. Et quamuis secundùm ipsū in præfato Libro sculptura

ptura lapidum à sapientibus sit tradita qualiter fiat, sicut & de Moyse Petrus Comestor in Scholastica Historia circa secundum Capitulum Exodi, recitat quòd fecerit annulos recordationis & obliuionis per artem, nulla superstitione admixta: Albertus tamen difficultatem artis illius ostendit in libro Mineralium, & postea adiungit sic dicens de hac arte: *Hac autem pauci observant, & pauciores observare sciunt: & dum sine scientia utuntur ad opus artis imaginum, propter fallaciam sue operationis credunt fallere scientiam, & contemptibilem reddunt eandem.* Et dato quòd artem aliquis sciret, quemadmodum & Moyse: non tamen licet Christianis huiusmodi imagines per hanc artem facere, ut patet per Albertum in secundo scripto suo, distinctione septima, quæstione quarta; ubi dicit hanc artem esse prohibitam, & ideò esse malam, quia inclinans est ad idololatriam per numen quod creditur esse in stellis; & quia non sunt inuentæ imagines huius, nisi ad vana vel mala, sicut ad mulieres seducendas, vel seras aperiendas, vel naues immobilitandas, vel terrores inducendos,

dos, & huiusmodi. hæc Albertus : qui tibi in libro Mineralium difficultatem artis ostendit & dicit, quòd omnes suo tempore, qui se de huiusmodi sculpturis nosse dicebant aliquid, omnia abusiue intelligebant. Et si te artis difficultas non prohibet à talium opere, retrahat te prohibitio Ecclesiæ, & quia ad mala vel vana est hæc ars ordinata. Nec te moueat dictum sancti Thomæ in tertio libro Contra Gentiles cap. xc. vbi sic ait : *Manifestum est enim, quòd etiam inanimata corpora quasdam vires & efficacias à celestibus corporibus consequuntur, & etiam præter ea quæ ad qualitates acti-
nas & passivas elementorum consequuntur ; quas etiam non est dubium celestibus corporibus esse subiectas : sicut quòd magnes attrahit ferrum, habet ex virtute celestis corporis, & lapides quidam & herbe alias occultas virtutes.* Hæc Thomas : qui rursus in eodem libro Contra Gentiles cap. ciii. circa finem ita ait : *Quia vera figura in artificialibus sunt quasi forma specifica, potest aliquis dicere, quòd nihil prohibet, quin constitutionem figuræ, quæ dat speciem imagini, consequatur aliqua virtus ex influentia celesti; non secundum*

*dum quod figura est, sed secundum quod
causat speciem artificiatam, quod adipiscitur
virtutem ex stellis. hæc ille: qui iterum
in tertio Contra Gentiles cap. 11. de si-
mulachris dicens, quod non est in ipsis
spiritus, sed sunt opera manuum hominum;
ita addidit, dicens: Non videtur au-
tem omnino negandum quin in prædictis
simulachris ex virtute celestium corpo-
rum aliquid virtutis esse possit, ad illos ta-
men solos effectus quos virtute celestium
corporum aliqua inferiora corpora habere
possunt. hæc omnia beatus Thomas.
Qualiter autem hæc sententiæ sancti
Thomæ intelligantur per venerabilem
dominum Albertum, plenius exponi-
tur in præfato libro Mineralium, & si-
militer in sua Postilla super Hierony-
mum cap. x. de quibus hinc nihil pono
causa brevitatis.*

Notandum insuper est, quod licet
huiusmodi sculpturæ imaginum in la-
pidibus mirabiles virtutes habeant,
non sunt tamen imagines Astronomi-
cæ, de quibus superius dictum est, &
per Albertum sunt reprobata: quamuis
& istæ, de quibus iam sermo est, ad
aspectus astrosum fiant, longè tamen
alius

alius modus est ab illo quo fiant Astro-
nomicæ. Sic ergo patet ex Alberti do-
ctrina, quid de istis sculpturis est te-
nendum.

Hic etiam reprobanda est ex Alberti
verbis quorundam stultitia, qui dicere
præsumunt cum Nigromanticis, quod
quædam imagines fieri possunt per ar-
tem ita artificialiter quod loquantur
voce humana; quod absurdissimum est.
Vnde venerabilis Albertus in secundo
De anima sic ait: *Vox non est nisi haben-*
tis intellectum concipientem intentiones re-
rum, & ideo ad exprimendum conceptum
format vocem. hæc ille: qui rursus in De
animalibus libro XIX. cap. VIII. ait sic:
Soli homini natura dedit virtutem utendi
voce articulata & litterata, qua sermo
vocatur: modi enim sermonis non fiunt
nisi in voce. hæc Albertus. Vnde cum in-
tellectus à solo Deo creatur, nec in ali-
quo organo corporeo sit, secundum
eundem Albertum in multis locis; pro-
fectò constat, nullo modo simulachris
vel imaginibus, quæ opera manuum
hominum sunt, à cælestibus corporibus
intellectivam potentiam posse dari.
Nec valet si quis in contrarium allegare
voluc-

voluerit de psittaco, quæ est avis Indiæ; qui adeò perfectè humana voce loquitur, vt si ipsam auem non videris, hominem loqui putes. Et illud, quòd dum psittacus avis Leoni Papæ pro encænio à quodam mitteretur, in via constitutus inter manus ferentis, huiusmodi vocem replicaret, *Vado ad Papam, ad Papam vado*. Vel etiam illud quòd de Carolo Magno scribitur, videlicet, cum idem Carolus tantum Rex Galliæ esset, & errans per deserta Græciæ, obuiæ essent aues psittaci, & quasi Græca lingua salutauerint eum clamantes, *Imperator vale*; factumque est vt postea fieret Romanorum Imperator, ac si cuiusdam Prophetiæ enuntiatione euentus sit subsecutus. Hæc si obiicere quis voluerit replicando, iam audiat Alberti sententiam vt resipiscat ab errore: ait enim hic venerabilis noster Albertus in secundo De anima, de voce sic prosequens: *Animalia, inquit, plurimum effectuum, sunt plurimum sonorum, & quæ lenioris sunt complexionis; & ideo sunt plurimum garrituum quàm gressibilia; & illa quæ inter aues sunt latioris lingue & melioris memoria, magis imitantur locutionem*

nem & sonos ceteros, quos audiunt: & licet
bruta habent imaginationem, tamen non
mouentur ab ipsis imaginatis secundum
rationem imaginatorum, sed à natura; &
ideò aia similiter operantur. hæc Alber-
tus: qui rursus in præfato de Animalibus
libro xxiii. sic dicit: *Psittacus auis*
latam linguam habet, & ideò optimè for-
mat voces articulatas quando à iuuentute
didicit. Amat hæc auis loqui cum pueris,
& ab illis omnis auis faciliùs addiscit lo-
qui. hæc ille. Non ergo mirum, si auis
psittacus portatus ad Papam Leonem, à
se deferente in via sit edoctus talem
vocem replicare; vel fortè antè ab illo
qui misit auem Papæ, est instructus tale
aliquid cantitare, & iam portatus in via,
ex consuetudine huius vocem replica-
uit. Aues verò obuix Carolo, diuino
iussu poterant, si Deus voluit, ita salu-
tare ipsum qui futurus esset Imperator;
sicut asina Balaam Deo iubente est lo-
cuta, vt ille qui prohibentis Dei vo-
cem, ne malediceret populo Israël, in-
sipienter contempsit, tamquam iumen-
to insipientior, à bestia miraculosè lo-
quente sine intellectu corripereetur. Ait
namque Petrus Apostolus in sua Ca-
nonica

nonica secunda cap. 11. *Balaam ex Bos-*
sor, qui mercedem iniquitatis amavit, cor-
reptionem habuit sua vesania: subiugale
mutum animal, hominis voce loquens, pro-
hibuit Propheta insipientiam. Sic pari
modo congruum fuit, vt Deus saluta-
tionis oraculum per auem industriam à
natura, miraculosè transmitteret Caro-
lo Regi, qui Dei Ecclesiam ab hostium
tumultu magnificè defenderat, & ne-
minem simoniaca labe corruptum per-
miserat Ecclesiasticum regimen assu-
mere: ait namque Papa Gregorius Sex-
tus ita de eodem Carolo: *Erat animus*
Caroli inuictus aduersus auaritiam, nec
facile tunc inuenisset aditum aliquis, nisi
intraffet per ostium. Vel certè si non fuit
miraculosa hæc salutatio, euentu acci-
dit modò. Auis fortè psittacus priùs
capta, & habita in curia Imperatoris
Græciæ, sic ibidem edocta vociferari
consueuerat: iam autem facta libera
casu aliquo, alijs auibus sui generis est
iuncta, quæ vtique addiscere idem po-
terant cantitare ab illa, sicut hæc priùs
didicit; & sic casu erranti Regi obuian-
tes, consueto more promebant, *Impera-*
tor vale. Narrat namque ipse Albertus
in

in xxiii. de Animalibus, quòd grues volant vltra Æquinoctialem vnde Nilus fluit, & ibi conueniunt cum pygmæis cubitalibus figuram & loquelam hominum imitantibus in pugnam. De quibus pygmæis iterùm idem Albertus in quarto de Animalibus cap. 11. dicit, quòd *locutio non est nisi hominis, licet aliquo modo etiam conueniat animalibus, quæ quamdam affinitatem & similitudinem habent ad homines, sicut quibusdam generibus simiarum, ut pygmæis, qui tantùm aliqua loquuntur, sed non ex intellectu, sed imaginatione.* hæc Albertus.

Hic iam audisti Alberti testimonio, pygmæos non esse homines, sed de genere simiarum, quos etiam negat habere intellectum. Sed quòd huiusmodi monstra sint quæ loquuntur aliqua voce hominis, idem Albertus experimento probat: dicit enim in secundo libro de Animalibus cap. iv. sic: *Fidem facit mihi de illis monstris, de quibus multi scribunt hoc, quod accidit ante istud tempus in partibus Saxonie versus Daciam, ubi masculus & femina sicut homines capti fuerunt pilosi: ex quibus masculus didicit*

G

ingredi

ingredi super duos pedes; & domesticatum fuit ita ut loqueretur voce humana, sed valde imperfecta verba & pauca: nec tamen verecundiam de turpibus habuit actibus, sicut de egestionem, & libidine, & alijs de quibus nobis verecundia est. Femina autem interfecta fuit à venatoribus. hæc Albertus.

Cùm ergo sic sit, quædam monstra esse quæ loquuntur sine intellectu aliqua voce humana, auesque reperiri quæ loquelam addiscunt, & imitantur loquendo; profectò nulli dubium quin Carolo obuiantes aues ita vel aliter edoctæ, salutationis oraculum poterant eloqui. Hæc contra Nigromanticos & Horoscopos qui statuas fabricant, quas in possessionem spirituum malorum mittunt, per quos responsa recipiunt, dicta sufficiant. Tales Nigromantici fuerunt Socrates, Hermes, & etiam Gerbertus, qui ab aliquibus nominatur Gilbertus vel Gilibertus, & postea factus fuit auxilio diaboli Papa, nominatus Silvester Secundus; de quo multa scribit Vincentius in secunda Parte Speculi historialis vigesimo quinto libro cap. xcviij. Quicumque ergo tales
sequun-

sequuntur, idololatræ pessimi sunt; & si suos errores defendere nituntur, per venerabilis Alberti doctrinā multipliciter damnantur, vt patuit. Cū enim Albertus in De lapidibus damnat Democritum & alios, dicentes omne elementatum habere animam; qui etiam dicunt, ipsas animas esse causas generationis lapidum, & animam esse in lapide: profectò constat & damnatam esse istorum Nigromanticorum stultitiam, dicentium statuam lapideam posse loqui, cū propriè loqui conuenit homini; & impropriè sine intellectu quibusdam brutis, de quibus patuit superius. Ait enim Albertus in De lapidibus sic: *Anima non est in lapidibus, sed in vegetabilibus primū inuenitur; nullam enim habent lapides compositionem congruam, cū nec alimento nec sensu utantur, neque omnino vita secundū aliquem vitæ actum: dicere autem propter solam generationem animam esse in lapidibus, non benè se habet, ed quòd hac generatio non est secundū generationes animatorum vegetabilium, vel animalium sensibilium; hac enim omnia videmus ex seminibus suis proferre suæ speciei gene-*

rata; lapis autem nihil horum facit omnino: sed nec videmus omnino lapidem ex lapide generari, sed videmus unumquodque lapidem generari ex causa aliqua quæ in loco est suæ generationis. hæc Albertus.

Taceant ergo Horoscopi, qui suæ vesaniæ iam audierunt correptionem, quia natura non dedit lapidi animam. Qualiter ergo credendum est, eos posse facere quod natura negavit? loquitur ergo diabolus per huiusmodi statuas. cuius signum est, quia ipsi tales imagines in loco mundo servant, & preces porrigunt, & sic responsa recipiunt; quæ utique fieri non possunt nisi per intellectualem creaturam, puta spiritum immundum. Et hunc modum imaginum venerabilis Albertus adscribit Nigromanticis, dicitque esse idololatriam pessimam, & longè debere esse à quolibet Christiano, ut superius iam patuit ex Speculo allegato.

CAPVT XIV.

Contra Astronomos excedentes in arte Astronomia, & quòd sint parum litterati: gaudeant ferè omnes deceptionibus.

CONTRA Astronomos nimis excedentes in sua arte, in multis locis venerabilis Albertus disputat & reprehendit; de quibus omnibus vnā sententiam placet adducere. ait namque in De somno & vigilia de Astronomis sic: Omne enim ferè tale genus hominum deceptionibus gaudet, & parum litterati existentes, putant necessarium esse quod contingens est, & pronuntiant tamquam absque impedimento futurum aliquid: & cum non euenit, faciunt scientias vilescere in conspectu hominum imperitorum, cum defectus non sit in scientia, sed potius in eis qui abutuntur ea. Propter quod etiam Ptolemæus sapiens dicit, non esse iudicandum nisi valdè generaliter & cum protestatione cauta; quòd stellæ ea quæ faciunt, faciunt per aliud & per accidens, ex quibus multa in signatis occurrunt impedi-

menta: frustra enim ponetur studium ad scientias vaticinantes, si ea quæ futura prævidentur, impediri non possent: ad hoc enim prævidentur ut mala impediatur, & bona expediantur ad actum, sicut faciunt Medicorum periti in suis prognosticationibus. hæc Albertus. Hanciam præfatam sententiam & in aliis locis dicit quoad prognosticationes ex Physiognomia, ex complexione, ex somnijs, quæ necessitatem nullam inducunt, sed etiam frequenter fallunt: de quibus omnibus causa breuitatis transeo.

CAPVT XV.

*Quid de Interrogationibus
sciendum sit.*

Est etiam in Astronomia pars Interrogationum, per quas de futuris coniecturaliter iudicant Astronomi; & licet nihil adiungit de Superstitione, hæc pars quibusdam tamen posset videri friuola esse, & ideò ipse Albertus determinatiuè noluit loqui de ipsis, sed disputatiuè tantùm in Speculo præfato, quasi diceret: Pro vtraque parte opinor.

op nor. Quare ipse etiam in eodem Speculo, antequam disputationem facit de ipis, præmisit unam protestationem, sic inquit: *Protestor tamen, si aliquid dicam quo velim uti in defensione, quoniam dueterminando non dico, sed potius opponende, vel excipiendo, vel ad determinationis animadversionem determinatoris ingeri iam prouocando.* hæc Albertus de Interrogationibus. Quales autem sunt huiusmodi Interrogationes, plenius habetur ab ipso Albumasar & Hali Astronomis. Hoc autem sciendum, quod sanctus Thomas de huiusmodi in suis scriptis nullibi mentionem facit reprobando vel impugnando.

CAPVT XVI.

Qualiter Albertus Alchimistas reprehendit, & deceptiones appellat.

ALCHIMICOS vel Alchimistas, qui multas fraudes committunt in proximos sua arte, & periculum animæ suæ peccando mortaliter non euadunt, venerabilis Albertus multipliciter reprehendit, & falsas eorum opiniones &

deceptiones denudat in suo libro Mineralium; de quibus hîc narrare longum est, & ideò aliqua breuiter de iis sunt notanda, vt aliququaliter innotescat per Alberti doctrinam Alchimicorum fallacia. Ait namque ipse Albertus in præfato libro Mineralium sic: *Possumas considerare vtrum verum sit quod quidam Aristotelem dicunt dixisse, cum secundum rei veritatem dictum sit Auicenna, scilicet: Sciant artifices Alchimia, species permutari non posse, sed similia illis facere possunt, vt tingere donec sit multum simile argento vel auro, vel cui voluerint corpori. Ceterum quòd differentia specifica aliquo tollatur ingenio, non credo possibile; sed spoliatio accidentium non est impossibilis, vel saltem diminutio eorum.* hæc Albertus. Vnde consequenter Albertus ibidem ponit duos modos Alchimicorum: vnum dicit esse deceptorium & sophisticum; de alio verò opinatiuè loquitur, non confirmando ipsum tamquam verum. vnde de illo secundo modo sic ait ibidem: *Non permutabuntur species, nisi fortè in primam naturam & materiam metallorum reducantur, & sic inuamine artis deducantur in speciem metalli*

talli quod voluerint. Sed tunc oportebit nos dicere, quod Alchimicorum periti operantur sicut periti Medicorum: Medici enim periti per medicinas purgatiuas purgant materias corruptas, & facile corruptibiles, & impediētes sanitatem, qui est finis intentus à Medico; & postea per confortantia naturam, iuuant virtutem naturalem, ut digerendo sanitatem inducat: ita enim proculdubio sanitas effectus erit natura effectiue, & artis organicè & instrumentaliter. Per omnem autem eundem modum dicemus operari Alchimicorum peritos in transmutatione metallorum: primò enim quidam purgant multum materiam argenti vini & sulphuris quam inesse videmus metallis: qua purgata conformabunt virtutes materiae quae insunt ei elementales & caelestes, ad proportionem mixtionis metalli quod intendunt ex materia educere, & tunc ipsa natura operatur, & non ars, nec organicè iuuando & expediendo; & sic verum aurum & verum argentum educere & facere videntur hæc Albertus de vno modo, qui probabilior & verior videtur, tantum ut audis opinatiue loquitur: de alio autem, sophistico videlicet, ita subiungit,

dicens: *Qui autem per alba albificant, & per citrina citrinant, manente specie metalli prioris, in materia proculdubio deceptiones sunt, & verum aurum & verum argentum non faciant. Et hoc modo ferè omnes vel in toto vel in parte procedunt: propter quod ego experiri feci, quòd aurum Alchimicum, quod ad me deuenit, & similiter argentum, postquam sex vel septem ignes sustinuerit, statim ampliùs ignitum consumitur & perditur, & ad facem quasi reuertitur. hæc omnia verba Alberti.*

Notandum proinde, quòd ipse idem venerabilis Albertus in eodem Libro Mineralium, Alchimicorum multos errores destruit. Nam primum, videlicet quòd dicunt tantum esse vnã speciem metalli, scilicet aurum, & alia metalla ægritudines accidentales; & ideò ex plumbo promittunt se posse facere aurum: item secundum, scilicet quòd dicunt ex lapidibus posse fieri aurum & ex calce, similiter tamquam errores damnat. vnde consequenter ipsum Ca-lestenem, quem dicit fuisse præcipuum in hac arte, non sustinet; & addit de experimentis Alchimicorū, sic inquires: *Propter experimenta Alchimicorum de-*
bite

bitè discutienda, plurimos inspexi Libros Alchimicos, & inueni Libros illos absque Syllogismo & probatione tantùm expertis inniti, & celare intentionem eorum per verba metaphora; quod numquam fuit consuetudo Philosophia. hæc Albertus de Alchimistis. Item de modo viciniore naturæ in Alchimia, de quo superiùs iam notatum est, & disputatiuè loquebatur sicut patuit, adhuc clariùs loquitur ipse Albertus, nec ipsum sustinet tamquam verum; & ideò de ipso post alia sic ait: *Etsi aliquando per sapientium industriam per calidum ignis contingit extrahi à plumbo per euaporationem superfluum humidum aqueum, & aduri in ipso totum pingue oleagineum, & depurari per subtiliationem id quod est in ipso terreum sulphuratum, & commisceri vaporabiliter in aliquo præfocando continente vaporem terreum cum aqueo radicali, optima & fortissima commixtione, & ex vi caloris conuerti humidum ad colorem citrinum, & tunc habere splendorem & colorem auri: hac enim via artis simillima est via natura, ut superiùs notatum est: sed licet hoc sit verum, tamen non propter hoc aurum dicitur esse in profundo: quia etiam dato*

quòd hoc sit aurum quod sic effulget ex plumbo; tamen iam scimus, quòd ista transformationes corrumpunt in toto plumbum: cum plumbi igitur specie numquam simul influit auri species in materia eadem. Hoc autem multo magis verum videbitur, quando non est probatum, hoc quod sic educitur de plumbo, esse aurum, sed fortè aliquid auro simile, non aurum; cò quòd sola ars non potest dare formam substantialem. Præterea, Alchimistam vix vel numquam inuenimus sic, ut dictum est, in toto operantem, sed potius citrino elixir colorat in auri speciem, & albo elixir colorat in argenti similitudinem, studens ut color in igne remaneat, & penetret per totum metallum, sicut spiritualis substantia in Missa. Materia metalli & hoc modo potest induci falsus color, substantia metalli remanente. hæc Albertus.

Notandum consequenter, quòd Alchimici multas falsas habent opiniones; puta, dicētes, quòd lapis sit materia metalli, similiter & calx atque cineres, ex quibus dicunt se posse facere aurum. Sed hæc omnia potenter ipse venerabilis Albertus reprobatur, ostendens etiam vnde decipiuntur, soluitque eorum argumenta

gumenta quibus se defendunt : vnde postquam destruxit opiniones cuiusdam Alchimici Gylgil nomine, qui huiusmodi fuit opinionis, sic adiecit Albertus in præfato Libro Mineralium post solutiones argumentorum ipsius Gylgil: *Hæc autē inconuenienter & stultē dicta sunt, quoniam iste Gylgil Metaphysicus & non Physicus fuit; sed de Metaphysica sua in Alchimia præsumens, præsumpsit mentiri de Metaphysicis.* hæc verba Alberti contra Gylgil & alios Alchimicos. Item adhuc in secundo scripto, distinctione tertia, ipse Albertus contra Alchimicos sic inquit : *Alchimici non dant formas substantiales; cuius signum est, quia in talibus operatis non inveniuntur proprietates consequentes speciem: unde aurum Alchimicum non latificat cor, & sapphirus Alchimicus non curat anthracem, & carbunculus Alchimicus non fugat venenum vaporabile in aëre; & iterum in igne omnia ista plus consumuntur, & non durant ita diu sicut naturalia illius speciei.* hæc Albertus.

Hæc, licet pauca, ex Alberti Libro Mineralium extraxi, vbi & alia multa ponuntur, ex quibus deceptores Alchi-

mici deprehenduntur ; sicut qualiter probatur ad sensum quòd aurum Alchimicum non est verum aurum , sed aliquam habet similitudinem. Sed omnia ista ibi plenius reperiuntur, quæ hîc causa breuitatis omisi ; placuit tamen ista iam præfata , licet pauca , inferere huic Legendæ, vt innotescat omnibus, quid Albertus de Alchimistis & eorum arte teneat. Et vt quorundam fatuorum ora claudantur per ista qui fortè Libros de Alchimia conscriptos habent, quorum Auctores dum ignorant, Alberto mendaciter adscribere non formidant: sicut est quidam Liber intitulatus , *Semita recta vel directa*, cuius Prologus sic incipit: *Omnis sapientia à Domino Deo est*, &c. primum verò Capitulum sic incipit: *Alchimia est ars ab Alchimo inuenta. Alchimia enim græca massa Latine dicitur*, &c. Hunc Librum quidam Alchimici putant esse Alberti; sed falsissimum est , quia ipse Albertus istum Librum *Semitæ rectæ* cum suis opinionibus damnat, eò quòd omnino contrarium sentit ijs quæ in Libro *Semitæ rectæ* dicuntur: quia Liber *Semitæ rectæ* sub metaphoricis locutionibus

bus & signis ignotis abscondit scientiam Alchimix, nec aliquid probat Syllogismo. Item promittit se posse facere ex lapide aurum, & ex alijs multis. Item approbat omnia quæ Albertus reprobat, & stulta dicta esse dicit. Quare si inspexeris Librum Mineralium Alberti, & etiam Librum Semitæ rectæ, dices: Iste Liber Mineralium damnat & elidit Librum Semitæ rectæ specialissimè, nec habet quidquam de stilo Alberti. & ergo qui hoc scire cupiunt, legant Librum vtrumque, & intelligent me verum dixisse. Multi etiam in chartulis suis quædam colligentes, mirabilia quandoque magnis viris adscribunt, vt suas fraudes abscondant; & fide dignos se faciant, cum mala machinantur. Et consequenter notandum est, quòd sicut Liber Semitæ rectæ non est Alberti, vt iam probatum est; sic pariformiter Tractatus ille, qui intitulatur, *De secretis mulierum*, minimè Alberto est adscribendus: & non nisi stulti & ignari contrarium possunt opinari, quia manifestissimè Tractatus ipse hoc notum facit. Vnde notandum est, quòd Tractatus de Secretis mulierum continet &

Textum

Textum & Commentum, sicut patet ad oculum; quia frequenter sic ibi habetur: *Hic Auctor prosequitur formationem fetus*. vel sic: *Hic Auctor monet quatuor quaestiones*. & his similia. Et si benè inspexeris Librum tam quoad Textum quàm quoad Commentum, tunc videbis quòd neutrum Alberti sit, si Alberti tamen Libros vniquam legisti; quia stilius & modus procedendi de Albertina eloquentia habet nihil. Item ex alio conuincitur quia Liber iste minimè sit Alberti, quia multoties allegat Albertum in hac vel simili forma, sic dicens: *Huius rationem dicit Albertus, quia diluuium*, &c. Item sic: *Aduertendum est, quòd quatuor sunt status luna secundum Albertum in Tractatu de Statu solis*, &c. & his similes allegationes tam in Textu quàm in Commento inuenies; ex quibus cognoscitur quòd falsum gerit titulum si Alberto adscribitur: curenim diceret allegando, Albertus hoc vel illud dicit, si ipse idem Librum composuisset? Ex multis alijs probare possem falsitatem tituli, si ad finem non festinarem; sed hæc sufficiant: prudentes namque viri sine aliqua difficultate sciunt,

sciunt, quòd Liber de Secretis mulierum Alberto nullo modo est adscribendus.

CAPVT XVII.

Quàm utile sit scire naturalia & occulta in rerum natura, & quòd talium Scriptores laudandi sunt.

QUOD autem Albertus etiam laudandus sit de hoc quòd præ alijs in naturalibus multa scripsit, vt de Lapidibus, de Animalibus, & huiusmodi, patet ex verbis beati Hieronymi, qui talium rerum Scriptores commendat, tamquam utiles in hac etiam parte multum extiterint. vnde super Ieremiam idem Hieronymus sic inquit: *De natura verò lapidum siue gemmarum, & Græcorum plurimi & Latinorum scripserunt, è quibus sancta memoria Episcopus Epiphanius vnus fuit, qui nobis ingenij & eruditionis sue volumen insigne reliquit. Plinius quoque Secundus Orator & Philosophus extitit, qui etiam in Opere pulcherissimo Naturalis Historia librum trigesimum septimum, qui & extremus est, lapidum*

dum atque gemmarum disputatione compluit. hæc Hieronymus. Sed & Vsuarius Monachus & Sacerdos, in suo Martyrologio quod ad Carolum misit vel scripsit, ita de quodam Sancto scribit: Anatolius Episcopus non solum religiosi viris, sed & Philosophis admiranda scripta reliquit, cuius festum celebratur quinto Nonas Iulij. Item Augustinus in De vita Christiana similiter tales Scriptores in naturalibus commendat, & non parvam dicit huiusmodi fecisse utilitatem Ecclesiæ Dei. vnde in secundo Libro ita loquitur: Rerum autem ignorantia facit obscuras figuratas locutiones, cum ignoramus vel animantium, vel lapidum, vel herbarum naturas, aliarum rerum, quæ plerumque in Scripturis similitudinis alicuius gratiâ ponuntur. hæc Augustinus: qui consequenter commendat in eodem Libro eos qui vel nomina Hebraica exposuerunt, vel de Temporibus scripserunt, sicut Eusebium; imò de omnibus Artibus ipse Augustinus sic prosequitur laudans talium Scriptores vel Expositores, vt de Numeris, de Dialecticis & Sophisticis locutionibus, & Locis terrarum, de
 Anima-

Animalibus, Herbis atque Arboribus; quia huiusmodi Doctores harum rerum, ait Augustinus, benignam operam fraternæ vtilitati impenderunt. redarguitque idem Sanctus eos, qui talia scripta à venerabilibus viris edita abscondere nituntur. Item Frater Thomas Brabantinus, Alberti discipulus, in Libro quem edidit de Naturis rerum, dicit, quòd scire naturalium rerum naturas vtilissimum est. vnde ipse idem in eodem Libro sic ait: *Nunc ergo quantum hoc opus profit, & quantam vtilitatem præstare possit ijs qui verbo prædicationis volunt insistere, ad plenum scire hominem æstimo neminem, nisi qui in profundioribus diuinæ sapientiæ dederit intellectum.* hæc ille. Quàm vtile autem fuerit etiam de Alchimicis scire, de quibus iam parum ex Alberto audisti, puto, sapientes aduertunt, cùm ex huiusmodi arte pericula animarum & corporum eueniunt. Animarum verò in hoc, quia deceptores pænè omnes sunt Alchimi-
stæ, iuxta Alberti sententiam: & cui da-
bium quin mortaliter peccant in ven-
dendo aurum suum Alchimicum pro
vero? tenentur sine dubio in foro con-
scientiæ

scientiæ satisfacere ijs quos decipiunt. Corporum autem pericula ex hac arte possunt sequi, eò quòd aurum multoties in vsus Medicinæ artis pro sanitate inducenda consuevit sumi. Cùm igitur aurum Alchimicum non sanat, imò languorem auget, & vulnus vulneri addit; profectò potest ab imperito, qui non nouit distantiam inter aurum naturale & Alchimicum, quandoque assumi in medicinis; & hæc absque dubio medicina intentum & finem Medici, quæ est sanitas, non inducit. Perniciosè igitur scribunt quidam in periculum animarum & corporum de Alchimia, eandem simpliciter approbantes; sicut quidam Doctores de Casibus scribentes, quos tamen nominare nolo, Alchymistis deceptoribus dextras quodammodò dantes, dicunt non esse inconueniens, ex lapidibus pretiosis & herbis, in quibus est mirabilis virtus, aurum fieri vel argentum. Sed isti quàm falsè dixerunt in casibus conscientiæ, & contra Philosophiæ veritatem, ex superiùs notatis Alberti verbis notissimum est, cùm ipse etiam dixit de modo artis qui simillimus est naturæ; quòd si educa-

educatur aliquid quod habet similitudinem auri, adhuc tamen non est probatum, quod propterea sit verum aurum hoc quod sic fulget. Sciant igitur Confessores qualiter informet Alchimistas, vel venditores auri Alchimici, similiter & lapidum Alchimicorum: propterea enim huic Legendæ hæc inferere placuit, ut eò certior esset quilibet quid sentire deberet de Alchimis, quò à Doctore maiori & magis experto sententiam diffinitivam & veriorrem, puta ab Alberto, audisset.

CAPVT XVIII.

Quòd scire naturalia, etiam impudica, utile sit & necessarium.

SED dum quædam in naturalibus videantur minùs pudica, stulti quidam & ignari putant huiusmodi non esse scribenda. Sed ipsorum error increpandus est per hæc quæ subiungo, ne putent talia in De animalibus & alijs Libris Theologicis ab Alberto inutiliter esse posita; cum ea scire etiam Theologis sit necessarium, tam pro fidei defensione

fensione contra perfidos, quàm etiam pro correctione indisciplinatorum morum, & periculorum tam animæ quàm corporis euasione. Vnde ipse Albertus circa illum Textum, *Ecce virgo concipiet, &c.* Isaïæ VII. Iudæorum argumenta, qui deprauare nituntur intellectum illius Textus, dissipat naturali ratione, quamuis carnalis videatur. Sic pariformiter in quarto Sententiarum, distinctione xxxi. quasi circa finem, ubi querit quando est in actu carnali usus contra naturam, vel non; & quis modus magis & minùs contra naturam, plenius disputat rationibus naturalibus, conuincens illos qui quandoque excusare nituntur suas turpitudines, quasi non essent adeò turpes sicut sunt. Sed hæc omnia hîc ponere non est opus propter verecundiam: nam ipsemet Albertus in eodem loco fatetur, quòd talia sine verecundia, licet vtiliter, in disputatione non possint dici: vnde cùm post proposita argumenta ad solutionem venit, ita dicit ibidem ante responsionem: *Dicendum primò, quòd huiusmodi turpes quæstiones numquam tractari deberent, nisi illa cogerent monstra, quæ*
his

his temporibus in confessione audiuntur.
hac ille. Quin rursus ibidem etiam ad
modicum antè inuenies, An licet actum
carnalem in matrimonio exercere tem-
pore imprægnationis; contra illos enim
qui dicunt quòd sic, ipse Albertus in
contrarium disputat, naturalem assi-
gnans rationē quare esset in periculum
fetus, & præcipuè ante quatuor primos
menses. Et hanc etiam rationem huic
Operi necessarium inferere non est, sed
Confessoribus, quibus hæc scienda
sunt, relinquo vt inquirent. Item adhuc
idem super Ezechielem cap. xviii. circa
illud, *Ad mulierem menstruam non
accesserit*, ponit an peccatum mortale sit
sic vel sic accedere; & distinctiones ali-
quorum tamquam flans refutat: & qua-
re Propheta hoc inter mortalia ponit,
exponit; & qualiter verba Hieronymi
& Augustini sunt intelligenda. Imò per
scientiam naturalium, sicut ipse ibi-
dem ponit & distinguit de triplici men-
struo, & quòd ex duobus non fit gene-
ratio, sed ex tertio fieri potest, sed ge-
nerantur inde membris truncati vel
elephantici; hæc & multa ibidem re-
peries per ipsam quæ utilissima sunt
scien-

scienda, licet immunda sint & carnalia. require, ibi pleniùs inuenies: hîc enim causa breuitatis omissa sunt. Similia autem his possem enumerare carnalia ex libro de Animalibus ipsius, per quæ Confessor multis periculis potest obuiare tam animæ quàm corporis, & ideò necessariò sunt scienda: scimus enim mèlius esse, turpium quæstionum nodos ad subueniendum animabus Christi Sanguine redemptis posse soluere aut reddere super huiusmodi rationes, quàm curiosis se implicare opinionibus, quæ potiùs dissensiones & scandala quàm vtilitatem pariunt, vt plerique in Theologicis facere consueuerunt doctrinis. Nam propter illarum ignorantiam vel incuriam dicitur per

Isa. 5. Dominum: Periit populus meus, quia non habuit scientiam. Ad dirimendas

Eccli. 3. istas, ne in multis operibus eius simus curiosi, diuino admonemur oraculo: de his quia non curamus, in istis verò quia nimium insistimus, rationem sumus reddituri. Inde est quòd Frater Thomas Brabantinus, Alberti discipulus, Magistrum suum sequens, non pertimuit carnalia ponere in suo Libro de Natu-

Naturis rerum, ut subueniret periculis animarum & corporum : in hoc enim Libro idem Frater Thomas ponit totam artem obstetricandi in primo libro partiali. Vnde autem habuit idem Frater de hac arte notitiam, & quare Libro suo inseruit, & quod paucae sunt obstetrices peritae, suis verbis ostendit ibidem, cum sic dicit : *Hinc sequitur de partu & arte obstetricandi. In Libro Cleopatra, qua se vocari voluit Medicinam Reginarum, praecepit ipsa eadem Cleopatra filia sua, ad quam Librum scripsit, ut nulli tam gloriosam rem facile credat. Primum ergo dicendum est, quae sunt impedimenta partus. Obseruandum est quidem ipsum praecipue, ne sit pariens verecunda, aut corpus habeat pendulum, aut nimis gracile, vel multum pingue. haec ille: qui rursus postquam modos posuit nascendi, & obstetricandi artem ex Libro Cleopatrae praedictae, ut met testatur, ita subiunxit, dicens: *Hac igitur Libro nostro diligenter adiunximus propter periculum abortiuorum & ignorantiam obstetricum; & optamus quod omnes illi qui debent consulere animalibus sub libero arbitrio positis, ijs etiam quam maximè per hanc ar-**

tem consulant, qui ex suo iudicio & potestate arbitrij sibi subuenire minimè possunt, ut tenebras possint euadere sempiternas. Suademus ergo & volumus, ut discretiores aliqua conueniant obstetrices, & alias secretiùs instruant, atque per eas aliqua commodiùs instruantur. hæc suprâ Thomas præfatus. Qui iterùm ibidem, postquam posuit pericula in educendo puerum, ita subiungit, dicens: Sed possunt huic periculo occurrere, illa tamen qua perita sunt. sed heu! pauca inueniuntur, & ideo multi pueri abortiuntur, & non possunt nasci ad vitam, & propter hoc non renascuntur ad gloriam. Et ideo plangit Plinius: Feminis, inquit. sæpè abortum facientibus, quantum in parte hac multo infeliciores quàm fera sumus. hæc idem Frater Thomas.

Ecce, dum in præfato Libro de Naturis rerum composito à Fratre Thoma Brabantino Alberti discipulo Ars obstetricandi ponitur, & cùm idem Liber à nonnullis putatur esse Alberti, quia solent ipsum Alberti nomine intitulare; quidam ignari, vel peruersæ mentis, æmuli Ordinis Fratrum Prædicatorum, dicere solent, venerabilem Alber-

tum

tum fuisse obstetricem, vel obstetricatorem: sic suum fortè mendacium confirmantes dicunt: Tanta scripsit de animalium generatione & secretis naturæ, atque de arte obstetricandi, necnon omnium membrorum internorum officiiis; quid aliud dicendum est, nisi quia obstetrix fuit in iuuentute, ut harum rerum sibi experientiam vendicaret vsu continuo talis officij? Sed mentita est iniquitas sibi; fatuum enim & stultum est hoc de tanto viro æstimari. Sed isti fabulatores nobis respondeant ad hæc: Si idè obstetrix fuit vel obstetricator, quia de secretis naturæ aliis Doctorebus copiosius scribit; unde igitur illa scientia de ignotorum animalium, & venenatorum, feraliumque bestiarum generatione, conceptione, educatione, similibusque multis, quæ utique magis occulta, & minùs benè in nostram posunt notitiam deuenire. Numquid artem obstetricandi, quoad singulas bestias, officio tali posset acquirere sibi, & alia quæ de animalium naturis conscribit? Sed numquid omnium herbarum, arborum & aromatum hic Albertus hortulanus fuit, quia naturas omnium

edocuit? Et vt omnia sub vno conclu-
dam articulo, numquid tot artium
mechanicus pronuntiandus est, quot
illarum hic Doctor scribendo enume-
rat? vtputa, lanifex, arator, agricola, ve-
nator, & nauta? nam de huiusmodi ar-
tibus Libros conscripsit. Numquid
Augustinus, Hieronymus, beatus Tho-
mas Aquinas, carnalium peccatorum
& diuersarum specierum dicendi sunt
actores, quia de immunditiis scribunt
hominum peccatorum? Minimè. sed
turpibus hominibus turpiùs loquor.
Vnde, quæso, beato Bernardo, qui tan-
tæ simplicitatis erat, vt oleum pro aqua
biberet, & sagimen sæpè comederet
pro butyro, hæc scientia de modo par-
turbationis humanæ? vt diceret vtique sa-
tis grossè in Sermone de Passione Do-
mini, in hunc modum inquiring: *Vipereo
more laceramus miseras matres, mirum
quòd non laceramur & ipsi.* hæc Bernar-
dus. Nūquid & cum mulieribus affuit
quando partus aduenit vt ista
addisceret, qui illas à inuentute vt la-
trones fugere consuevit? Cessent igitur
imperiti & stulti à vanis suis cogitatio-
nibus, nec vltra superuacue loqui ad-
dant.

dant, ne fatui videantur. Hæc iam notata produnt, quare de artibus suspectis & Nigromantia notitiam habere voluit, & quàm vtiliter ipse nobis venenum & falsitates earum ostenderit. de quibus multa alia hîc possemus adducere, sed causa breuitatis sunt omissa, vt Legendam consequenter valeamus prosequi.

CAPVT XIX.

Quòd Albertus quotidie legit integrum Psalterium Dauidicum.

Eo autem tempore, vt præfatus sum, Alberto Colonia Lectoris existente, postquam de Parisiis in Theologia Magister promotus venerat, doctrinarum fluentia, vtpote ex abundantiori fonte, in communi omnibus manabant. Non mirum, quia & ipse qui discipulis fons extitit, de fontibus Saluatoris, tamquam pelago inexhausto, copiosius replebatur: die enim ac nocte contemplationi vacans, Spiritus sancti suffragio afflatus dulciter, iugi oratione vitæ venam pulsando, aquam sapientiæ salutaris,

lutaris, quam avidè sitiebat, attraxit; quemadmodum Auctor Libri Apum sæpè nominatus testatur in secundo libro cap. ultimo, sub hac forma verborum dicens: *Vidi, & certissimè expertus sum, sicut auditor eius per multum tempus, quòd venerabilis ille Magister, Frater Albertus Ordinis Prædicatorum, multis annis ferè quotidie, cùm tamen in cathedra regeret, tantum de die ac nocte orationibus incumberet, ut Psalterium Davidicum legeret, & interdum dictis Horis, Lectionibus, & Disputationibus terminatis, semper contemplationi divinæ & meditationibus insudaret. Quid miri ergo, si talis homo supra hominem in scientia profecerit, qui tam sanctè, tam integrè in virtute profecit? De quo etiam dicimus, quòd miraculis multis clavit, quæ eius vitæ meritum demonstrant.* hæc de verbo ad verbum Auctor Libri Apum, Alberti discipulus. Ex quo notandum, quantæ affectionis fuerit Albertus, qui tam copiosè ultra debitum incessanter precis incensum voluit in ara cordis summo Deo offerre: vnde absque dubio factum arbitramur, non casu sed mentis suæ affectione, quòd tam sedulè suis in dictis,

dictis, tamquam ructus quosdam faci-
ciens ob plenitudinem deuotionis, de
contemplatione, deuotione, ac oratione,
sicut pietatis amator, nos admonere cu-
rauit: vnde & dicta sua singulariter
magis quàm ceterorum modernorum
scripta Doctorum affectum inflam-
mant, quia abundantissimè Scripturæ
sacræ auctoritates combinando multi-
plicat. Inde & ipsam sacram Theolo-
giam ponit scientiam esse affectiuam, &
quòd inquit verum in re fruibili, non
vt verum simpliciter, sed vt summè
beatificans, referens ad affectum vel
intellectum affectiuum; allegans Apo-
stolum ad Titum, qui dicit quòd est se-
cundùm fidem electorum Dei, & agni-
tionem veritatis quæ secundùm pieta-
tem est. id est, Theologia est cognitio
veritatis, non vt veritatis simplici-
ter, sed vt inclinata est ad pietatem.
Quantum verò huic suæ doctrinæ con-
cordat operatione, & alio ostenditur,
dum quatuor Sententiarum libros quo-
ad singula contenta rememorando suc-
cinctè ad modum orationum conscri-
psit: necnon & Euangelia Dominicalia
per circulum anni simili modo breuiùs

perstringendo exponens, in preces
 vertit, ut idem sit sacrorum verborum
 explanatio, & piæ mentis ad laudan-
 dum orandumque supplex deuotio. Sic
 pari modo totum de venerabili Sacra-
 mento quem edidit Tractatum, finien-
 do in vnam orationis formam redegit,
 ne verum quod docuit, sincera pietate
 careret. Insuper & Litaniam non suis
 limitibus finit esse restrictam, sed am-
 pliando nomina Sanctorum, & vario
 ordine distinguens, singulares compo-
 nit Orationes, non quidem verbis sed
 sententia magnas. Notificant igitur
 omnia ista iam præmissa, hunc virum
 Dei misericordia, & insolita multis
 spiritus deuotione, omne verum quod
 nonerat ad pietatis affectum, eò quòd
 in Domino delectabatur, ordinasse,
 iuxta propriæ sententiæ dictum, quo in
 quarto Sententiarum distinctione VII.
 nos instruit, sic inquiens: *Scire autem
 nihil facit vel parum ad virtutem; velle
 autem & operari, multum.*

CAPVT XX.

*De Alberti deuotione ad venerabile
Sacramentum, & de scriptis ipsius
de eodem: & quòd Episcopatum
coactus suscepit, atque voluntariè
resignauit: sed & de eius simplici-
tate & paupertate in libris.*

AD Dominicæ Incarnationis sa-
cratissimum mysteriũ qua afficie-
batur deuotione, non est nostro sermo-
ne euoluendum; magis verò sua propria
ex doctrina perpenditur: nam in Tra-
ctatu quem de Mysterio Missæ com-
posuit, & in Libro de Eucharistia in-
notescit omnibus, non communium
hominum more illum fuisse locutum;
sed tamquam inebriatus in cella vinaria
nostræ redemptionis mysterium deuo-
tiùs excellentiusque, quàm credi po-
test, exposuit; nec cuiusuis Doctoris in
hac re Tractatus valet hominem in
amorem diuinæ bonitatis, & ad regra-
tiandum tantæ dignationi, vel etiam
Missarum solemnia vt quis libentiùs

frequentet quotidiano officio, efficacius, si studiosè Alberti Librum præfatum perlegerit, allicere. Et reuerà, quantò diutiùs perscrutatus eundem fueris, tantò secretiora & plura reperies: Liber namque idem totus nihil aliud est quàm mirabilis combinatio auctoritatum Scripturæ sacræ. Vnde Frater Bernardus in castris S. Vincentij, Ordinis Prædicatorum, qui contemporaneus venerabilis Alberti extitit, sicut met testatur in Libro suo, quem de Gestis Ordinis in sua ætate ad Magistrum Ordinis scripsit, sic inter alia de Alberto scripsit, dicens: *Dominus Frater Albertus Tentonicus, Episcopus Ratisponensis, maximus in Philosophicis & Diuinis. Hic multa & diuersa volumina dereliquit toti orbi, quæ ad expositionem sacræ Scripturæ & aliarum scientiarum scripsit, intellectu profunda, sensibus & sententiis alta: quorum numerum & nomina ponere esset longum. Circa finem verò dierum suorum Librum de Sacramento Altaris edidit, in quo euidenter ostendit & sinceritatem fidei suæ in Deum, & feruorem deuotionis ad diuinæ Incarnationis sacratissimum mysterium, & quæ excellebat*

bat scientiam diuinarum Scripturarum. Episcopatum Ratisponensis Ecclesia coactus recepit; sed paulò post tamquam carbonem ardentem, manum adurentem, obtenta cessione reiecit, & ad paupertatē Ordinis rediit. hæc omnia Frater Bernardus præfatus in sua Chronica quam scripsit ad Magistrum Ordinis, videlicet Reuerendum Patrem Fratrem Emericum vel Aymericum. Et quamuis tam copiosè de Eucharistia in præfato Libro scripsit, non minor tamen in doctrina, de eadem scribens in Sententiis & Postilla, Doctoribus aliis, imò diffusior, utpote deuotione plenus, inuenitur. Nec quidem ista suffecerant, nisi & alium Tractatum de Dominici Corporis & Sanguinis mysterio, ut deuotionem suam expleret, hic Pater venerabilis componendo superaddidisset; illum sanè Tractatum, qui pro themate in singulis sermonibus istud assumit, *Venite, comedite panem meum*. quamuis nonnulli ignari intitulant Tractatum illum nomine sancti Thomæ: quod utique errori est adscribendum, quia ab Alberto est editus, & non à sancto Thoma: habemus enim in nostro Con-

uentu Colonienſi originaleſ librum, pro magna parte Alberti manu conſcriptum: idem namque Liber à quodam Fratre qui quandoque Alberto in ſcribendo ſubſeruiebat, in groſſa littera ſcriptus eſt; ſed in fine vltimi, Sermo- nes aliqui manu Alberti ſunt ſcripti: ſicut & principium Sermonum, ita & in medio, multis in locis, nunc manus Fratris nunc Alberti alternatim ſibi ſuccedunt: quandoque etiam abraſa littera Fratris & aliter ab Alberto eſt ſcripta in eodem loco, quandoque verò in margine: nonnumquam vbi deerat ſpatium, ipſe Albertus ſchedulas ſcribendo, filo affixit eaſdem locis opportunis. In quibuſdam etiam locis ſuæ ſcripturæ folia indiſpatia ceteris foliis inſeruit, ita vt totus Liber ſit deformis ob huiuſmodi variationem. Notatur nempe & in hoc ipſius Alberti ſimplicitas & amor paupertatis, cui de pretioſitate codicis, dum correctus eſſet, cura non fuit; vt meritò cum beato Hieronymo dicere poſſit, qui de propriis Libris dicebat in Prologo ſuper Iob in hunc modum: *Habeant qui volunt veteres libros vel in membranis purpureis au-*

ro argentoque descriptos, vel uncialibus, ut vulgò aiunt, litteris, onera magis exarata quam codices; dummodò mihi meisque permittant pauperes habere schedulas, & non tam pulchros codices quam emendatos. hæc Hieronymus de se, & aptissimè Albertus verba ista dicere potest, imò factò dicit, sicut etiam declarant alij ipsius Libri quos manu propria ad integrum conscripsit, quos & Coloniae habemus, videlicet super Matthæum & De animalibus; in quibus nec initiis capitales litteras posuit, sed & absque spatio & omni ornatu codices sunt. Consuetudo insuper ipsi fuit, ut Libros quos edidit, propria scriberet manu; quare plures libri ex manu eius scripti propria reperiuntur in diuersis locis: sicut præfati enim iam Libri Coloniae habentur, sic & in aliis Conuentibus Ordinis alij reperiuntur; ut super Logicam in Zuzatensi Conuentu Saxoniae prouinciæ; in Ratisponensi verò super Logicam, quem fertur in Episcopali dignitate constitutus scripsisse; in Conuentu autem Nurenbergensi, ut aiunt, manus ipsius habetur super Ioannem. Hæc igitur inferere placuit quæ vidi & ma-

nibus contrectaui, vt ambiguum quod dixi non maneat. Et licet incidentaliter hæc recitata sint, redarguunt tamen curiosos nonnullos in libris. Taceo de maioribus: sed & quosque laborantes animant hæc, ne otio in suam perniciem torpescant, cum talem Doctorem ac tam excellentem virum, scientia, & statu, atque diuina contemplatione mirabilem, labori manuum cognouerint insudasse: lateatque neminem quam sæpè tituli Librorum, in diminutionem famæ Doctorum aut alterius incommodi erroneè peruertuntur. Vnde & ipse venerabilis Dominus Frater Ioannes de Turrecremata, Ordinis Prædicatorum, Romanæ Ecclesiæ Cardinalis, etiam ex stilo deprehendit hunc præfatum Tractatum non fuisse sancti Thomæ; quia idem Cardinalis in vno suorum Tractatum quædam allegans ex præfatis Alberti Sermonibus, sic dicit de eisdem Sermonibus vel Tractatu: *Iste Tractatus non est sancti Thomæ, sed videtur esse Domini Alberti.* quod & verum est, sicut iam probatum est.

CAPVT XXI.

*De eiusdem deuotione ad Dominicam
passionem, & qualiter probauit
lignum sanctæ Crucis.*

Ad sanctam verò Crucem & Dominicam passionem venerabilis Pater Albertus tamquam Christi imitator & discipulus, non mediocriter, vt credimus, affectu sancto afficiebatur; quare tamquam amatae suæ sæpissimè memoriam agens, singulariter de ipsa, quandocumque occasio se offert, latius sermonem describit in Theologicis suis Libris: sed hæc ob magnitudinem huic compendiosæ Legendæ inserere non possumus, licet non paruam possent ostendere ipsi Crucifixi adfuisse amorem. Qui autem hæc scire desiderat, vt aliquammodo hoc certum legentibus fiat, notetur super Lucam circa illud ix. cap. *Si quis vult post me venire, abneget, &c.* vbi de virtute & laude Crucis profequitur pulchrè. Similiter & Lucæ xiv. circa illud, *Qui non baiulat crucem suam,* de tota Christi passione & titulo Crucis

cis ad longum pulcherrimè prædicat. Item Isaia LIII. circa illud, *Vidimus eum nouissimum virorum, & virum dolorum,* de amaritudine venerandæ Passionis Iesu Christi, tamquam Crucis Christi amator, singulare quid & nobile posuit. Sed & in tertio suo scripto, distinctione xvi. tantam ponit fuisse Passionem Christi, vt non tantùm maiorem dicat ipsam fuisse omnibus passionibus Sanctorum; verum etiam acerbiores passionem Adæ in primo statu innocentiae, si detur per impossibile quòd pati potuisset. vnde ibidem sic dicit: *Meo iudicio, acerbitati Passionis Christi nulla pœna corporalis potest comparari, quam aliquis pati potest corporaliter, & secundum naturam: vnde si Adam passus fuisset, dico quòd non ita acerbè doluisset vt Christus. Insuper & dolor Christi adhuc grauior quàm mors anima, si poneretur; quia meliori contrariatur.* hæc Albertus ibidem; quæ si quis videre desiderat, & rationes ibidem eius reperiet. Sed de Saluatoris veneranda passione & viuificæ Crucis signaculo non tantùm locis debitis & magis aptis, verùm & incidentaliter sæpè aliis materiis aptando, ne immemor

Crucis,

Crucis, de eadem est persecutus, ut patet circa illud Lucae xix. *Hodie salus domui huic facta est.* ubi dicit, omnem Ecclesiam principaliter in honorem sanctæ Crucis esse consecratam; & qualiter Crucis imago, quasi Dominus extensus super domum, Altare respicit, manibus expansis Sancta sanctorum amplectitur, & longitudine corporis Sancta tegere videtur; & cetera multa, ut ibi inuenies. Et reuera conuersatione asperæ vitæ hunc crucifixum non dubitamus, cui tanta cura fuerat de crucis assumptione nos præcipuè admonere: ea enim virtute præ ceteris magis nouimus Sanctos quosque fulsisse, quam frequentius laudasse verbi præconio audiuius. Paulus namque, qui stigmata Christi in corpore portat, cui etiam ostensum est quanta pati pro nomine eius deberet, præcipuè in Cruce gloriatur. Sic Hieronymus, fatigatus labore ex ieiunio, de temperantia incredibilia nobis prædicat. Antonius discretionis spiritu insignis, hanc præfert singulis virtutum exercitiis. Sic de multis, nisi breuitas, cui intendo, obstaret, percurrere possemus. Nonne & ager mul-
tis

ris seminatus alternatim seminibus, ob
 sui qualitatē vberiores ex vno quā
 alio profert fructus, quamuis in nullo
 sterilis habeatur? Sic absque dubio Al-
 bertus ex vberiore deuotione ad vene-
 randam Christi passionem copiosius
 de ipsa differuit; vnde & suam deuo-
 tionem ad Crucem Christi Passionem-
 que Dominicam ex hoc probamus.
 Ante summum enim Altare Chori Fra-
 trum sepulchrum ipsius est, in quo
 cum corpore nuper, anno Domini
 M cccc. lxxxiii. iiii. Idus Ianuarij, id
 est altera Pauli primi Eremitæ, Christi
 Passionis & Crucis signa, dum exhu-
 maretur, reperia sunt. Aperto namque
 sepulchro venerabilis Alberti, sarco-
 phagum lapideum inuenimus, in quo
 tumba lignea vna cum eiusdem Patris
 & Doctoris corpore terra cooperto, &
 lapide Epitaphio inscripto. Quo in lu-
 cem educto, reperimus de ligno Crucis
 parua peciam, & Agnus Dei de cera
 virginea, atque denarium clauo Domi-
 ni Saluatoris perforatum, omnia collo
 ipsius Alberti alligata; quæ in vita haud
 dubium in memoriam Dominicæ Pas-
 sionis portare consuevit. Et ostendens
 se

se in Domino obdormisse, vsque in defossam suæ sepulturæ locum nostræ redemptionis signa secum hic Beatus attulit, vt nec iam extinctum corpus viuifici signaculi gloria priuaretur. Fuit autem Agnus Dei illud non auro vel argento inuolutum, sed serico, ob reuerentiam: paupertatis namque, non diuitiarum amator extitit, vt infra patebit. Sed & illud demum Alberti in laudem placet apponere, vnde Crucis Christi fuisse illum amatorem probamus: hic nempe, ex speciali deuotione ad venerandam Crucem, in Ecclesia Fratrum Coloniz signaculum Crucifixi infra Chorum & Ecclesiam in alto suspendit, vt ab omnibus valeat adorari; in quo ipsemet Sanctorum Reliquias imposuit, atque pro maiore deuotione intuentium eandem imaginem, cum esset Episcopus, consecrauit: quam quicumque deuotè adorauerit, indulgentiam vnus anni & centum quadraginta dierum à Fratre Saluo Rakanatensi Episcopo, Vicario in spiritualibus Domini Nicolai Quarti, omni tempore obtinebit, sicut habetur in tabula Indulgentiarum Fratribus Ordinis

nis datarū. Fuit autem Nicolaus Quartus illo in tempore quo Albertus vixit. unde credimus has Indulgentias impetratas ob singularem deuotionem Alberti insinuandam, procurandamque hanc in populo. Hic etiam Crucis amator Albertus, pretiosi ligni portionem non parua Colonienſi Conuentui dereliquit in puro auro incluſam, atque gemmis circumdatam: quod etiam aureum clenodium, quemadmodum calices Altaris ſolent benedici, ob reuerentiam ſalutiferi ligni incluſi, eſt conſecratum, vt celebri fama cognoſcimus, eò quòd præfata portio ligni fertur ab Alberto probata fuiſſe: & licet ſcripto commendatam non inuenimus examinationem eiufdem ligni, quia forſe amiſſæ ſunt litteræ ex negligentia; ab antecelloribus tamen noſtris continuè hæc narrari ſine hæſitatione ſolent, quòd ipſe venerabilis Albertus dum viueret, iam dictam ligni portionem ſic probauerit. Ne enim ipſe incertis fidem accommodaret, de Dei clementia conſiſus, accepit lignum illud, atque in ignem proiecit, credens non poſſe conſumi ab igne, ſi pretioſiſſimam Chriſti glebam

glebam portasset : & ecce , mox ut ro-
gum tetigit , illicò resiliit ex ipso inta-
ctum. Quare & inter omnes Reliquias
quas habemus, hanc portionem maiori
prosequamur veneratione. Contigit et-
iam nostro tempore, ut mulier quædam
obsessa in Colonia ad Sanctorum cor-
pora duceretur pro sua liberatione , ut
ad nostram Ecclesiam veniret; cui dum
præfatum lignum ostenderetur , ma-
lignus ille se compescuit , nec verbis
tam profluus ut antè fuit , sed ita sub-
murmurans ait : Ipse in ligno hoc pe-
pendit. signans Saluatorem indetermi-
nata locutione ; quasi præ timore non
fuiſſet ausus Redemptoris nostri pro-
prium nominare vocabulum , ad quod
omne genu flectitur , cælestium, terre-
strium , & infernorum. Facit insuper
fidem de prædicta examinatione per
Albertum facta aliud quoddam simile.
Coloniæ namque in Ecclesia Colle-
giata sancti Clementis , quæ vulgariter
sancti Cuniberti basilica dicitur , eò
quod ibidem corpus eiusdem sancti
Episcopi requiescit, inter alias Sancto-
rum Reliquias de ligno sanctæ Crucis
habetur maior portio quàm in nostro
Con-

Conuentu sit, licet eiusdem sint coloris vtræque, de qua & ipsi Canonici dicunt, quòd sit per venerabilem Albertum probata per iniectionem ad ignem sicut & nostra, habereque se affirmant documentum in scrinio de examinatione tali.

CAPVT XXII.

De Alberti deuotione ad beatissimam Virginem Mariam.

GLORIOSISSIMÆ Virginis Mariæ Matris vnigeniti Dei tātus Albertus extitit amator atque laudator, ne alicui dicta illius scrutanti in dubium venire queat, etiamsi alia non essent argumenta, quin singulari gratia ab ipsa Matre gratiæ sit dotatus: scriba enim singularissimus est Virginis eiusdem præ omnibus qui de ipsa scripserunt. Nam singulares huius benedictissimæ Virginis laudatores sunt, Hieronymus, Ambrosius, Augustinus, Bernardus, Anselmus, & Ioannes Damascenus, qui omnes decora sua locutione & dulcissima deuotione ipsam, vt dignum est, mirabiliter

biliter commendant; quàm magna, quantæ potestatis, cuius meriti perfectionisve in omni virtute existat, & quàm benigna sit, ornatissimo stilo persuadent efficaciter. Sed non ita apparenter rationibus vincunt animum audientis vt hic venerabilis Albertus suis in Sermonibus de ipsa dum loquitur. Probat hoc clarè Liber eiusdem qui de Laudibus Virginis intitulatur. Tam copiosè etiam de illa scribit, vt quasi non sit Liber in Theologicis ab eo editus, in quo ipsius dilectæ sit oblitus. Frequentiùs tamen atque abundantius in Postilla super Lucam de eadem Virgine loquitur, quæ omnia suis in locis Lector quicumque inueniet. Nec simplici ipsam nominando vsus est vocabulo, sed nunc beatissimam, nunc honestissimam benedictissimamque, nunc Dominam matrem Dei, nunc matrem Creatoris appellat; imò dum allegat auctoritatem Virginis, vt patet in Libro de Eucharistia, non fuit contentus dicere, Dicitur Lucæ primo; sed ita: *Hoc dicit nostra illuminatrix Maria, filia Anne, hoc est gratia.* Hinc in ipsius Legenda sic de eo habetur, quòd ob singularissimam

*nam deuotionem ad Dominam nostram in
borto vel alio secreto loco solus quasi stu-
dens, cantionem cum lacrymis ad beatam
Virginem, frequentissime suspirando at-
que singultus immiscens, cantare solebat.
Fertur etiam plures Sequentias de beata
Virgine composuisse, quæ Sabbatinis
diebus decantari solent in Ordine Præ-
dicatorum. Vnde cum tantus laudator
beatæ Virginis extitit, non mirum quòd
per ipsam quæ plena est gratia, præ aliis
gratiam maiorem accepit. Sed & hoc
suo testimonio nobis notum facit: in
Litania enim sua Orationem ad beatam
Virginem facit, quæ sic incipit: *Sancta
Maria, secundum nomen tuum illumina-
trix cali & terra, quæ in multis de secre-
tis filij tui & Verbi Dei Patris à sæculis
in Deo absconditis etiam ipsa Angelica
lumina illuminasti, &c.* In qua Oratione
clare dicit, beatam Virginem incessan-
ter sibi dona gratiarum contulisse: imò
& proferendo per eius linguam, dicit
beatam Mariam potentiæ suæ miracula
indefinenter operari. Sic autem ait in
Oratione ista post alia verba: *Da mihi
intellectum luminosum, conceptum stabi-
lem, mentem tenacem, scientiam certam,
fidem**

fidem firmam, sermonem conuenientem, qui me audientibus det gratiam; scilicet sermonem qui sit ad fidei confirmationem, ad Ecclesie adificationem, & ad gloriam nominis Filij tui Domini nostri Iesu Christi, ad perpetuam laudem & predicationem misericordie tue, quæ in tam indignum peccatorem misericordie tue dona conferre non cessas, & proferendo per linguam potentie tue miracula non desinis operari. hæc Albertus in sua Oratione præfata.

CAPVT XXIII.

De eiusdem admonitione vt frequenter & sapienter laudemus beatam Virginem.

ET quia gratiosè dotatus est venerabilis Albertus gratia & scientia per beatissimam Virginem Mariam, meritò eandem frequentiùs laudare quàm ceteri Doctores debuit, sicut dicta ipsius & scripta commendant. Sed dubium non est, quin etiam Virginis virtutes, quæ sunt, humilitas, castitas, pudicitia, mansuetudo, charitas, & omnis disci-

plinæ pulchritudo, vir iste beatus singulariter habuisse credendus est: & ipsam non tantum morum venustate in conuersatione arbitramur continuè subsecutum, sed & obsequia alia deuotionis & assiduæ salutationis illi exhibuisse, fide certa tenemus; maxime cum nostram pigritiam increpando ad imitandum vitam venerabilis Dei Genitricis nos hortatur, atque vt eandem oscularemur deuotè frequentissimè salutando, tota diligentia curat admonere: ait namque in Postilla inter multa alia sic: *Maria autem in conclau sine va fit conclau Verbi, & thalamus sponsi aeterni, vestibulum Filij Dei, Regis summi, & triclinium totius Trinitatis, & Fabricatoris mundi fabrica. Salutemus ergo eam frequenter & sapienter. Frequenter, vt nec à corde nec ab ore recedat, sicut suadet*

Isaia 23. *Isaias: Benè cane, frequenta canticum, vt memoria tui sit. Frequenter, vt in omni deuotione salutemus, ne fortè dicat nobis:*

Matth. 15. *Hic populus labijs me honorat, cor autem eorum longè est à me, sine causa colunt me. Sapienter autem, vt salutans salutata congruat, & salutatio concordet intentioni: qualiter enim aut luxuriosus virginem,*

*nem, aut superbus humilem, aut maledi-
ctus benedictam salutare præsūmit?* hæc
Albertus in Postilla. Ex quibus verbis
redarguuntur quidam animales, qui
modum orandi impugnant, quo bea-
tam Virginem salutare consueuimus
per Rosarium quod continet quinquagenarium numerum Angelicæ saluta-
tionis, cū hic magnificus Doctor doc-
cet & persuadet frequentare Canticum
illud dulcissimum. Et quantum iudicio
humano permittitur, suspicari possu-
mus, & valdè probabiliter dicere, ve-
nerabilem Albertum Rosarium legisse,
præsertim cū suo tempore in vsu
fuit hominum ille modus salutandi: ita
vt Frater Thomas Brabantinus, Au-
ctor Libri Ap̃m, Alberti discipulus,
miracula de eodem Rosario describit;
& quod discipulus miraculis confir-
mat vt fidem adstruat, hoc Magister, ne
ab ore salutatio recedat, dum admonet,
auctoritate roborat.

CAPVT XXIV.

*Quòd beata Virgo creditur Alberto
apparuisse, cùm Librum de Laudi-
bus glorioſæ Virginis ſcriberet.*

NEC ſilentio pertranſeundum puto
illud, quod fertur de eodem Al-
berto, & credibile multùm, ſi cauſa
inſpicitur, omnibus videtur, videlicet
reuelationem ſibi apertam à Dei Geni-
trice factam eſſe cùm de Laudibus
eiufdem Librum conſcriberet. Nec hoc
mirum, cùm tam inaudito modo Vir-
ginis laudem dilatare in ipſo Libro
contendit: non enim tantùm virtutes
animi eiufdem Virginis multipliciter
diftinguit & enumerat, verùm & cor-
poris eiufdem ſingula membra cuius fue-
rint diſpoſitionis in figura & colore,
diſputando quid probabilius ſit tenen-
dum in huiufmodi, vt de corpore etiam
laudem habeat, ſatagit inuenire; & ſi
inuenire non poſſit quod deſiderat,
ſaltem argumenta pro & contra inſpi-
ciens, iam hoc iam illud opinari queat,
ne vel imaginatio præſentia Virginis
careat.

careat. Inde, cuius complexionis fuerit, conatur disputando inuenire, oculive cuius coloris, & nasus cuius figuræ extiterit: similiter & de crinibus, & ceteris quæ corporis sunt, indagare studuit. Nec de Nuntio ad Virginem misso tacuit, cuiusmodi coloris habere poterat vestes, & de cubiculo Virginis vel Orationis disputat, quod etiam sanctius templo Iudaico affirmat. Sed & quo tempore, an manè vel vespere, meridie vel nocte Nuntius venerit, ratiocinando inquit. In quo actu tunc Virgo, an contemplationis vel actionis fuerit, scire laborat. Quare autem in ciuitate apertissimè facta sit Annuntiatio, & qualiter beata Virgo ciuitas est dicta, egregiè determinat. Vltimò verò & de scientiis gloriosæ Virginis disputans, non tantum hanc habuisse diuinas scientias liberalesque Artes, sed & mechanicas, diffinit. Vnde istis & aliis multis pulcherrimis in eodem Libro consideratis à nobis, stupore tenemur, dicimusque: Putasne gloriosa Virgo, quæ sui memorum nequaquam immemor est, poterat visionis suæ speciem à tanto suo amatore abscondere, & non potius dulcissi-

ma apparitione ipsum inuifere? Tam magnifica enim ipsius Doctoris de Virgine benedictissima scripta existunt, vt hac sola ipsum beatissimum declarent: sicut nuper contigit, dum quidam Sacerdos deuotus hunc Librum de Laudibus beatæ Virginis perlegeret, ignorans tamen ipsum editum ab Alberto, ecce sola lectione de qualitate Auctoris edoctus est. vnde prorupit in hanc vocem: Verè, inquit, non aliud sentiri potest, quin Auctor istius Libri regni cælestis sit ciuis.

CAPVT XXV.

Quòd beatus Paulus in visione apparuit Alberto, atque ipsum animauit ad continuandum Librum de Ecclesiastica hierarchia.

CVM igitur sic totus Virginis insisteret laudibus, & Dei seruitio se mancipasset, quotidie tamen in anteriora se extendens, ad cælestia cognoscenda pariter & amanda animum modis quibus poterat dedit. Scripturæ igitur sacræ qua intellectus illuminatur, affectusque

Et usque in amore Dei accenditur, iugiter, quemadmodum de beato viro legitur, erat intentus; & licet corpore solo in hac peregrinatione esset positus, cogitatione tamen & auiditate in illa æterna patria est conuersatus: & ideò congruum erat vt à ciuibus cæli visitaretur in terris; quod subsequens probat visio. Quidam enim Frater vita & scientia clarus, inuenit de manu Domini Alberti notulam hæc verba continentem: *Tutis auribus loquor. Cùm expositionem Libri beati Dionysij de Cælesti hierarchia laboribus multis perfecissem, & aggressus expositionem de Ecclesiastica hierarchia, primum Capitulum quod de Baptismatis Sacramento tractat, cum immensis laboribus transissem; ad expositionem secundi Capituli manum mittens, fateor, deficiens desperavi: & ecce post Matutinas somnium tale vidi: In quadam enim Ecclesia me inueni, in qua beatus Paulus Missam celebrabat. Vnde plurimum consolatus, sperabam per ipsum de intellectu Libro- rum beati Dionysij erudiri: & cùm diceret Agnus Dei, per ostium Ecclesiæ magnus populus ingressus est; quos Apostolus placide resalutando requisituit quid peterent.*

Qui dixerunt: Ecce demoniacum tibi adduximus, supplicantes ut expulso demonio digneris hunc curare. Qui placidè se promisit hoc facturum: & damone fugato, communicauit hominem à demonio liberatum de parte Hostia consecrata: cumque post Agnus Dei esset ablutio tribuenda, ego me ad hoc obtuli, & cum reuerentia sum locutus: Domine, multo tempore exoptavi ut possem de abditis & profundis in Libris beati Dionysij occultatis de vestra pietatis gratia edoceri. Qui mihi beneuolè respondebat, dicens: Post Missam ad domum Aaron Sacerdotis mecum venies ultra aquam. Post Missam verò Apostolum sum secutus, & cum ventum esset ad aquam, Apostolus leniter transibat; ego autem cum aquam tangerem pedibus meis, excreuit subitò in immensum, ut mihi transitus non pateret; Apostolus verò transiens, domum Sacerdotis, quam mihi indicauerat, est ingressus; & ego sollicitus de sequela, subitò à somno sum excitatus. Ego autem mecum cogitans, me ipsum interpreter somnij feci & visionis: quia primum Capitulum per me expositum, egit de eiectione demonis ab homine per Baptisma; & baptizato homine, participatio Sacramen-

cramenti datur. Ad domum Aaron vocatio, qui chrismate ungebatur, sequens Capitulum, quod de Chrismate quo Pontifices consecrantur, inuitabat. Verum aqua profunditas excrescentis me retraxerat à scribendo, cuius mihi transsum beatus Apostolus facilem ostendebat diuina gratia innitenti. Accinctus sum ergo in me ad scribendum, & Dei adiutorio consummatus, ubi de infirmitate propria desperavi. hæc in Alberti Legenda. Ego autem quemdam codicem vidi, ubi omnes Libri beati Dionysij cum expositionibus venerabilis Alberti continebantur, ubi etiam aliqua erant de vita Alberti, & iam dicta visio; cui visioni ita præmittabatur: *Novi Fratrem vita & scientia clarum, qui se dixit vidisse Libros Domini Alberti super Dionysium, ubi inuenit de manu eiusdem Alberti notam istam: Tutis auribus loquor, &c.* ex quibus constat veritas visionis præfatæ. Hinc etiam præ ceteris Albertus laudandus est, quod tamquam diuino munere dotatus, Libros beati Dionysij, qui Diuinus Doctor appellatur, exposuit primus inter Doctores modernos, cum etiam inter antiquos pænè nullus eorundem

Librorum expositor ob difficultatem reperiatur. Inde & beatus Hieronymus, ut creditur, inter Ecclesiasticos Scriptores excellentissimum Areopagitam non posuit; quoniam eius Libros sic eminentes ad communem notitiam deputandos non putauit. nec mirum, cum ipsemet diuinus Dionysius Catholicos obtestatione adstrinxit, ne imperitæ multitudini, sed solis doctis sua scripta, quasi multorum capacitatem excedentia reuelarent, ut patet in principio Ecclesiasticæ hierarchiæ.

CAPVT XXVI.

Quòd Albertus efficitur Prouincialis Teutoniæ, & quid gessit in illo officio.

SED dum venerabilis Albertus tamquam stella in firmamento gloriosis radiaret exemplis, ad illuminandumque ceteros potens esset scientia qua eminenter effulsit; secundum Ordinis ritum ad Prouincialatus officium per Teutoniæ prouinciam in Capitulo Prouinciali Wormatiæ anno Domini

mini M. CC. LIV. celebrato, per Fratres
eligitur. In hoc officio non tantum ad-
ministratione regiminis præfuit, sed &
æmulatione iustitiæ & rectitudinis ex
Religionis feruore, quem in seipso ser-
uabat. Cuncta enim quæ Apostolicæ
perfectiōni aduersantur ne subintra-
rent, operando, docendo, reuocando
remissiùs agentes, peruenerabilis tam-
quam verus pastor lupum arcens, in-
stanter abegit: vnde Ordinem nuper à
beato Dominico inchoatum, atque in
partibus Italiæ, Franciæ, & Hispaniæ
Conuentibus ampliatur, insuper in
omni sanctitate adornatum, Albertus
eundem Ordinem in Alamanniæ par-
tibus pari studio intentus, augmentare
numero & merito satagebat, ostendens
se sanctissimi Patris Dominici prolem
clarissimam, ac Euangelicæ paupertatis
amatorem. Nam quantum humilitatem
& paupertatem Albertus dilexerit, hoc
facto euidenter ostenditur, quod Mo-
nasteria sui Ordinis per totam Alaman-
niam diffusa, incipiens ab Austria, & ita
ulteriùs vsque ad Sueuiam, Bauariam,
Alsatiā, per lineam quoque Rheni
atque Mosellam vsque ad Brabantiam

inclusiue; insuper per totam Saxoniam, Westphaliam, Misniam, Thuringiam, Hollandiam, Holsatiam, aliasque partes circa Lubecam ad mare sitas in propria persona pedester incedendo visitauerit, non habens æs in zona, sed cum Fratribus ostiatim panem mendicando, Apostolicæ perfectionis æmulator factus est, idem volens à Fratribus per omnia obseruari. In Actis enim, cum ipse electus esset in Prouincialem, ita habetur: *Infra terminos pro officio predicationis exercendo, nulli omnino in curru licentia concedatur, & sine causa legitima cum nullo dispensetur ad eundum in curru vel biga. Causas autem legitimas dicimus, si sit transitus per desertum, ubi hospitia vel victualia non inueniantur; vel si ad infirmum, de cuius periculo timetur ex mora Fratris, oportet festinare; vel si Fratrem extra infirmatum necesse sit per vecturam in domum deduci; vel si Princeps ex causa urgente ad locum aliquem vocet, ad quem sine mora oporteat festinare. Qui secus fecerit, pro quolibet die disciplinam in medio in conspectu omnium accipiat, & in terra sedendo in pane & aqua ieiunet. Et hanc pœnam per dispensationem nolumus rela-*

relaxari. In sequenti autem Capitulo Augustensi grauius puniuit sui mandati transgressores, absoluendo hos Priores, Hildensheimensem, Purgensem, Cremensem. De Priore Cremenfi sic infert: *Iniungimus ei pro currisatione, & propter duorum Conuersorū receptionem sine licentia, septem dies in pane & aqua, quinque Psalteria, & quinque disciplinas. Priori Mindensi quinque dies in pane & aqua, & quinque Missas, tria Psalteria, & tres disciplinas, quia venit eques ad Capitulum. Fratribus Treuerensibus, per quos introductæ fuerunt mulieres in Chorum, claustrum, hortum & officinas, tres dies in pane & aqua, tria Psalteria, tres disciplinas. Item Fratres qui vsi sunt curribus vel equitaturis hoc anno ad Capitulum veniendo, vel aliàs sine necessitate & licentia, sustineant pœnam grauis culpæ.* hæc ex Actis Alberti cū esset Prouincialis.

Ecce quantum in ijs quæ purè cærimonialia sunt, in quibus etiam Fratres transgredientes, si tamen sine contemptu factum fuerit, nullam culpam nec venialem, nec mortalem, vt Constitutio dicit, sed solam pœnam ad arbi-

trium Prælati incurrunt; iste Religionis zelator Albertus voluerit rigorem disciplinæ ab aliis, quemadmodum præcefferat exemplo, inuiolabiliter obseruari; quamuis simplex Prior & Vicarius in curratione & similibus, pro loco & tempore, iuxta Constitutionis dictum posset dispensare. Non ergo Religiosi quicumque aliorum Ordinum, vel Clerici aut sæculares velint iudicare seu scandalizari, si aliquid de ijs quæ videntur contra Ordinis professionem esse, cum perspexerint ab aliquo non obseruari; dum nesciunt an de substantialibus sint Religionis, vel de genere ordinationum in cærimonialibus: in quibus qua necessitate, vtilitate, & licentia habita dispensetur, ignorant, maximè cum non sint ex natura sua peccata, nec ex vi professionis, vt præmissum est. Nullum enim illorum propter quæ, vt iam dictum est, venerabilis Albertus grauem pœnam imposuit Fratribus qui transgressi fuerant, est aliquo modo alicui Fratri Prædicatorum Ordinis peccatum nec veniale nec mortale; sed pœna iniungenda stat in arbitrio Prælati, sicut & dispensatio, quod

quod clarum est ex Constitutionibus Ordinis. Nec tamen Fratres ob hoc hæc paruipendant, qui proficere in melius semper tenentur; ne, dum minima negligunt, defluant ad maiora. Aliud similiter ex istis Actis venerabilis Alberti non paruum documentum possunt sumere quicumque in Prælatione sunt constituti, cum cernunt manifestè quanta pietas ipsi seueritati quam exercuit adiuncta fuit, feriendo negligentes; quia prudenter putat vineam, ut salubriùs crescat; nec gladium interemptionis admittit, qui fimo correptionis in melius proficere nouerit arbuta quàm incisione. Contra cuius prudentiæ exemplum multi vinitores spirituales, qui custodes vineæ Domini sabaoth positi sunt, facientes, destructores, imò interfectores fiunt, antequam custodes esse incipiunt: ij planè qui alligant onera grauià & importabilia super humeros hominum, nouas constitutiones accumulantes, cum nec ipsi quæ antè statuta sunt obseruant. sed & minor querela in ijs esset, si non præcepta & censuras excommunicationum & suspensionum addendo, multipliciter regni

regni calorū aditū præcludentes, animas illaquearent, ne dicam necarent : quos notando Albertus iste prudens pastor & pius non solum exemplis suis reuocat, sed & verbo docendo salubriter instruit, dicens in Postilla circa illud Matthæi xxiii. *Alligant enim onera importabilia super humeros hominum*, ita prosequendo sermonem: *Ecce austeritas: sequentes Roboam, qui dixit: Pater meus imposuit vobis iugum graue, quod ego grauius faciam. Pater meus cecidit vos flagellis, & ego cadam vos scorpionibus. Horum imitatores esse videntur qui Religiosis Regulam canonicam & approbatam super Euangelium professis, tota die nouas Constitutiones ingeminant, & præcepta graua plus quàm ferre possit humana fragilitas. hæc Albertus.*

Sed & idem Albertus tales reprehendendo iterum notat Ioannis x. circa illud: *Qui non intrat per ostium in ouile ouium*, vbi septem ponit quæ vtile faciunt ouile; scilicet, quod sit molle ad accubandum, mundum ad quiescendum, calidum ad fouendum, firmum ad defendendum, pabulosum ad nutrien-

nutriendum, & largum ad recipiendum, & adunatum ad congregandum. quæ septem prosequitur sic inquit: *Mollities autem est per Prælatorum mansuetudinem, mundum per castitatem, calidum per charitatem, firmum per fortitudinem, pabulosum per verbi Dei eruditionem, largum per temporalium liberam distributionem, adunatum autem per unanimi-
tatem. De mansuetudine dicit summus opilio: Discite à me quia mitis sum & humilis corde: iugum enim meum suave. Galat. vi. Instruite illum in spiritu lenitatis. Non talem caulam habuerunt illi de quibus dicitur Ezechielis xxiv. Cum austeritate imperabatis eis, & dispersi sunt greges mei. Tales sunt proclini ad pœnas infligendas, proni ad sententias promulgandas. hæc Albertus; qui ibidem singulas præmissas septem conditiones ouilis per Scripturam canonicam dilatando probat.*

Matth. i r.

CAPVT XXVII.

De sollicitudine Alberti quam habuit in Prouincialatus officio circa sanctimoniam habendam à Fratribus.

NON autem de solo exteriori ornatu domus Dei, qui in carimoniis regularis vitæ poscitur consistere & disciplinatis moribus; verùm & de conscientiae decore peramplius sollicitus extitit hic Pater beatus. Vnde vt perageretur illud celerius, non tantum admonitione sermonis, sed & epistolis curauit Fratres ad cordis munditiam amator sanctæ pulchritudinis inuitare. Scribit proinde in vno Capitulo, cum in propria persona non omnes sibi creditos Conuentus poterat visitare, hanc epistolam ad singulas suæ Prouinciæ domus, in hunc modum: *Dilectis in Christo Fratribus Prioribus & Conuentibus Fratrum Ordinis Predicatorum per Teutoniam, Frater Albertus Prior Prouincialis & seruus Fratrum Predicatorum eiusdem Prouinciæ salutem, & fraternam*

ternam in Domino charitatem. Instantia
& sollicitudo quotidiana officij, quod obe-
dientia debito constrictus administrare
compellor, inducit ut admonitiones, quas in
Capitulo Provinciali feci Fratribus ibi-
dem constitutis, vobis absentibus debeam
declarare. Quapropter ut cura Fratrum
mihi commissorum, quam per me explere
non possum, per Priores singularum Do-
morum efficacius expleatur: volo ut se-
cundum quod iamdudum à Generali Ca-
pitulo salubris admonitio emanavit, & et-
iam concordat Generalis Concilij constitu-
tum, quilibet Frater semel in anno suam
conscientiam aperiat Priori suo, & pecca-
ta sua omnia in quibus est confiteatur, ut
vultum pecoris sui agnoscat. hæc in Actis
Alberti. Hanc autem, de qua iam di-
ctum est, munditiam cordis Frater
quidam non diligens, in damnationem
propriam, vitium proprietatis incur-
rit, celans aliqua cum Anania & Sa-
phira: sed feruenti zelo punitus est et-
iam mortuus, sicut illi à Principe pa-
storum Petro animaduersionis senten-
tiam acceperant. Nam in Actis Capitu-
li Wormatiensis, ubi Albertus Prouin-
cialis electus fuerat, sic continetur:
Con-

Conuersum in Betonia mortuum, in cuius proprietate inuenta sunt extra domum, Pralato suo in scio, nummi & vestes, extumulari iubemus, & priuari Ecclesiastica sepultura. Et ne ab aliquo huiusmodi vitium committeretur, venerabilis Albertus admonendo & minando ab eadem nefaria cura, quam proprietarij in perniciem suam sequuntur, in alia Epistola, si qui tentarentur Fratres in huiusmodi vitio, tamquam vigilans & zelusus pastor retraxit, scribens sub hac forma Epistolam: Dilectis in Christo Fratribus, &c. Frater Albertus Prior Provincialis per Teutonium, & seruus Fratrum Predicatorum eiusdem Provincia salutem, &c. Ne proprietatis vitium sanctae professioni paupertatis nostra possit subrepere; Volo ut nullus Fratrum habeat dispensationem nummorum aut quarumcumque rerum quae ad eius consilium, siue eius utilitatem, siue aliorum quomodolibet conuertantur, nec conscio Pralato suo ubi sit illa pecunia vel res alia, & qualiter dispensetur: nam si quis secus fecerit, & Pralato in scio huiusmodi res dispensaret, aut dispensandas suo consilio aut arbitrio reseruaret, eum proprietarium

rium reputarem, & tamquam nostra professionis violatorem regulariter condemnarem. hæc Albertus.

Hanc absque dubio paupertatem in se ipso tam plenè obseruabat, vt in alienis Conuentibus assignatus pro tempore, nec ipsos Libros, quos dictando ibidem propria manu conscripserat, ad suum originalem Conuentum secum reducere voluisset, ob proprietatis vitij damnationem; eò quòd si contrarium fecisset, non puræ paupertatis opus id esse iudicaret. Maluit enim hac sua paupertate in Librorum abdicatione aliorum supplere inopiam, quos pauperes scientia nouerat esse; quàm magnus reputari in scibilibus, si codicum numerositate grauatus quos edidit, quandoque ad suum Conuentum reueniret natium. Inde profectò in pluribus locis vbi missus fuerat, eius Libri de manu propria reperiuntur; vt notum fieret omnibus, quia dum paupertatem amplectitur nihil possidendo, & scientiam constaret docuisse sine inuidia, vnà cum Libris ipsam communicando. Sed huius perfectæ paupertatis perpaucos considerans ipse Albertus amatores atque

Philip. 3.

que sectatores, ex compassione redarguit eosdem vt resipiscant, ita in Postilla inquit super Lucam xxi. circa illud, *Erunt signa in sole & luna & stellis. Stella autem, inquit, sunt Religiosi, qui, sicut stella stant in calo, sic deberent stare in celesti conuersatione: nostra enim conuersatio in calis est. & Iudicum quinto: Stella manentes in ordine & cursu suo, contra Sisaram pugnauerunt. Habent autem tres partes, scilicet, votum obedientie, votum castitatis, & votum paupertatis. Et votū quidem obedientie aliquantulum tenent, & similiter votū castitatis; sed abrenuntiatio proprietatis manifestè percussa est, quia ferè omnes ad amorem terrenorum etiam plus quàm seculares sunt inclinati; & ideo signanter dicitur Matthei xxiv. quòd ceciderunt in terra. hæc Albertus.*

CAPVT XXVIII.

De zelo Alberti contra omne vitium, maximè Ecclesiasticorum: & quid Canonizatio confert Sanctis.

CONTRA omne autem vitium tam acerrimè & saluberrimè ex nimio zelo

zelo disputat, præcipuè contra malos Ecclesiasticos, tam Religiosos quàm seculares, vt nemo dubitare possit, quin igne Dei tamquam fornax succensus fuerit. Vnde quàm magni sint Prælati, neminem vt Elias pertimuit, zelando iustitiam & Christianam Religionem, nunc Summis Pontificibus non parcens fraternè admonet; nunc Episcopos, ceterosque Ecclesiarum Prælatos, Clericos seculares atque Religiosos de vitiis acerrimè increpat, testimoniis Scripturarum affirmans & testificans, quanta mala Ecclesiæ & animarum mortes ex malorum Ecclesiasticorum peruersitate eueniunt. De quibus omnibus si eiusdem Alberti dicta adducere vellemus, credo quòd lamentationes & væ decantanda ipsis essent magis quàm carmen lætitiæ; cùm miseriam quam expectare habent à iusto Iudice, eis suis verbis multipliciter insinuat. Et quia hæc ponendo in hac compendiosa Legenda, vltra modum Liber excresceret, libet paucissima ex his inferere potius, notando loca vbi ponuntur huiusmodi, quàm in longum sermonem deducere. Nam circa illud

lud Lucae xvi. *Cupiens saturari de micis;* dicit Prælatos diuites esse debere in scientia, verbis diuinis, quibus ad pœnitentiam nutrire debent pauperem populum, id est peccatores, & deberent ad minus sex micas dare eisdem: quas micas ibidem exponit, & Scriptura dictum suum roborat. in fine autem multùm dolenter concludit, sic inquit: *Sed heu! hodie nemo populo pauperi dat; & ipsi Prælati iuxta Prophetæ vocem optimo unguento delibuti, nihil compatiuntur super contritione Ioseph, hoc est, pauperum; sed dicunt illud Ecclesiastici: Inueni mihi requiem, nunc manducabo de bonis meis solus.* hæc Albertus. Qui iterùm Lucae xxi. circa illud, *Erunt signa in sole & luna,* ita dicit de Prælati malis in Ecclesia: *Hæc autem signa modò fiunt; sol enim obscuratur, quando illi qui illuminatores orbis terræ deberent esse, obscurantur, sicut dicitur Sapientiæ xvii. Totus orbis terrarum limpido illuminabatur lumine: solis autem illis superposita fuit grauis nox, imago tenebrarum, quæ eos erat comprehensura. Hæc enim luminaria tenebrosiora sunt iam facta quàm alia tenebrosa, tum per ignorantiam, tum etiam per nigram vitam.*

vitam. Ij etiam sunt qui stant, non circumueunt, quia de cura subditorum nihil considerant, sed in altitudine sue ambitionis stant erecti & otiosi: hi pro tertia parte percussi sunt, quia lumen dignitatis retinentes & quastum, tota utilitas spiritualium percussa est. Hac enim tria sunt, dignitas; & temporalium dispensatio, & utilitas spiritualium quam debebant rependere, quæ tota percussa est. Ezechielis xxxiv. Gregem meum non pascebatis. Isaia i. Super quò percutiam vos ultra addentes prauaricationem. Retrocessio autem est, quia reuersi sunt ad vomitum & ad vitam laicalem. hoc modo totus retrocessit Clerus qui sol mundi fuit; & idcò luna, hoc est laicorum congregatio, eclipsim patitur sui luminis, & conuersa est in sanguinem; hoc est ad carnalitatis amorem. hæc Albertus, quæ ibidem latiùs per Scripturam sacram sunt probata. Qui iterùm in alio loco in eadem Postilla circa illud Lucæ xx. Simulantes longam orationem, de malis Clericis dicit in hunc modum: Reuerà non diu orant, sed simulant se diu orare, ut occasione longæ orationis accipiant. Auaritiã vestram Religionis colore depingitis, & diabolo

Christi arma prastatis, ut armetur iniquitas, dum hypocrisis pietas aestimatur. Marci XII. Deuorant domos viduarum sub obtentu proluxa orationis. Nostri vero Sacerdotes aliquid peius faciunt, quia nullam penitus prætendunt pietatem vel orationem, & tamen deuorant domos omnium: ius suum esse dicentes hoc & istud, sed non esse ius ut aliquid vel Deo rependant vel hominibus. Michæa III. Audite Principes Iacob, & duces domus Israel, qui violenter tollitis pelles super oues meas, & carnes earum de super ossibus earum. hæc Albertus, qui iterum Marci XII. ita ait: Modò autem nostri Sacerdotes & Scribæ domos viduarum comedunt, non sub obtentu longa orationis, sed sub violentia aperta depredationis. hæc Albertus. Sed hic adhuc durius loquitur ex zelo quibusdam peruersis: nam Amos VII. ubi dicitur quòd Amasias sacerdos misit Bethel ad Ieroboam Regem Israel accusans Prophetam Amos prædicantem contra vitulum aureum quem Rex erexerat, sic adiungit post Textum, dicens: Simile quid factum est Domino, & fit adhuc suis à Pontificibus. Ioannis XI. Collegunt Pontifices & Pharisei concilium. & post

& post pauca: Si dimittimas eum sic, omnes credent in eum, & venient Romani ut tollant nostrum locum & gentem. Similiter Prædicatores veritatis à Pontificibus, ne in suis Episcopatibus prædicent, eiiciuntur. 1. ad Thessal. 11. Eadem passi estis à contri-
bulibus vestris, sicut & ipse Dominus à Iudeis, qui & Dominum occiderunt Ie-
sum, & Prophetas, & nos persecuti sunt, & Deo non placent, & omnibus hominibus aduersantur, prohibentes nos loqui genti-
bus ut salua fiant, ut impleant peccata sua semper: peruenit enim ira Dei in eos usque in finem. hæc omnia & alia multa Albertus contra eos qui prohibent Præ-
dicatoribus verbum dicere veritatis. Ob huiusmodi autem zelum Alberti, Prælati multi, qui veri Pastoris sata-
gunt subsequi vestigia, eiusdem beatissi-
mi viri non cessant magnificare iusti-
tiam & fortitudinem, pronuntiantes se-
dem Dei in ipsius anima collocatam
fuisse firmissimè, & præsentis poten-
tia stabilem, nulli valentem cedere virio
eundem, affirmant indubiè. Non autem
hunc zelum doctrinando in paucis lo-
cis seruat, sed tam copiosè, ut nemo sit
dubitans qui legerit Alberti libros, quin

dolore tactus fuerit intrinsecus super contritione Ioseph. Inde multi dicunt dilatam esse Canonizationem ipsius ob malorum Prælatorum resistantiam, ne dum tali honore sublimatus, magis authentica fieret doctrina viri iusti, & eorum iniquitas pateretur ruinam. Vnde cum beatus Thomas eius discipulus Sanctorum adscriberetur Catalogo, de Alberti etiam Canonizatione, vt aiunt, tractabatur; licet propter negligentiam Fratrum, qui causam non agitabant, prosecutione careret. Nec ob huiusmodi dilationem Canonizationis, vel etiam si Sancti omnino ab Ecclesia inter Canonizatos non habentur, minoris sanctitatis sunt reputandi; cum esse possit, & probabile multum sit, plures non canonizatos Sanctis canonizatis aliquibus in beatitudine esse excellentiores, & ex vitæ merito maiora posse impetrare. vnde Dominus Antoninus in sua Chronica titulo xxiiij. tertij voluminis, sic inquit: *Quantum autem nobis, qui tenebris inuoluimur, permittitur indicare de Sanctis per coniecturas & presumptiones ex Gestis eorum, arbitror ambigere neminem, plurimos Beatos utriusque*

que sexus non canonizatos ab Ecclesia, imò nec nominatos, non fuisse minoris meriti & inferioris gloriæ multis Catalogo Sanctorum adscriptis. Non enim Canonizatio adiicit ad meritum vel premium essenziale Beatorum, nec decernit sanctitatis gradum, sed venerationem temporalem & gloriam; ut post ipsam possit solemniter Officium celebrari & festinari, quod aliàs fieri non debet. hæc Antoninus. Nec interdicitur tamen ab Ecclesia, imò ipsa admittit Sanctis non canonizatis porrigere preces in priuato, si probabile est Sanctos tales beatos esse, quemadmodum recitat præfatus Dominus Antoninus in tertia Parte suæ Summæ titulo XII. cap. VIII. & idem tenet Innocentius. Ut autem faciant miracula Sancti, de necessitate in nobis aliqua requiruntur, scilicet fides & deuotio. Vnde ipse Albertus in Postilla super Lucam circa illud vndecimo, *Erat Iesus eiiciens demonium*, sic ait: *Fides & deuotio expostulant & impetrant miraculum: per ista enim virtus Altissimi obumbrat fidelibus, sicut obumbravit beate Virgini. Quantumcumque enim virtus sit in Salvatore, non operabitur in nobis*

nisi iungatur nobis per fidem & deuotionem; sicut medicina in pyxide, quæ non operatur nisi suscipiatur in corpus & naturam agrotantis, nihil penitus operatur.

hæc Albertus. Sed & aliud quandoque obstat ne miracula fiant per Sanctos, scilicet malitia hominum, ita quòd digni non sunt iuari per Sanctos: quod idem Albertus notat super Iob, circa illud, Ad aliquem Sanctorum conuertere. vbi sic dicit: Sanctos in afflictione coadiutores non habes, quos in hilaritate socios non habuisti. hæc ille. Imò quandoque Sanctorum reuelatio differtur propter occultas alias causas soli Deo notas, qui fortè, quando maioris necessitatis est in Ecclesia, vt fides & deuotio populi excitetur, vult Sanctos suos honorare; aut cùm necesse sit, malos nouis exemplis Sanctorum emendare, vel eorù instrui doctrinis. Legimus enim de magnis Sanctis, etiam non nisi post multos valdè annos esse inuentos, vel miracula fecisse, vt de beato Barnaba legitur, similiter & de sancto Quintino martyre, atque de sanctis Cassio & sociis eius in Diœcesi Colonienfi. Alios etiam diu valdè post obitum canonizatos, vt sanctum

Iob 5.

etiam Stanislaum Episcopum & martyrem Cracouiensem, qui ultra ducentos annos iacuit antequam canonizaretur. Et ideò non mirum quòd Albertus hic venerabilis non sit canonizatus: possumus tamen veraciter dicere, quòd ea quæ de ipso bona scribuntur, & in ista Legenda notantur, excellentiora sunt, quàm multa quæ de variis Sanctis canonizatis leguntur: imò & plura sunt respectu illorum quæ de nonnullis Sanctis scribuntur, de quibus possemus hîc enumerare aliquos: sed transeundum est, quia comparationes odiosæ sunt.

CAPVT XXIX.

*De tribulatione quam sustinuerunt
Fratres Predicatores & Minores,
& qualiter liberati sunt diuinitus
ab illa; atque de visione mirabili
ostensa de Alberto.*

REVOLVTO autem tempore quo Albertus venerabilis Prouincialatus officium administrabat in Teutoniæ Prouincia, Coloniensi studio, quod secundùm Ordinis morem semper Ge-

nerale extitit, assignatur pro Lectore; in quo sicut prius Fratres moribus & scientia instrueret, vitæ sanctæ exempla omnibus præstabat abundè. Sed quia Deus omnipotens quos amat castigat ut in melius proficiant, tentationem perualidam Fratribus duorum Ordinum, videlicet Prædicatorum & Minorum, aduenire permisit illo in tempore: de qua Alberti merito proculdubio & prærogatiua donorum liberati sunt, ut subsequens narratio & visio ostendunt, quæ nobis Frater Thomas Brabantinus, Auctor Libri Apum sæpè nominatus, fidei testimonio describit in hunc modum: *Quidam autem*, inquit ipse Frater Thomas in Libro Apum, *huius temporis Apostolica Sedis Antistes, cum litteras dedisset contra Præiulia à seipso & suis Prædecessoribus quatuor Apostolicis obtenta duorum Ordinum, scilicet Prædicatorum & Minorum, eadem die paralyti percussus obmutuit, nec umquam postea conualuit aut surrexit; qui etiam à quodam sanctissimo viro extra muros urbis Roma manifestissime visus est mortuus dari sanctis Dei Dominico & Francisco indicandus: litteras verò datas*

Alexander successor ipsius consilio fratrum Cardinalium solemniter renocauit. Quod utique necessarium fuit, cum certum erat quod si processum suum machinatio per predictas litteras habuisset, potentissimi Reges orbis, ut audiere postea Papale mandatum, cum iuramento dixerunt sibi & Prelatorum & Clericorum secularium possessiones & redditus usurpasse, si dictos duos Ordines Apostolicus destruxisset. Huius crudelissimi edicti quatuor precipue Magistri fuerunt Parisiis incentores, qui simplicitatem Scholarium contra dictos Fratres feraliter concitarunt in tantum, ut nisi se piissimus ac deuotissimus Ludonicus Francorum Rex & frater eius piissimus Comes Pictonie Alfonsus murum pro Fratribus posuissent, abdicatos Fratres rebus & corporibus exterminassent. Hinc cum nihil aliud facere potuissent, litteras infamatorias plenas mendacii contra dictos Fratres per diuersa Regna miserunt, post has & Librum nefandissimum compilauerunt, qui sic incipit, Ecce videntes clamabunt. titulum habens, De periculis nouissimorum temporum; in quo spiritu vesano dictos duos Ordines destruere nitebantur. Qui liber qua-

liter citatis & vocatis ad Curiam & presentiam Summi Pontificis dictis Magistris damnatus sit & combustus non solum in ipsa Curia, sed & Parisiis coram Vniuersitatis multitudine copiosa, scire poterit qui Collationes & Disputationes legerit, precipue contra Magistros quatuor aduersarios, disputationesque Domini Hugonis Presbyteri Cardinalis Fratris Ordinis Predicatorum, Domini Richardi & Domini Gaietani, & aliorum Cardinalium plurimorum; necnon Allegationes venerabilis Patris Fratris Humberti Magistri Ordinis Predicatorum; sed & Fratris Bonaventura Generalis Ministri Ordinis Fratrum Minorum, & maxime Magistri Alberti Fratris Ordinis Predicatorum, viri doctissimi, ad hoc specialiter à Domino Papa vocati, & aliorum Prelatorum disputationes prolixas habitas Anagnina coram multis; & in ipsis inuenire poterit rerum gestarum enucleatissimam veritatem. Quapropter iam dicti Magistri Fratrum aduersarij dignitatibus & beneficiis omnibus sunt priuati, donec iurarent renuocare Parisiis & in aliis ciuitatibus verecunda predicationis verbum, & quidquid contra dictorum Ordinum Fratres impli-

implicitè vel explicitè enomui Tent. Antequam autem venerabilis Albertus Curiam Romanam intrauerat, Magister Vilhelmus precipuus auctor tanti malicium suis complicibus miro modo Clerum Romanum necnon & populum in partem suā peruersitatis seduxerat multis verbis. Sed post præfatas Disputationes cum ad petitionem Domini Papa & omnium Cardinalium ipse Magister Albertus Evangelium Ioannis totaliter & Epistolas Canonicas miro & inaudito modo supra omnem hominem exponendo legisset, cum tanto favore negotium Fratrum Predicatorum & Minorum terminatum est & conclusum, ut omnes inimici eorum obstupescerent & horrerent, & veritatis fautores summa pace conquiescerent & gauderent. Quid autem super hoc cuidam sancto viro, duobus annis antequam disceptatio fieret, ostensum est, in medium referamus. Venerat quidam Prepositus Ordinis Regularium de Bavaria ad Curiam Romanam pro negotiis quæ habebat. Una ergo die cum oraret in Ecclesia sancti Petri, in excessu mentis raptus, vidit ipsam Ecclesiam plenam serpentibus, quorum horribili sibilo non tantum Ecclesia, verum etiam

tota Roma replebatur: sicq; vir sanctus cum
territus esset, vidit virum in habitu Ordinis
Pradicatorum Ecclesiam introeuntem;
quem cum stuperet incognitum, dictum est
ei responso diuino, quoniam Albertus vo-
caretur. Hunc ergo Fratrem dicti serpen-
tes sibilis importunis aggressi, inuoluebant
se pedibus eius & brachijs, pectori quoque
ac totius corporis membris; de quorum
medio se viriliter ac violenter excutens,
ascendit cathedram in qua sanctum Euan-
gelium diebus solemnibus legi consuevit, &
legit in ea Euangelium secundum Ioannem
vsque ad illum locum, Verbum caro fa-
ctum est, & habitauit in nobis; statimque
serpentum sibilus conuenit, serpentes
fugati sunt, & pax reddita est vniuersis.
Hac igitur quid significarent vir sanctus
ignorans, in terram suam reuersus est, &
sorori sua cuidam sancte reclusa quid sibi
Roma reuelatum fuerat indicauit. Cui illa,
vehementer exultans, Ecce, inquit, audiui
quod ille Albertus qui tibi in visione forte
monstratus est, nuper Comiti de Othen-
heim prope terram istam locuturus adue-
nit. Et Prepositus non modice gaudens in
verbo, Vadam, inquit, & videbo quis sit;
spero enim quod adhuc faciem eius ex di-
cta

Et tibi visione cognoscam. Et hæc dicens; properauit videre virum, & ex certissimis signis stature, faciei, coloris, & parua macula quam habebat sub palpebra, hominem recognouit. Indicauit ergo vir beatus dicto Magistro Fratri Alberto modum quem viderat visionis; sed neuter quid significare posset agnouit. Accidit autem postea vt facta dissensione inter vniuersitatem Cleri Parisiis & Fratres Ordinis Predicatorum atque Minorum, citatisque partibus coram Domino Papa, ipse Apostolicus Magistrum mandaret Albertum: antequam iter vellet arripere, experiri forsitan volens præfata visionis effectum. Nec eum fefellit, vt supra dictum est, facta enigmatica reuelationis veritas prophetalis; imò secundum ordinem ostense rei omnia contigerunt. Hæc omnia de verbo ad verbum ex Libro Apum prædicto.

Ex his præfatis colligimus, venerabilem Albertum non parui meriti apud Deum existere, qui prophetica visione Deo reuelante cum sanctis Euangelistis meruit, vti potens opere & sermone, designari, dum malignantium serpentum se excutiendo è medio vires calcas, & quasi benè redolens vinea odore vir-

tutum, illorum præsentiam fugat, atque
venenatos sibilos suo spiritu sedat, oues
Christi à morsibus demens mortiferis,
securitatem insuper pacis omnibus op-
tatam præbens. Quanto autem honore
dignus sit, clarè rei gestæ series & diui-
na reuelatio aperiunt: quia licet plures
magni dignitate, vt Cardinales; meri-
toque singulares, vt Hugo, Bonauentu-
ra, Humbertus, ac ceteri vnà cum Al-
berto obstiterunt in pugna pestiferis
Magistris; oraculo tamen diuinitus da-
to, vni scilicet Alberto, tamquam prin-
cipaliori, tam celebris adscribitur vi-
ctoria. Cum Abraham enim magno
patre expediti ad bellū procedunt ver-
naculi, sed patris excelsi merito quin-
que Regum cæditur exercitus: nec spo-
liorum copia cessisset vernaculis, si pa-
ter magnus Abraham absens fuisset
prælio. Poterat nihilominus & hanc
salubrem victoriam per Albertum Om-
nipotens non præmissa visione in san-
cta Ecclesia pro multorum salute ope-
rari; sed oraculo nos de Alberti merito
& dignitate docere voluit, quatenus
nobis eundem non tantum in virtutis
proponeret speculum, sed & declararet

ex merito existere patronum. Licet & aliud venerabilis Alberti in laudem ex ipsa visione notari posset non incongruè, videlicet, verum ipsum sui patris non tantum habitu, sed & conuersatione esse heredem: vt sicut Patri Dominico & sibi sociato Francisco iudiciaria ob Apostolicam vitam in Pontificem data est potestas, ita Alberto Euangelicæ perfectionis zelatori in sæuientes vesano spiritu Magistros collata est præ ceteris superandi facultas. Nec mirum, cum idem præfatus Auctor Libri Apum in eodem Libro dicat, cauendum esse summopere à detractione in filios Matris Christi, quos Fratres Prædicatores intelligit, ne iram patrocinantis & defendentis Virginis quis cum prædictis incurrat. Affirmat enim ipse idem Auctor, circa iam dictam visionem aduersarios præfatos Magistros sustinuisse confusionem, quia in Fratres Prædicatores iniuste sæuierunt; qui tunc specialissimam deuotionem ad Virginem Dei Genitricem habuerunt, de cuius patrocinio ex sua tribulatione sunt erepti. Decuit ergo, vt Virgo gloriosa & superbenedicta Domina Maria,

Fra-

Fratrum Patrona singularis, dum hostes suorum filiorum perdere voluit, non nisi per Alberti Secretarij & Scribæ manum plagam tantæ confusionis eisdem inimicis inferret.

CAPVT XXX.

Qualiter disputauit Albertus contra VVilhelmum de sancto amore, & eius complices; & de gratia in labiis Alberti infusa diuino munere.

DE ipso autem Wilhelmo præfato infamatore Fratrum Prædicatorum Frater Iacobus de Zuzato Magister in Theologia Ordinis Prædicatorum ad Magistrum Ordinis in sua Chronica clariùs scribit in hunc modum: *Libellus, inquit, De periculis nouissimorum temporum, compositus à Magistro VVilhelmo de sancto amore, Canonico Belluacensi, damnatus & combustus est per Papam Alexandrum Quartum in Ecclesia Cathedrali Anagnia, tum propter hæreses quas continebat, tum etiam propter hoc quòd contra Religiosos seditio-nem & scandala concitabat. Continebat enim*

enim quòd omnes Religiosi non laborantes, sed de eleēmosynis viuentes, saluari non possent. Contra hunc cū citatus esset ad Papam, ad Curiam Frater Albertus Teutonicus de Ordine Predicatorum mittitur, ad respondendum ei de contentis in dicto Libello. Veniens autem Albertus Anagniam, ubi tunc erat Curia, cautelosiùs inuestigabat de Libello dicto si quisquam eum haberet: compertoq̃ue quòd apud scriptorem esset, dedit pecuniam quam scriptor requisivit, & Libellum excopiarī fecit. Habuit igitur dictum Libellum integrum Albertus per diem vsualem & noctem ante Consistorium super ea causa futurum. Cumq̃ue Liber legeretur, & Albertus, sicut erat facundissimus, responderet; in labiis eius tanta gratia diffusa est, quòd omnes qui eum audierunt afficerentur stupore, glorificabantq̃ue Deum qui talem hominem ad hoc elegerat ut Ordines suos sanctos à linguis nequam per ipsum defensaret. Responsiones autem Alberti factas in Consistorio super obiectis, fideliterq̃ue reportatas, sanctus Thomas Aquinas abbrenians & in vnum redigens, ex eis Librum gratiosum compilauit, qui iam intitulatur, Thomas

contra *Vilhelmum*. hæc Magister Iacobus præfatus in dicta sua Chronica.

CAPVT XXXI.

*De exemplo quod retulit Albertus
Fratribus causâ adificationis: &
quòd in omni necessitate inuocan-
dum sit diuinum auxilium.*

SED. cortè congruum valdè fuit vt in Alberti labiis esset diffusa gratia specialis, eò quòd ipse in matre gratiæ Genitrice Dei singularissimam, vt ipsemet refert in Laudibus Virginis, habebat: vnde non tantùm doctrina & suo exemplo nos adinonet in Deum & Virginem gloriosam habere confidentiam in omni euentu, verùm & aliorum Fratrum exemplo nos instruit in huiusmodi, ne quisquam diffidat de patrocinio, si orationi institerit firma confidentia. Refert ergo nobis Pater hic venerabilis Albertus in Vitis Fratrum Prædicatorum, quarta Parte, cap. De consolationibus Fratrum, quòd cùm ipse Prior Prouincialis Teutoniæ esset receptus, fuit quidã Nouitius insufficiens scientia

tia & ætate, licet suppleret deuotio & alia bona quod deerat illi. Hic cùm Fratres ei comminarentur ludo, quòd Prouincialis eum expelleret de Ordine Prædicatorum; ipse quia hoc vltra modum timeret, contigit vt in nocte Purificationis verba illa Simeonis attenderet, quæ Ambrosius in Homilia ponit, scilicet, *Putas videbo? putas durabo? putasne hic me inueniet? putas isti oculi videbunt per quem oculi cordis reuelabuntur?* vnde miro modo affectus, post Matutinas se ad orationem prosternit; & totus resolutus in lacrymis, illa verba retorquere cœpit ad se, dicens: Domine Iesu, putasne te vniquam videbo? putasne in Ordine isto durabo? Cùm ergo mira cordis affectione verba illa frequentissimè diceret, audiuit vocem dicentem sibi: Tu me videbis, & in Ordine isto perseuerabis. Hoc autem exemplum pro Fratrum ædificatione, vt Dei adiutorium in omni necessitate requirerent deuotiùs, retulit Albertus Fratribus suis; non ignorans quòd scriptum sit: *Beatus vir qui confidit in Domino, & Ierem. 17. erit Dominus fiducia eius.*

CAPVT XXXII.

De erroribus quos damnauit Albertus tam scriptis quàm disputationibus.

FACTA autem est præfata disputatio & victoria per Alberti manum Dei adiutorio sub Alexandro Quarto, qui cœpit anno M. CC. LIV. & sedit annis septem, mensibus tribus, diebus quatuor; de quo in Chronicis manifestè etiam inuenitur, eundem damnaſſe Libros contra Religiosos Mendicantes factos, in quibus & continebatur eos debere perire anno Domini M. CC. LX. sed illorum Pseudoprophetarum dicta falsitate esse plena, euidentia contrarij euentus probat, cùm vsque ad nostra tempora, Deo fauente, in salutem multorum Ordines Mendicantium constat durare. Sed quòd ipse Albertus vicerit hunc præfatum Wilhelmum cum suis complicibus, notatur non tantùm per præfatorum Scriptorum testimonia, sed etiam ipsius Alberti verbis, vt patet Lucae XXI. circa illum Textum, *Vidua*
hac

hac pauper plus quam omnes misit. vbi sic inquit Albertus in Postilla: Istud est valde contra illos qui dicunt quod peccant qui omnia relinquunt, & postea mendicant; quia expresse laudatur vidua quod totum victum misit; quæ pro certo totum victum non dicta esset mittere, si aliunde victum nisi ex mendicatione posset habere, &c. Sed adhuc apertius loquitur idem Albertus de Wilhelmistis super Matthæum, circa illud, Sed libera nos à malo, in hunc modum sermonem prosequens: Dixit tamen Christianus Belluacensis, quod aliquando in ista petitione Ecclesia errat, videtur quia ante finem mundi Sancti erunt sine originali, & Christus cum eis corporaliter comedens & bibens, & liberi ab omnibus malis per mille annos. Sed iste error ab ipsomet, & à nobis, & aliis multis condemnatus est. hæc Albertus. Fuit autem iste Christianus vnus ex quatuor Magistris præfatis qui concitauerunt Clerum contra Mendicantes, sicut testatur Frater Thomas, Auctor Libri Apum, de eodem sic inquit: Postmodum vnus ex quatuor Magistris aduersariis Fratrum, nomine Christianus Belluacensis, infirmatus, amarissimo corde

contritus recognouit, nihil se & complices suos contra dictos Fratres habuisse, nisi quod eis equari scientia non valeret, & ob hoc paruipenderent eos Auditores. hæc in Libro Apum.

Sub iam præfato Papa Alexandro & alium pestiferum destruxit Albertus venerabilis errorem; nam in Summa sua mirabilis scientiæ Dei, Parte secunda, ubi tractat de anima, dicit errorem nimis periculosum extitisse & inualuisse suo tempore de vnitæte intellectus, dicentium quod vna sola anima intellectualis sit in omnibus corporibus. de quo errore ibidem inter multa alia ita dicit Albertus: *Hic error Auerrois habet tres partes, & nimis periculosus est, habetque multos defensores: & quia defensores huius hæresis dicunt, quod est secundum Philosophiam, licet fides aliud ponat; & ideo oportet quod secundum Philosophiam destruat. hæc ille: qui in eodem loco, postquam ad longum disputauit destruendo hanc hæresim fortissimis rationibus, sic in fine adiungit hæc verba, ita dicens: Hæc omnia aliquando in Curia collegi existens ad præceptum Domini Alexandri Papa, & factus fuit idem*

Libel-

*Libellus quem multi habent, & intitula-
tur, Contra Auerrois. hæc Albertus de
se dicit in Summa. Tractatus autem sic
intitulari solet: Albertus contra eos qui
dicunt post separationem non remanere ex
omnibus nisi unum intellectum & unam
animam. cuius Tractatus initium est
istud: Quoniam apud nonnullos qui Phi-
losophiam profitentur, dubium est de ani-
mæ separatione, &c. Insuper notandum
est, quòd idem error Auerrois iterùm
pullulavit Parisiis post mortem Alex-
andri, ita vt magni Doctores ibidem
contra Auerroistas frequentius dispu-
tarent: quorum disputatio per Alberti
sententiam robur accepit, licet absens
esset corpore: vnde quidam Frater Præ-
dicatorum Ordinis ipsi Alberto Quæ-
stiones xi. in epistola misit de errore
iam dicto, vt suam mentem etiam super
ijs explicaret; quod & fecit. Est autem
tenor epistolæ iam dicti Fratris ad Al-
bertum iste: Venerabili in Christo Patri
ac Domino Alberto, Episcopo quondam
Ratisponensi, Frater Ægidius Ordinis
Predicatorum, licet indignus, cum salute
glorificare Deum in doctrinis. Articulos
quos in Scholis proponunt Magistri Pari-
siis,*

sis, qui in Philosophia maiores reputantur, vestra Paternitati, tamquam vero intellectu illuminato, transmittere dignum duxi, ut eos iam in multis congregationibus impugnatos vos otio vestri imperij terminetis. Primus est, quod intellectus omnium hominum est unus & idem numero, &c. hæc epistola Fratris, quæ continet & alias Quæstiones. Tractatus verò Alberti super has Quæstiones vndecim notus est, cuius initium est istud: Intellectus hominis, &c. & præfata epistola Fratris Ægidij præmittitur eidem. Quando autem iste error pullulavit iterum Parisiis, ex præfati Fratris Ægidij verbis notari potest, quia scribit Alberto dictam epistolam postquam resignauerat Albertus Episcopatum. hæc autem resignatio quando fuerit, in sequentibus patebit. Præter hos autem errores venerabilis Albertus varios in suis Libris impugnat: de quibus saltem aliquos notare dignum duxi, ut sciatur quantum ipse sua doctrina Ecclesiæ præstitit. Nam contra Manichæos ponentes duo principia, vnum bonorum, aliud malorum; propter quam etiam hæresim beatus Petrus Mediolanensis

Præ-

Prædicatorum Ordinis illo in tempore
martyrizatus est; Albertus ad longum
disputat in prima Parte suæ Summæ,
vbi latissimè loquitur de bono, & eius
opposito, scilicet malo: ponitque ibi-
dem quòd habeat ortum ab antiquo
Pythagora, & quòd defensores huius
erroris se defendunt ex Scriptura malè
intellecta. Item in eadem Parte Sum-
mæ, vbi de simplicitate diuinæ essentia
determinat, eliminat aliam hæresim,
confutando potenter illos, qui Deum
ponebant esse animam mundi; & aliam
hæresim, quæ ponebat Deum esse ma-
teriam primam; de qua hæresi dicit in-
ter alia, quòd non est tantum contra
fidem, sed & contra Philosophiam, &
absurdissimum quid. In secunda autem
Parte de eadem hæresi contra David
Dinandi auctorem hæresis huius dis-
putans & conuincens, dicit hunc erro-
rem esse in suo tempore renouatum,
quamuis sit pessimus & abominabilis;
dicitque sequaces illius erroris aucto-
ritates Sanctorum non recipere, & ideò
Philosophicè esse contra eos disputan-
dum: quod & facit egregiè, rationes
eorum ex Philosophia & Poëtis addu-

ctas soluens. Hic etiam error, imò hæ-
resis, in tantum inualuit tunc, vt Alber-
tus refert in eodem articulo; quòd di-
scipulum quemdam præfati David no-
mine Baldewinum contra se disputasse
dicat; cuius tamen rationes fortiores di-
cit esse viles. Quæ omnia qualiter sunt
Philosophicè per Albertum in dicta
secunda Parte interempta, inuenies cir-
ca illam Quæstionem, vbi quærit an
hæc duo compossibilia sunt secundum
intellectum; scilicet, quòd mundus à
Deo sit factus, & tamen duratione hoc
modo sit æternus, quòd duratio eius
initium non habuerit. Item alium er-
rorem hæreticum damnat in secundo
scripto, distinctione vi. quem dicit esse
vnum de erroribus Græcorum moder-
norum, scilicet quòd nullus descendit
in infernum vsque ad diem iudicij; &
ideò ibidem dicit ampliùs esse dispu-
tandum contra illum. Quas Disputa-
tiones ibi inuenies, & quòd initium
sumpserit ex errore Platoniorum di-
centium secundam & tertiam genera-
tionem. Insuper ibidem hunc errorem
Platoniorum similiter damnat, & vn-
de habuit occasionem dicit: vbi etiam
inue-

inuenies quòd somnium Scipionis super illo fundatur errore. Alium errorem eliminat ab Ecclesia in tertio scripto, distinctione xxii. illum videlicet, quòd ascensio Christi non dicat motum localem; quod apertè est contra sacram Scripturam. Item in Libro de Eucharistia alios errores periculosos multos damnat: vnum qui dicit, quòd Christus non continetur tam sub forma panis quàm vini veraciter: de quo ait, quòd non est error, sed hæresis manifesta, & liber deberet comburi vbi hoc reperitur: de quo errore sic profequitur inter alia: *Quamuis, ait, ipsi tales heretici respondeant ad omnia obiecta aliquo qualiter modis responsionis, tamen nullus Christianus debet de huiusmodi penitus curare; sed constantissimè dicendum est, quòd heretici sunt qui tenent illam opinionem, quia pro certo nulla Catholica responsio ad ea quæ obiecta sunt potest adhiberi: unde illam opinionem hereticam pronuntiamus. Et si dicitur quòd in Decreto & Sententiis continetur; dico quòd in his Libris non continetur ut determinata veritas, vel sicut opinabilis probabilitas; sed sicut per disputationem condemnanda hæ-*

*retica falsitas. Tamen in scientia Sacramentorum non multum attendenda est sententia Decretistarum, quia pro certo multa falsa de talibus scribunt & dicunt, eò quod sunt homines ignari in sacra Scriptura, nescientes originalia Sanctorum; nec possunt nisi peccare, docentes in fide Catholica qua ignorant. hæc Albertus. Ex his verbis Alberti non parvam instructionem sumere possumus, cum nobis innotescit quod multi docent quæ ignorant, & ideò benè notandi sunt huiusmodi Doctores docentes quæ non didicerunt: plures enim nostro tempore sunt qui potius Rabbi vocari maluerunt quàm esse; quibus nec ignorantia verecundiam adducit, nec præsumptuosa audacia, qua usurpant quod non debent, incutit timorem. Tales enim in periculum animarum suarum & aliorum docent; & quanta mala eueniunt inde, notent sapientes. Benè ergo beatus Iacobus dicebat: *Nolite plures magistri fieri, fratres mei, scientes quia maius iudicium sumitis.* Aliam quoque in Libro de Eucharistia damnat Albertus opinionem; illam videlicet quæ dicit, in Sacramento Altaris substantiam panis*

& vi-

& vini manere cum Corpore Christi. De hac opinione rationes fortes & signa quæ inducuntur à defensoribus opinionis illius Albertus soluit, & falsitatem opinionis ex verbis Domini ostendit; subiungitque quòd licet non sit hæresis, est tamen valdè incauta, & hæresi valdè vicina. Item in secunda Parte mirabilis scientiæ Dei, circa finem, vbi agit de peccatis, interemit heresim, quæ dicit coitum soluti cum soluta non esse mortale peccatum : quam hæresim dicit esse Græcorum. Sed ipse ibidem validis rationibus sacræ Scripturæ & Philosophicis eos vincit, dicitque Græcos fuisse coactos reuocare suum errorem in Concilio Lugdunensi. Sed & ipse Albertus in Lugdunensi fuit Concilio, vt infra habetur ; destruxitque alios varios errores, de quibus omnibus enarrare breui non posset quis tempore. sed & mirabiliter reprehendit in Libro suo de Eucharistia illos qui Philosophicis rationibus volunt discutere secreta sacræ Theologiæ, dicitque eos committere tria & quatuor scelera, adducens Amos Prophetam, qui loquitur de tribus & quatuor sceleribus. Quæ

autem sunt scelera ista, in præfato Libro Alberti egregiè inuenies, quæ hîc causa breuitatis omissa sunt. Factum igitur est non sine speciali ordinatione diuini consilij, vt Doctor hic mirabilis in omni scientia singularis excellentiæ tunc Ecclesiæ mitteretur, cùm ipsa variis erroribus quasi nebulosa caligine inuoluebatur, quatenus tanti luminis radiis vndique effusis lux veritatis per orbis latitudinem cunctis verum desiderantibus redderetur. Et quia de tot erroribus Albertus sanctam Ecclesiam, gratia Dei adiutus, eripuit; euenisse dicitur, quòd ex Ordine Fratrum Prædicatorum Lector Sacri Palatii semper habetur, eò quòd inter Mendicantes Albertus propter excellentiam scientiæ & victoriam iam dictam primus fuerit. Sed hoc insuper ex suprâ dictis notandum est, quòd quia venerabilis Albertus contra vitiosos singulariter certauit verbo & scripto; nulli ambiguum, quin & ipse præ aliis Fratribus à malis tela infamiæ est expertus: nam tunc tribulatio tanta fuit, vt pænè Fratres desperarent de subsistentia Ordinis: de quibus omnibus multa

multa adducere possem, nisi breuitas, cui intendo, obisteret. Hæc autem tribulatio iam dicta, qua Fratres vexabantur permaximè, fuit infamatio quam sustinebant à Clericis quibusdam, vt superiùs dictum est per Fratrem Thomam in suo Libro Apum: qui testatur, quòd cum nihil aliud facere poterant, litteras infamatorias plenas mendaciis contra Fratres per diuersa Regna miserunt. Vnde autem processit odium illorum, ex supradictis notatum est: nam quidam oderant, quia scientia æquiparari non poterant Fratribus Doctoribus in Ordine, quales fuerunt Albertus, Hugo, Gwerriens, sanctus Thomas, Petrus de Tarentasia, & alij multi. Alij autem odij seminarium habuerunt ex audientia confessionum, quæ commissa fuerat Fratribus, quatenus in huiusmodi labore adiutores essent Pastorum in Ecclesia Christi. Sed tales adiutores, vtique necessarios, quidam excacati nescio quo stercore, videre non poterant; quare turbati, diuerso genere infamationis Fratres lacerabant: vnde quidam, dum nil probabilis mali Fratribus imponere poterant, illo

intempore quo Fratres primitus Colonix locum ad habitandum susci-
perent, suggesserunt Reuerendissi-
mo Domino Archiepiscopo Colo-
nensi Domino Engelberto Primo, di-
centes mendaciter, tamquam de dictis
Fratribus prophetatum esset, quia ipsi
essent seductores populi. Sed ille vir
sapiens & amator Religionis, con-
temnens ipsorum mendacium, respon-
dit: Si prophetatum est, ergo impleri
necesse est Prophetiam. recipiamus igitur
illos. Maluit enim ipse in verbi Dei
prædicatione, utpote strenuos milites
Christi, cooperatores habere Fratres,
quàm offensam temporalem vanorum
hominum malè suggerentium timidè
declinare. Amabat quippe ipse venera-
bilis Antistes, uti verus pastor, inferen-
tes pascua salutis suo gregi: imò & ipse
pastoris officium non deserens, dum
Essendienſe Monasterium ad reforma-
tionem morum reducere modis omni-
bus laboraret, insidiosè à nobilibus
quibusdam, in hoc non nobilibus, pro-
pter suam religiositatem in via diris
vulneribus sauciatur, occiditur, ac in
Ecclesia sancti Petri sepelitur, miraculis

ut fertur coruscando. Postquam verò recepti fuerant Fratres gratiosè, non tamen defuit satan, quin suis malitiæ iacula ministraret: vnde circa Alberti tempora, cum quidam Legatus missus fuisset in Alamanniam, contigit, sicut refert Frater Thomas in Libro Apum circa principium, ut ille Cardinalis Legatus, nomine Conrardus, in Colonia præsideret in Synodo, cui quidam Sacerdos Parochialis conquestus est, dicens: Ecce Fratres Ordinis Prædicatorum, qui in damnum nostrum Coloniam intraverunt, falcem mittunt in messem alienam, audiunt confessiones subditorum nostrorum, & per hoc attrahunt sibi homines in fauorem. Cui mox Conrardus Legatus respondit: Quis est numerus hominum tibi in Parochia subditorum? Et ille, Nonem millia, inquit. Et consignans se Cruce Legatus, Quis es, ait, miserrime, qui tot millibus solus sufficis debitam gubernationis curam impendere? Nescis hominum perditissime, quia in illo debes tremendo iudicio ante tribunal Christi de ijs omnibus respondere? Et tu, si tales habes vicarios, querularis, qui onus tuum gratis releuent, sub cuius pondere nescius conquassaris? Ergo

ex hac querela indignum te cura omnimoda indicasti, & ideo prius te omni beneficio Pastoralis. hæc in Libro Apum. Sed & ipse Albertus aperit, quare huiusmodi Fratres dati sunt in adiutorium Parochialibus Sacerdotibus, ut patet in quarto suo scripto, distinctione xvii. ubi sic ait: Et si data est licentia quibusdam audiendi eos quos monent verbo sua predicationis, firmissimè credendum est, quod propter nimiam Sacerdotum negligentiam hoc Summus Pontifex dedit; quia peccatis nostris crescentibus in hoc fine sæculi, & per pauci inveniuntur Sacerdotes qui veri sint Pastores. hæc Albertus: qui consequenter ibidem adiungit, etiam esse periculosum petere licentiam alteri confitendi à plerisque Sacerdotibus. Similiter quæ ipse expertus est, & quàm periculosum est audire confessionem, si inidoneus sit audiens, ab ipso positum ibi reperies. Ex suis etiam verbis in eodem scripto clarissimè inuenies, ipsum Albertum non parum laborasse in confessionem audientium. Tantæ autem contra vitiosos, cum necessitas requirebat, austeritatis in iniungendis pœnitentiis Albertus
exti-

extitit, sicut de ipso Frater Ioannes Columbariensis, qui conuersationem eius nouerat, refert in sua Chronica, vt septennem pœnitentiã imposeret pœniti dũram satis; sciens quos aqua contritionis sufficienter mundare non ualeat, lima asperæ increpationis à rubigine exuens ad puritatem perducit. Nec utique huius onus suscepissent pœnitentiæ peccatis obnoxij, nisi sua prædicatione ignita Albertus singularis perfectionis illos inclinasset.

Præfata autem tribulatione & infamatione cessante, scripsit Magister Humbertus anno Domini M.CC.LVIII. ex Capitulo Generali Tolosæ celebrato litteras toti Ordini cui præerat, vt refert Frater Bernardus de castris sancti Vincentij in sua Chronica; monens omnes Fratres, quatenus iam deuotiùs Dei operi insisterent, quia essent liberati de tam magna vexatione, qua totus Ordo tribulabatur: fuerant namque ob hanc tempestatem non modicè Fratres in seruitio diuino præpediti.

CAPVT XXXIII.

Quòd Albertus coactus per obedientiam Episcopatum suscepit: & de Epistola Humberti, in qua multipliciter Alberti laus describitur.

CIRCA idem ergo tempus Ratisponensis Ecclesia destituta Pastore proprio, turbine aduersitatis permota est. Clericis enim in electione noui Pontificis discordantibus, in hoc tandem conueniunt, vt Summo Pontifici de institutione Episcopi memoratæ Ratisponensis Ecclesiæ causam committerent. Ipso autem in tempore, propter errores quosdam eliminandos, ab Urbano Quarto, qui cœpit anno Domini M. CC. LXI. ad Curiam Albertus est vocatus. Et quia Romano Pontifici incumbibat ponere Pastorem Ratisponensi Ecclesiæ, gauisus est quòd tantum virum secum haberet, cui hanc curam securè imposeret. Albertum igitur, licet plurimùm renitentem huic dignitati, ad Episcopalem promouit cathedram Ecclesiæ Ratisponensis. Quòd
autem

autem Albertus coactus sit per obedientiam huiusmodi suscipere honorem & curam, non tantum ex ipsius Legenda habetur, verum & ex Chronica Fratris Bernardi de castris sancti Vincentij, contemporanei Alberti; nam in ipsa Chronica sic ait Bernardus ille iam dictus: *Albertus Episcopatum Ratisponensem coactus recepit; sed paulo post tamquam carbonem ardentem, manus adurentem, obtenta cessione reiecit.* Imò & ipsa epistola Magistri Humberti ad Albertum idem indicat, in qua & ipse venerabilis Doctor à præfato Magistro Humberto multipliciter laudatur de variis virtutibus. Est autem epistolæ iam dictæ tenor iste: *Charissimo in Christo Fratri Alberto, Lectori Colonienſi, Frater Humbertus Ordinis Prædicatorum servus inutilis æternam in celo salutem, & in mundo radiare gloriosis meritis & exemplis. Rumor quidam per quasdam litteras nuper euolans à Romana Curia nostrum auditum attingens, & viscera nostri cordis penetrans, nos in direptionem interminabilem funditus prostrauisset, nisi fiducia sancta & firma, quam de vobis in omni bono gerimus, restitisset. Intelleximus*

siquidem, quòd in Curia supradicta dicitur ordinatum, quòd vos ad quamdam Pontificalem dignitatem debeatis assumi. Quòd quidem si ex parte Curie posset credibile non immeritò reputari: tamen quòd vos inclinari possitis ad consentiendum ordinationi, quis, qui vos nouerit, posset credibile iudicare? quis inquam credere posset, quòd vos huiusmodi maculam in ultimo uite, vestre glorie & Ordini, quem ita gloriosum fecistis, inferre velitis? Quis, queso, charissime & amantissime, non solum de nostris, sed de omni Religionis genere pauperis de transendo ad dignitates resistet in perpetuum, si in ijs succumbere vos contingat, & non potius in excusationem sui vos in exemplum sumat? Quis secularis hoc audiens non scandalizetur in vobis & omnibus professionis similis, reputans nos paupertatem non amare, sed sustinere solum quamdiu eam effugere non valemus. Non moneant vos, obsecro, consilia seu preces Dominorum nostrorum de Curia emanantia, in qua citò & facile huiusmodi verti solent in sibilum & derisum. Non frangant vos aliqua molestia Ordinis, qui vniuersaliter omnes diligit & honorat, & de vobis specialiter in Domino gloria-

gloriatur : quas etiamsi grauiiores essent
quàm umquam fuerunt vel futura sunt,
etiamsi alios deiicerent, vestros giganteos
humeros lætè portare quantum deceat, ve-
stra prudentia non ignorat. Non flectant
vos precepta Papalia, quæ potiùs in huius-
modi verbalia sunt, quàm mentalia repu-
tantur, nec aliquem volentem efficaciter
resistere reperiuntur finaliter coëgisse; nec
solet huiusmodi sancta ad tempus inobe-
dientia famam hominis ledere, sed auge-
re. Consideret circumspèctio vestra quid
actum sit in illis, qui ad similia se trahi
permiserunt; quæ fama eorum, quis fru-
ctus, qualis status, qualis finis eorum. Re-
uoluite diligenter in corde vestro, quanta
perplexitas, quanta difficultas occurrit in
regimine Ecclesiarum in Teutonia, &
quàm difficile sit ibidem vel offensam Dei
vel hominum declinare. Denique quomodo
poterit anima vestra pati implicari tota die
terrenis negotiis, & in periculis peccato-
rum versari, quæ tam vehementer sacras
Scripturas & conscientie puritatem di-
lexit? Quòd si fructus animarum à vobis
quaritur, attendite quomodo per huius-
modi status mutationem & animarum
fructus innumerabilis, quem non solum in
Teuto-

Tentonia, sed ferè per totum orbem indubitanter facitis fama & exemplo & scribendo, penitus deperibit. Quem autem in Episcopatu facere debeatis, penitus est incertum. Videtis etiam, dilectissime, quòd totus Ordo noster de tribulationibus maximis erutus, de nouo maxima consolatione est repletus; sed quid esset si in profundiorum mœrorem ex aliquo vestro reduceretis eundem? Vtinam prædilectum filium meum citius audiam in feretro quàm in cathedra sublimari! nec sic tam mei amissa spe firmitatis in talibus alij recedant de hoc seculo cum mœrore. Flexis ergo cordis genibus, per interemeratam Virginis & eiusdem Filij humilitatem vos adiuro, ne statum humilitatis vestrae dimittatis, secundum quod fortassis hostis sublimitas vel subtilitas procurauit in plurimorum damnum & scandalum, in eius caput redundet ad vestram & nostram duplicem gloriam & honorem. Rescribite consolatoria, quæ nos & alios Fratres nostros & vestros dilectissimos consolentur & eruant à timore. Orate pro nobis. Gratia Iesu sit vobiscum. Amen.

Ex hac epistola notatur primò, quòd
non

non statim Albertus acceptavit hanc dignitatem oblatam; aliàs enim rumor non præcessisset de eius assumptione. imò & ipse Humbertus testatur de firmitate eius sancta, quòd ad huiusmodi dignitatem pronus non esset, propterea monet ne Papalia mandata & consilia Cardinalium & preces ipsum non inclinent, quem sciebat ex propriis affectibus ad dignitates non anhelare: & idè etiam proponit pericula quæ ipsum possent inuoluere in Episcopatu. Sed hoc principaliter est notandum ex epistola, quia Humbertus non tantum timuit de Alberti periculo, sicut de eius ablatione ex Ordine. Talem enim virum, qui tam gloriosum fecerat Ordinem, & de quo specialiter Ordo gloriabatur, & idè Humbertus & se & alios Fratres quasi desolatos fieri testatur, si Albertus eis auferatur.

CAPVT XXXIV.

Quòd Albertus multipliciter de virtutibus & scientiis laudatur à magnis viris.

DE virtutibus autem Alberti quæ in hac epistola continentur veridica testatione, placet breuiùs notare. Primò namque notatur quòd non incredibile posset esse ex parte Curia, quòd reciperetur ad huiusmodi dignitatem. vnde notatur ipsius sufficientia ad Pastorale officium. Secundò notatur, Albertum tantæ constantia fuisse in humilitate, quòd incredibile fuit omni eum noscenti quòd ad dignitates posset inclinari. Tertiò, quòd nulla macula infamiae Albertus fuerit denigratus. Quartò, Humbertus dicit Albertum vehementissimè semper sacras Scripturas & conscientia puritatem amasse, & ideò impossibile dicit esse, illam animam terrenis posse implicari negotiis. Quintò notatur, Albertum innumerabilem fructum animarum non solùm in Teutonia, sed ferè per totum orbem

orbem indubitanter fecisse, & hoc per
tria; scilicet, præclara fama, sanctis ex-
emplis vitæ suæ immaculatæ, & doctri-
na mirabili & perutili in scribendo &
exponendo Legem Domini, quam tam
avidè dilexit. Sextò nota, quod dilectus
fuerit Albertus toti Ordini, cùm istæ
omnes maximæ tribulationes quæ præ-
cesserunt, & iam Fratres ex ijs liberati
fuerant, non tantum mœrorem Fratri-
bus intulerunt, quantum istius homi-
nis ablatio de Ordine per hoc si Epi-
scopus ordinaretur. Et ideo Humbertus
adiurat Albertum singulariter per
humilitatem Virginis gloriosæ suæ di-
lectæ, ne se & Fratres deserat, sed con-
solatoria rescribat. Sed quia Albertus
resistere Papali mandato nequieverat,
coactus est subire sarcinam Pastoralis
officij; huic enim stimulo Papali man-
dato resistere, quandoque durum est:
quare & multos nouimus ob istiusmo-
di mandatum in hac re succubuisse, vt
Dominum Antoninum Ordinis Præ-
dicatorum, & alios. Et quia virtutibus
plenus Albertus extitit, peroptimè te-
stificatus est non solùm præfatus Ber-
nardus & Humbertus in epistola, ve-
rùm

rùm & ipse Vlricus in sua Summa ita
inquiens: *Albertus Doctorem meum, quon-*
dam Ratisponensis Episcopus, vir adeò
diuinus, ut nostri temporis stupor & mi-
raculum congruè vocari posset. Sed &
Thomas auctor Libri Apum dicit, Al-
bertum perfectum fuisse virtutibus; &
ideò profecisse eundem testatur in
scientiis supra hominem. Præter illos
autem iam nominatos qui secum con-
uersati sunt in hac mortali vita, & alij
excellentes & boni viri de ipso red-
dunt testimonium, ut Compilator Le-
gendæ sancti Thomæ, sicut patuit. Papa
etiam Pius huius nominis Secundus,
qui & Siluius Æneas, vir prudens & in
multis expertus, cuius ingenium scri-
pta propria commendant, de sanctitate
Alberti non dubitans, in epistola quam
ad Turcū scribit admonendo de Chri-
stiana Religione suscipiendā, ita inter
alia prosequitur: *Dominicus in extremis*
Hispania natus oris, quasi alius vesper
emicuit, qui nouum quemdam sanctum &
nitidum viuendi morem suis auditoribus
tradidit, & Predicatorum instituta Re-
gula vniuersum illustrauit orbem. Multi
ex discipulis eius clarissimi euaserunt, sed
pra-

præcipua est Magni Alberti fama, qui nullum doctrinæ genus ignorasse creditus est: nec minor eo Thomas Aquinas fuit in litteris, etsi maior extitit sanctitate. hæc Papa Pius. Supponit igitur, sanctum esse Albertum, licet in hac parte Thomam, quia ab Ecclesia iam canonizatum, prætulit. In quo autem gradu sanctitatis sunt, & quis maior ipsorum, soli Deo ad plenum notum est; ipse enim ponderator est spirituum. Religiosus insuper Frater Iacobus Florentius Ordinis Fratrum Minorum, cum beati Thomæ commendare sanctitatem & scientiam cupit, ut patet in Prologo Summæquæ Pantheologia dicitur, edita à Fratre Reinerio Ordinis Prædicatorum, ita ait: Seraphici Dominici normam imitantes, amulatores illius sanctimonie ac splendidissimæ sapientiæ extiterunt: Albertus ille Magnus ingenio & claritate doctrinæ emicuit, à cuius latere Aquinas Thomas exornatus exemplo in omni genere doctrinæ enasit. hæc ille.

CAPVT XXXV.

*Qualiter Albertus ad Ratisponam
venit missus cum benedictione à
Papa.*

POST Episcopatus verò susceptionem, à Domino Papa accepta benedictione, Albertus de vrbe Romana cum decenti Fratrum comitiua egreditur, longoque confectus labore itineris, Bauariæ tandem fines ingreditur. Cùm autem ciuitatem Ratisponensem post solis occasum fuisset ingressus, vt sine strepitu & pompa res ageretur, ad Ecclesiam sancti Blasij, quam Fratres Prædicatores inhabitant, humiliter declinavit; vbi à Fratribus miro cum fauore susceptus est. Manè igitur factò, cùm Missarum solemnia agerentur, venerabilis Præsul Albertus Fratrum cæterua stipatus, Ecclesiam Cathedralem ingreditur, vbi Clerus & populus ad recipiendum Episcopum, quem venturum nouerant, fuerat congregatus. Intransque Chorum inter psallentium Clericorum & nobilium frequentiam
maius

maius Altare petiit, ibique diu pavimento adhærens, deuotè orationi incubuit. Interim autem concursus vtriusque sexus per totam excitatur ciuitatem; & ecce completa oratione, à Clero cum Canticis lætitiæ more Pontificum inthronizatus, summo commendatur Pastori, Deum benedicientibus quia talem digni sunt habiti supra se videre Sacerdotem, quem vitæ sanctitas commendat, & doctrinæ claritas cum celebri fama totius orbis spectabilem reddidit vniuersis.

CAPVT XXXVI.

*De simplicitate eius in Episcopatu,
& alijs quæ gessit.*

PASTOR itaque in populo Dei factus, eadem in corde humilitas, eadem in vestimentis ipsius vilitas fuit. Sic implebat officium Episcopalis dignitatis, vt non desereret Ordinis sui austeritatem, & conscientię puritatem: nam calceamenta sua rusticana ferre non erubuit; vnde à Bauarorū populo Episcopus cum botis, id est magnis & grossis sotu-

secularibus, vulgariter appellabatur. nimirum vir Dei meditationi, Legis Dei intentus, toto nisu circa cultum interioris hominis sollicitus, parum de exteriori ornatu cogitabat. Non etiam phaleratorum equorum usus pompa, ut multis est consuetudo; sed cum religiosa societate aliquando pedester diœcesim visitando incedebat, tantum iumento quod Episcopalia ornamenta deferebat contentus. Ut autem vir Dei Deo securius vacaret, secularia negotia fidelibus viris committere voluit, ne ijs præpeditus, de negligentia ouium Christi argui posset: unde in Dei opere nihil prætermittens, sacris meditationibus, orationibus, ceterisque ad Episcopalem perfectionem pertinentibus insistebat quotidie. Inter cetera verò sui ingenij & sanctitatis monimenta quæ in Episcopatu ostendit & gessit, insigne volumen super Lucam edidit: quod profectò volumen, quàm liber ab omni seculari actione Deo soli adhærens extitit, quo spirituque feruebat declarat lucidè, ita ut plerique constanter dicere audent, quòd specialissimo dono sancti Spiritus pro tunc cum dictaret

etaret & conscriberet hoc volumen, sit inspiratus : Liber enim ille spirat cælestium charismatum singularem suauitatis odorem, prolixiorque est Liber ipse alijs per ipsum editis voluminibus in Biblia. Postillam verò hanc super Lucam, vt aiunt, propriis manibus scripsit humilis & laboriosus Albertus; in cuius rei testimonium est Liber ipse de manu eius propria in Conuentu Ratisponensi Ordinis Fratrum Prædicatorum, quem pro tanti Patris reuerentia, tamquam magnum aliquid conseruant. In memoriale sui ipsius, puta in ædificiis nouis construendis & ampliandis terræ terminis, nihil attentare voluit, qui ampliorem, non manufactam, æternam in cælis domum intrare cupiebat; sed animabus in æternum victuris, ne deperirent, vigilanter curam egit: gloria enim temporalis illi erat fastidio; humilia semper amplectebatur, memor propriæ sententiæ quâ in Postilla ponit, sic loquens: *Qui fastu superbia elatus humilis non est, etiamsi in Choro Christi residet, nullus in regno Dei est.* Fecit tamen ex sola pia deuotione, quam ad suum Patrem habebat Dominicum,

memoriale istud, ordinans scilicet in Ratisponensi Ecclesia & statuens perpetuò de eodem Patre tenendum Offici-um per Festiuitatem ipsius, disponens nihilominus dari Canonicis distribu-tiones pecuniæ eodem die, quæ fieri in Collegiatis solent Ecclesiis, quas Præ-sentias quidam appellant.

CAPVT XXXVII.

Quare Albertus resignauit Episco-patum, & quòd laudandus sit pro-pter hoc factum.

ELAPSI igitur paucis annis post-quam præclarus præsul Albertus memoratam Ecclesiam laudabiliter re-xisset, multi non ferentes eius sanctam conuersationē, & ille etiam tumultuum diuersorum turbinibus cū torquere-tur, cernensque in populo duro non posse proficere, tanto affectus, utpote cui honor Prælationis & amicitia ho-minum peccatorum non sapiebat, time-retque de periculo quod Alamanniæ Episcopos ob temporalis dominiij gra-uamen ad multa damnabilia quando-que

que pertrahit; elegit magis contempla-
 tioni & meditationi scibilium & Sacra-
 rum litterarum in Ordine, de quo as-
 sumptus fuerat, intendere, quàm Pasto-
 ralis curæ negotiis sine fructu inserui-
 re. De licentia igitur impetrata per eum
 à Summo Pontifice Clemente Quar-
 to, successore Urbani prædicti, relicto
 Præsulatu, relicto patrimonio Episco-
 pali, insignique vrbe sua Ratisponensi,
 ad Ordinis sui paupertatem voluntariè
 rediit secundo anno præfati Clementis
 Papæ. Hæc nobis indicant non tantùm
 Legenda & Chronica vnà cum testi-
 monio Fratris Bernardi sæpè dicti, ve-
 rùm & ipse Albertus met quasi impli-
 citè suis verbis in Postilla sua super
 Lucam, quam in Præsulatu scripsit,
 quasi iam premeretur onere Pastoralis,
 sic indicat, vbi dicit circa illud xxii. cap.
Sed qui maior est in vobis, fiat sicut minor.
Qui maior in vobis potestate spiritali, fiat
sicut minor qui ad nullam eligitur potesta-
tem: quia sicut dicit Philosophus, Nemo
eligit iuvenes Duces, quia constat eos non
esse sapientes. Matth. xviii. Quicum-
que humilianerit se sicut paruulus iste, hic
maior est in regno celorum; quia ille magis

est ad fundandum Ecclesiam idoneus. In primitiva enim Ecclesia non curabatur multum de potestate, sed omnes ad humilitatem & charitatis exempla respiciebant; & hoc etiam voluit Dominus, cum dixit: Discite à me, quia mitis sum, & humilis corde. Tollite iugum meum super vos, &c. Nihil enim lenius est, quam in humilitate & mansuetudine gubernare subiectos quamdiu tempora hoc patiuntur: statim autem quando multitudo malorum cogit eum severitate & austeritate procedere, tunc sicut & Moyse res intolerabilis esse videtur, Numer. xx. ita efficitur etiam Prælati Ecclesie intolerabilis; nisi aliquis fastu delectatus, velit tolerare vel fortè fouere malos, sicut faciunt Prælati nostri temporis, qui magis vicem habent Sardanapali quam vicem Iesu Christi. hæc omnia venerabilis Albertus in loco præfato habet de verbo ad verbum. Insinuat planè istis verbis vir sanctus iste, Prælaturam intolerabilem fore cum excreuerit malorum multitudo: impeditur enim tunc Prælatus non à profectu ex parte malorum, sed & in bonorum fructu, ac à propria deuiat quandoque perfectione: & idèò prudentissimè fecit

cit Albertus in tali articulo constitutus. Sicut enim virtutis fuit constantiæ & humilitatis, non citò consentire assumere dignitatem Episcopalem; ita obedientiæ fuit, onus impositum coactione Superioris non abiicere: ac demū in articulo periculi sui ipsius illud quod impositum erat relinquere cum consensu Superioris, summæ fuit prudentiæ, eò quòd malitia hominum non proficientium & suum poterat impedire profectum. Hæc omnia profectò magnæ fuere perfectionis: ideò pluribus difficilia videntur, eò quòd paucos huius Regulæ nouimus imitatores. Fuerunt tamen nonnulli, sed sancti, quos & hic Beatus est imitatus; sicut & Cælestinus Papa, qui ex eremo ad Papatum raptus est, sed post paululum resignans, quia proficere nequibat, Ordinem qui Cælestinorum dicitur instituit, & canonizatus postea fuit sub nomine Petri Confessoris, quod nomen ei proprium antè fuerat. Illius etiam quasi mentis videtur fuisse Benedictus Papa XI. de Ordine Prædicatorum, qui continuis precibus rogare Deum consuevit, ut eum de medio tolleretur, ne Pastoralis

onere grauaturs deficeret. Ita Petrus Damiani Episcopatum resignauit, & cùm postea increpatus ob hoc fuisset, rationem reddendo respondit, hoc idem multos fecisse Sanctos; puta Valerium, qui sibi Augustinum substituit: Lucidum quoque Citocensem, qui in cœnobium conuolauit, cui tamen beatus Andreas obitum suum denuntiavit, vt ait Gregorius in Registro: Adalbertum quoque Pragensẽ Episcopum induisse Monachum; & martyrij palmam promeruit: item & alium quemdam, cui Angelus sanctus & beatus Remigius apparuerunt. Et apponit rationem istis exemplis idem Petrus Damiani, sic inquit: *Melius est pondus abijcere, quàm cum detrimento Domini, cuius ego seruus sum, fractis cernicibus intrare.* hæc Petrus Damiani pro se respondit, licet multum idoneus esset ad Ecclesiasticum regimen, & vir prudentissimus. Cum omnibus ergo istis Beatis qui resignauerunt, venerabilis Albertus laudandus est permaximè. Veniens itaque Albertus Coloniam post resignationem ad Fratres suos, magno cum fauore, vt decuit, suscipitur ab eisdem: &

mox

mox iuxta morem pristinum scribebat Libros, & docebat indoctos, regulari obseruantia in omnibus subiectus; tantò perfectior in singulis quæ agebat, quantò gradum excellentiorem in Sacerdotio & Magisterio occupabat.

CAPVT XXXVIII.

Albertus fundat Monasterium Virginum, & Chorum Fratrum construxit ob rationabilem causam: & de reuerentia ei exhibita ab omnibus ob suam probitatem.

ALIVANTO autem elapso tempore venerabilis Albertus insigni Sanctimonialium Monasterium fundauit sub cura Ordinis Fratrum Prædicatorum apud Zuzatum quod Paradisus dicitur. Continuisque virtutum exercitiis florens, in Dei opere indefessus, cum Fratrum necessitatem cerneret, studuit quantocyùs releuare: locum namque Chori pro psallentium Fratrum caterua considerans nimis esse angustum, de Maiorum suorum beneplacito latiore fecit, fultus Fidelium

auxilio in opere incepto. De quo retro
 summum Altare ob eandem causam
 post obitum ipsius in vitrea fenestra,
 vbi ipse depictus est vnà cum Archi-
 episcopo Colonienſi, qui eum ſepultu-
 ræ honorificè tradidit, hi verſus inſcri-
 pti ſunt:

*Condedit iſte Chorum Præſul, qui Phi-
 loſophorum*

*Flos & Doctorem fuit Albertus, ſcho-
 la morum,*

*Lucidus errorum deſtructor, obexque
 malorum.*

*Hunc rogo Sanctorum numero Deus
 adde tuorum.*

Et qui virtutibus plenè adornatus exti-
 tit, ab omnibus amabatur; in reueren-
 tiæque magna habitus eſt non ſolùm
 apud populares, ſed & ab ipſis Prælatiſ
 plurimùm honorabatur: vnde Reue-
 rendiſſimus Archiepiſcopus Colonien-
 ſis Siffridus de Weſterborch, qui affe-
 ctuoſè Patrem Albertum dilexit, con-
 ceſſit eidem vt in ſua diœceſi, vbi-
 que rogatus fuiſſet, in Pontificalibus
 celebraret, & alia quæ Pontificiſ ſunt
 exerceret. Vnde multas Eccleſiaſ in ea-
 dem diœceſi conſecrauit, Ordines quo-
 que

que pro eodem Domino prefato Siffri-
do quandoque celebrare solitus erat.
Eamdem etiam reuerentiam ei cetera-
rum Ecclesiarum Pontifices, quando in
eorum territoriis erat, detulerunt: vnde
quodam tempore in Argentina rogatus
ab eiusdem ciuitatis Episcopo, ferè cen-
tum Clericos ad Ecclesiasticos promo-
uit Ordines vna die. Sic & Basileæ Ec-
clesiam Fratrum in honorem beati Do-
minici Patris sui dicitur consecrasse.
Fertur insuper multa Sanctorum cor-
pora in Colonienſi vrbe, Deo reuelan-
te, venerabiliter de terra tranſtulisse.

CAPVT XXXIX.

*Albertus cum magna deuotione bien-
nio ante mortem suam tranſtulit
sanctam Cordulam.*

CONTIGIT enim suo tempore, anno
videlicet M CC. LXXVIII. sub Ioan-
ne Papa XXI. Rodulpho autem Rege
Romanorum, & sub Siffrido Archiepi-
scopo Colonienſi prædicto, in die san-
cti Valentini martyris, sequens reuela-
tio de corpore sanctæ Cordulæ virgi-

M 5 nis,

nis, quæ fuerat ex Reginis sanctarum Virginum cum beata Virgula interfectarum, de cuius translatione apud Fratres sancti Ioannis, hæc quæ sequuntur ad integrum habentur temporibus Alberti conscripta. *Post trinam, inquit, admonitionem factam cuidam Fratri Ordinis sancti Ioannis in Colonia de corpore sanctæ Cordula, quæ fuit una de societate beatarum undecim millium Virginum, inuentum est corpus eiusdem sanctæ Virginis cum diuersis insignibus, quæ apud corpora earumdem Virginum consueuerant inueniri. Quo in loco suauissimi odoris fragrantia etiam respersa est. Sed Prior præfati Fratris anxius quid ageret circa tam arduum negotium, consilium petere non distulit. Vnde cùm illis temporibus vir reuerendus & venerabilis Dominus Albertus Ratisponensis Episcopus, Ordinis Predicatorum, Professor sacre Theologie, qui illis diebus in scientiis & studiis liberalibus, tam diuinis quàm humanis, nulli, ut creditur, secundus habitus, in sancta ciuitate Coloniensi frequenter moram traheret, eò quòd iam senio confectus in ealocum habitationis perpetua delegisset, eundem celerius adiit consilium ab eo super ijs petiturus,*

rus, dimissis medio tempore sacris illis ossibus discoopertis & intactis. Veniens itaque apud dictum Pontificem, narrauit ei per ordinem historiam facti super tribus apparitionibus istis, & non minùs de sacri inuentione corporis. Quibus auditis, reuerendus ille Pater latibundus efficitur, & exurgens ait: Vadam & ego visurus quomodo Dominus visiones has magnas opere adimpleuerit. & secutus Priorem iam nominatum, venit ad domum Fratrum Ordinis sancti Ioannis: qui auditis verbis Fratris Imgebrandi inuentoris Reliquiarum, resolutus in lacrymas, laudans Deum ex intimo sui cordis, & illam hymnologiam Te Deum laudamus, ab omnibus inibi congregatis cantari praecepit in excelsis: ipseque indutus suis Pontificalibus eleuauit de terra, & transtulit easdem Reliquias cum omni solemnitate qua decuit, in Ecclesiam Fratrum Ordinis sancti Ioannis, & ipse deuotè peractis Missarum solemniis reposuit eas in loco decenti infra Chorum; ubi tunc eadem die; & post interualla temporum, ad laudem Dei & sanctæ Cordula miracula plurima facta fuisse referuntur. hæc omnia in præfatæ Virginis Legenda de verbo ad verbum sunt

posita, & ibidem ad plenum habetur trina reuelatio facta Fratri Imgebrando, & ab Alberto examinata.

Possumus sanè ex præfatis notare, quantæ affectionis in vera deuotione Albertus fuerit, cùm hanc perfectam deuotionem esse noscimus, qua mens liquefacta spirituali dulcedine etiam corpus in lacrymas resoluit. Ecce huic viro tam parua occasio, puta reuelatio & visio corporis vnus sacræ Virginis, lacrymandi ex deuotione contulit vbertatem, & nobis permaxima beneficia à Deo præstita vix per modicum lapideum cor possunt emollire. Ipse autem lacrymandi facilitatem ex crebra deuotione credendus est habuisse, vt quasi ex habitu in ipso generato in promptu lacrymas haberet. signum namque generati habitus est, sine difficultate ire in opus. Suspirabat siquidem & ipse ad cælestia, & ideò de supernis ciuibus audiens vel cogitans, incolatum præsentis deplorat miseriam, tendens ad illam patriam, vbi nulla suspiria sunt tristitiæ, sed pax & sempiterna lætitia. Nec senili ætate grauatus, retractus est à sanctarum Reliquiarum visitatione, quin & laudem

laudem Deo ex intimo sui cordis lætābundus redderet cum Missarum solemnī celebratione; cū tamen tunc temporis venerabilis senex decrepitus esset, videlicet LXXXV. annorum, duobus quasi annis ante mortem: veteranus enim erat ætate, sed florebat virtute iuuenescens, ingressurus in illam patriam, vbi annorum numero nemo deficit.

CAPVT XL

Alberto Colonia reuelatur obitus sancti Thomæ, qui in Campaniæ partibus obiit: & de lacrymis eiusdem Alberti quas ex deuotione fudit.

SED ex alio quodam facto ipsius feruens desiderium ad Christam ostenditur: illo siquidem quod legitur in Legenda beati Thomæ, atque in Chronica religiosi Patris Antonini, vbi sic habetur de ipso: *Cū beatus Thomas Aquinas Alberti discipulus in Campaniæ partibus mortuus esset corpore, viueturus cum Angelis in calis; ecce eadem die venerabilis Albertus cum alijs Fratribus*

tribus Colonia in mensa residens cibum percepturus, subito resolutus in fletum, vehementer lacrymari cœpit. cuius fletus causam cùm Prior ceterique Fratres instanter ab ipso inquirerent, respondit ille: *Frater Thomas de Aquino filius meus in Christo, qui fuerat lumen Ecclesie, de hac luce migravit. At illi notantes diem, repertum est sanctum Doctorem migrasse eo die quo Alberto de transitu Thomæ diuinitus fuerat reuelatio facta. Profectò hac reuelatione omnipotens Deus nihil aliud insinuare voluit, nisi quia certum ipsum Albertum de sua beatitudine redderet, dum Thomæ transitum ad cæli gaudia demonstrauit: Albertus verò fundendo lacrymas quasi de suo incolatu ingemiscens, desiderare se cælestia testatur.*

CAPVT XLI.

Quòd Albertus multis profuit, & quid in Concilio Lugdunensi egerit.

Eo verò tempore quo beatus Thomas migravit ex hac luce, Lugdunense Concilium instabat celebrandum:

dum : quare & ipse idem Sanctus dum in via esset ad idem Concilium iturus, infirmitate præoccupatus, ad Monasterium Ordinis Cisterciensis, quod Fossa noua dicitur, declinauit : vbi & diem clausit extremum vii. die Martij, quæ dies, vt dictum est, Alberto reuelata fuerat Colonix nondum egresso ad præfatum Concilium ; sed statim post hanc reuelationem, quia & ipse Albertus Concilio interesse debebat, iter versus Lugdunum arripuit : veniensque Lugduni inuenit congregatos Ecclesiæ Prælatos, inter quos fuerunt septem Reges, quingenti Episcopi, Abbates & alij Prælati plurimi, Græcorum Nuntij centum viginti ; de Prædicatorum autem Ordine præter alios doctos viros Episcopi plus quàm triginta clarissimi : quibus tamen eminebant duo ceteris clariores, scilicet Frater Petrus de Tarentasia, Episcopus Cardinalis Ostiensis, qui postea dictus est Innocentius Quintus. Hic in exequiis Domini Bonauenturæ paulò antè ad Cardinalatum assumpti, atq; defuncti in eodem Concilio, sermonem fecit, habens pro themate, *Doleo super te, frater mi Iona-*
tha.

tha. Alius autem fuit Frater Albertus quondam Ratisponensis Episcopus, qui coram Domino Papa Gregorio XI. atque Concilio verbum fecit pro Domino Rege Romanorum, sumens pro themate illud, *Ecce ego mittam eis saluatorem & propugnatorem qui liberet eos.* In quo Concilio credimus non modicum profectum Ecclesiæ Albertum attulisse sua doctrina. Ipse namque ait in secunda Parte suæ Summæ, Græcos coactos fuisse in Concilio Lugdunensi suum reuocare errorem, quo dicebant fornicationem simplicem non esse peccatum; contra quem errorem etiam in Summa eadem ipse idem Albertus disputat validis rationibus, ut suprâ patuit. Peraçto verò Concilio Lugdunensi, venerabilis Albertus Coloniam rediens, operi Dei, prout illi consuetudo erat, institit feruenter. Quanti autem feruoris in prædicando fuerit, suis verbis clarè ostenditur, cùm in Litania, sicut præmissum est, gratiarum actiones referendo Virgini gloriosæ, dicat eandem Virginem potentiæ miracula loquendo per linguam eius indefinenter operari. Sed & quantæ dulcedinis in
affatu

affatu fuerit , hoc facto ostenditur sufficientissimè : quia suo tempore , dum ciuitas Coloniensis discordiam non paruam cum Comite Montensi , qui nunc Dux Montensis & Iuliacensis est , haberet ; ipse pacem optatam cunctis mortalibus suo affatu & prudentia vtrisque contulit : ita vsque nunc mirantur qui de Senatu sunt Coloniensis ciuitatis , de sapientia ipsius Alberti , eò quòd in scriptis processum concordantiæ iam dictæ apud se habeant. Fertur etiam suo studio factum fuisse , vt Regularium Canonorum Fratres in quibusdam partibus Alamanniæ ad regularem obseruantiam sint reducti.

CAPVT XLII.

Albertus vsque ad finem vite sue diuinis Scripturis fuit intentus.

SALVATORIS autem nostri informatus doctrina , quam auidè semper sitiebat , vsq; in finem , licet senio confectus , eamdem legendo , scribendo , aliis propinare non destitit : vnde Librum de Corpore Christi , vt præfatus Frater Bernardus eius contemporaneus retulit

lit in sua Chronica, circa finem vitæ plenum fide & deuotione scripsit. Similiter & deuotissimum Tractatum De adhaerendo Deo, quemadmodum initium eius Tractatus testatur, qui sic incipit: *Cogitavi mihi aliquid ultimatè (in quantum possibile est in huius exilij & peregrinationis immoratione) depingere, scriptitando de & super ab omnibus plena & possibili abstractione, & cum solo Domino Deo expedita, secuta, & nuda firmæque adhesionem: præsertim cum ipsius Christiana perfectionis finis sit charitas, qua Domino Deo adheretur, &c.* Quem Tractatum si inspexeris apertis oculis, tamquam in speculo, Alberti mentis faciem ab omni labe alienam videbis: quod magis lectione ipsa inuenies verum, quàm nostra persuasionem.

CAPVT XLIII.

Numerus Librorum Alberti, tam in Theologia quàm in Philosophia.

ET quia flosculos varios, spiritua-
lem de se spirantes suauitatem, ex
Libris ipsius colligere possemus, ne tæ-
dium

dium ob prolixitatem legentibus præstemus, supersedendum esse puto de huiusmodi. Sed ut superficialiter sciatur quantum doctrinando Ecclesiæ profuit, Libros eius enumerare libet. In primis igitur, ut à Canonica incipiamus Scriptura, fecit ipse venerabilis Albertus Opus egregium super totam Bibliam, quoad vetus & nouum Testamentum per modum Postillæ, exponendo Legem per Legem, ut videre possis, suam Postillam nihil aliud esse nisi catenam inuincibili veritate connexam; in qua reperies varia & occulta quæ paucis in notitiam veniunt. Scripsit quoque super multos libros Bibliæ, eo modo quo scripsit naturalem Philosophiam per Tractatus & Capitula diuidens & distinguens. Quoad Bibliam, libros quos vidi, notare placuit. Per modum verò Postillæ hos vidi: super Isaiam, Ieremiam, Ezechielem, Danielem, super Iob, super duodecim Prophetas minores, super Baruch, Lamentationes Ieremiæ, super Matthæum, Marcum, Lucam, Ioannem, & Apocalypsim. Nosco autem virum quemdam honestum & doctum, qui Albertum
habet

habet super Apostolum Paulum quoad omnes Epistolas, vt fide digni dicunt. Item ad petitionem Fratrum scripsit Summam Theologiæ, quæ intitulatur, *De mirabili scientia Dei*. habet verò hæc Summa, vt ipse in prima Parte eiusdem, quæstione quinta, articulo ultimo dicit, quatuor Partes siue Libros. Primus agit de Deo secundum se & conditiones suæ perfectionis. Secundus, de creaturis & vitiis. Tertius, de Christo & virtutibus. Quartus, de Sacramentis ac gloria resurrectionis. Incipit autem sic: *Mirabilis facta est scientia tua ex me*. Quidam autem dubitant an completa sit hæc Summa, eò quòd Coloniæ non possunt nisi duæ Partes inueniri, v. h. Item scripsit quatuor scripta super Libros quatuor Sententiarum, v. h. Et præter hæc quatuor scripta, quæ nota sunt omnibus, & in communi vsu reperiuntur; vt quidā aiunt, & alia scripta super Sententias; quod non incredibile videtur, eò quòd pluries Sententias legerit in diuersis locis. Item scripsit Summam de Quatuor coæquæuis, v. h. Item scripsit librum de Homine, v. h. Item de Bono secundum com-

communem intentionem: in hoc siquidem Libro de virtutibus singulis determinat, & de Legibus, & aliis multis, v. h. Item Librum de Perfectione vitæ spiritualis. Item librum de Mysterio Missæ, v. h. Et licet multi scripserunt de Officio Missæ, vt patet in ijs qui Rationalia diuinorum composuerunt; nullus tamen ei similis inuenitur, nec pulchrior aut deuotior. Item scripsit copiosissimè vnum Librum de Corpore Christi, seu de Eucharistia, circa finem vitæ suæ, de quo Libro suprâ dictum est, v. h. Item scripsit alium Librum de Eucharistia, cuius Prologus sic incipit: *De sacrosancto Corporis Domini locuturi Sacramento, proponimus donante Deo, &c.* Diuiditur autem Liber per Sermones, quibus semper præmittit illud thema, *Venite, comedite panem meum*, v. h. hunc Librum nonnulli adscribunt sancto Thomæ, cum tamen Alberti sit, vt superius probatum est. Item scripsit Librum de Laudibus beatæ Virginis Mariæ, ex inaudita deuotione ad eandem, in quo miro modo laudes ipsius describit, v. h. Item Librum contra Wilhelmitas impugnantes Religiosos; de quibus

bus superiùs in visione de Alberto habita notatum est. Item Librum de Muliere forti, cuius initium est: *Laudes Ecclesia describit Salomon in figura mulieris fortis*, &c. In hoc Libro continentur materiæ aliquæ solemnissimæ pro Prædicatoribus: si quis enim habuerit huius Libri practicam, cognoscet quantæ virtutis sit; quia ad diuidendum vnâ auctoritatem, non est in aliquo Opere alicuius Doctoris modus nobilior, v. h. Item librum de Partu hominis. Item librum de Formatione hominis in utero. Item Librum multarum Quæstionum determinatarum. Item Librum de Origine & immortalitate animæ. Item multas Profas siue Sequentias de beata Virgine, & multa alia ad Parisienses. Item scripsit, vt communiter fertur in Ordine, Sequentiam de Trinitate, quæ incipit, *Profitentes*; & cantatur in Ordine Fratrum Prædicatorum. Item scripsit Orationes super quatuor Libros Sententiarum, quoad omnia quæ in ijs continentur, v. h. Item Orationes super Euangelia Dominicalia per totum annum, v. h. Item scripsit vnâ Litaniâ in hunc modum, vt quasi de singulis

gulis Sanctis vnam singularem faciat Orationem, v. h. Item, licet super Missam scribendo, & in Postilla Dominicam Orationem subtiliter & pulchrè exposuerit; tamen specialem Tractatum super eadem Oratione composuit, vt à quodam docto viro didici, qui hunc in Italia reperiri affirmabat. Item scripsit super Dionysium de Cælesti hierarchia. Item de Ecclesiastica hierarchia. Item de Diuinis nominibus; quem Librum etiam legit Colonia, cùm beatus Thomas ibidem discipulus eius extitit. Item de Mystica Theologia. Scripsit denique super Epistolas eiusdem beati Dionysij: primò super quinque epistolas ad Gaium Monachum: item ad Sospitrem, ad Polycarpum, ad Demophilum, ad Timotheum De symbolica Theologia, super Epistolam ad Ioannem in Patmos, super epistolam ad Appellionem: hæc omnia Commenta quoad Libros Dionysij Coloniae reperiuntur, v. Item scripsit Librum de Arte prædicandi. Item Librum de Reparatione hominis lapsi.

Ad nimiam instantiam & petitionem Fratrum suorum, vt testatur in principio

pio libri Physicorum, dictavit modo mirabili omnes Artes liberales humanasque scientias, scilicet Philosophiam Naturalem, Moralem, Rationalem, Mathematicam, & Metaphysicam. Ipse enim cunctis dictas scientias ad plenum scire desiderantibus sic vtiliter elaboravit, ut viam sciendi & intelligendi prius omnino ignotam facilem traderet. Hoc autem sciendum, quod præ omnibus qui in Philosophia scripserunt, Alberto magis est post Aristotelem credendum, eò quod ipse omnium pænè Philosophorum scripta perlustravit, & in quibus verum vel falsum dixerunt vidit; imò cum & ipse magis præ omnibus in ijs quæ naturalia sunt sit expertus: & licet aliqui præsumentes de sua Metaphysica vel Logica, argumentis quibusdam possunt eum impugnare; puto hoc non esse curandum, cum ipsemet Albertus dicit, magis esse credendum unicuique in sua arte experto. Nam in secundo suo scripto, distinctione XIII. ubi disputat de luce quid sit, inter alia verba in solutione ita ait: *Sciendum tamen, quod Augustino in his que sunt de fide & moribus plus quàm*
Philo-

Philosophis credendum est si dissentiunt: sed si de medicina loqueretur, plus ego crederem Galeno vel Hippocrati: & si de naturis rerum loquatur, credo Aristoteli plus quàm alij experto in rerum naturis. hæc Albertus loco præallegato. De ijs autem quæ præsumunt de suis argumentis Metaphysicalibus, vel etiam qui Logicaliter aliquando argumentantur, proculdubiò quandoque in naturalibus decipiuntur si ignorant naturas corporum Physicorum; quemadmodum benè notat idem venerabilis Albertus in suo Libro Mineralium, vbi reprobatur quendam nomine Gilgil, qui probare voluit, cinerem esse materiam metallorum; & arguebat sic: Quorum est vnus modus congelationis & vnus modus liquefactionis, eorum est vna materia: sed videmus quòd per assationem fortem calidi & sicci cinis liquatur in vitrum, qui congelatur frigido & liquatur calido sicco sicut metallum: ergo vitri & metalli vna est materia. Hoc argumentum & similia alia fecit Gilgil, quæ Albertus ibidem proponit & soluit. sed ante solutionem argumentorum, sic ait Albertus: *Hæc autem*

*inconuenienter & stultè dicta sunt, quoniam iste Gilgil Metaphysicus & non Physicus fuit; sed de Metaphysica sua in Alchimia præsumens, præsumpsit mentiri de Physicis. hæc Albertus, qui postquam dedit solutiones argumentorum, & apposuit propriæ sententiæ rationes, sic adiunxit: Et hoc Gilgil ignorauit. Sic reuerà quidam magi suis argumentis decipiuntur, quemadmodum hic Gilgil, ignorantes naturas Physicorum corporum. Sed utinam in Theologicis quæstionibus quidam non deciperentur, ratiocinationibus suis plus adhærentes quàm oportet! de quibus frequenter etiam Albertus notat in suis scriptis, de argumentationibus illorum sic inquit: *Hæc deliramenta putamus esse. Et quamuis ipsemet quandoque tales quæstiones, quæ scholasticæ sunt, habet; testatur tamen hoc se facere plus coactè quàm voluntariè, dicens: Nostro tempore quia hæreses importune sunt, respondebimus quantum pro defensione fidei oportet, & non amplius super huiusmodi.* De quibus omnibus multos passus adducere possemus ex suis Libris, sed breuitati in Legenda studendum est.*

est. Et quia talibus argumentationibus se hoc tempore multi nimis inuoluunt, videmus plures etiā magnos viros magis opinionibus grauatos quā scientia ornatos; vt impleatur illud Sapientis: *Fecit Deus hominem rectum, & ipse se inuoluit multis questionibus.* Inde iam quasi sectæ sunt diuisæ à se inuicem, non veritatem sed propriam laudem quærentes, & dicunt sicut illi quibus Apostolus impropèrat, *Ego sum Cepha, ego Pauli, ego Apollo.* Imò quod deterius est, si aliter dicitur ab aliquo quā ipsi opinantur, falsitatem putant; & sic vnum tenent Doctorem, vt aliorum Magistrorum dicta putent errores, non attendentes quid dicatur, sed quis. Quorum contentiones Albertus signanter notat in suo Comimento super Libro peri hermenias in principio, vbi sic ait: *Quod de actore quidam quarunt, supernaculum est, & numquam ab aliquo Philosopho quasitum est, nisi in scholis Pythagoræ; quia in illius schola nihil recipiebatur nisi quod fecisset Pythagoras: ab aliis autem quasitum non est; à quocumque enim dicta erant recipiebantur, dum probata veritatis haberent rationem. Causa*

Eccli. 7.

1. Cor. 1.

etiam efficiens extra est, & ab ea neque habet res firmitatem, neque infirmitatem, sed potius à ratione dictorum. hæc Albertus. Cùm autem locus ab auctoritate eò certior est, quantò per sapientiorē confirmatur; & ille sapiens sit qui humilior & sobrius magis, quia Sapientia increata sobrietatem docet, & in humilibus quiescit; constat profectò hos à sapientia alienos esse qui ita præsumunt de opinione sua, vt non possint audire alienam: à quibus venerabilis Albertus, ne cum insipientibus & præsumptibus computaretur, alienus est; quia quasi numquam suas ponit opiniones cum præiudicio aliorum. Vnde eò certior sua doctrina, quantò ipse per sobrietatem atque humilitatem erat sapientior. In primis igitur scripsit super octo Libros Physicorum, v. De cælo & mundo, v. De natura locorum, v. h. De causis proprietatum elementorum. De generatione & corruptione. De Scientia Meteororum, v. h. De Vniuersalibus. De anima, v. h. De nutrimento & nutribili, v. h. De somno & vigilia, v. h. De diuinatione & prophetia. nec putare debent inscij quòd de diuinatione
super-

superstitiosa hic Liber sit, sed de naturali; de qua dicit in secundo scripto, Distinctione vii. vbi sic ait: *Pro tanto concedo diuinationes astrorum sicut Augustinus, & non amplius.* Nec similiter de prophetia quæ donum est, vt Theologi accipiunt; sed naturali, de qua in De somno & vigilia aliqua posuit. Item De sensu & sensato, v. h. De motibus animalium, v. h. De respiratione & inspiratione, v. h. De differentia spiritus & animæ. De intellectu & intelligibili, v. h. De iuuentute & senectute, v. h. De morte & vita, v. h. De vegetabilibus & plantis, v. h. De animalibus Librum diuisum in multos libros partiales, qui de manu propria eius conscriptus Colonia in Prædicatorum Conuentu habetur, sicut & super Matthæum, v. h. Item scripsit paruum Summam Philosophiæ, quæ intitulatur *Philosophia pauperum*; quidam autem dubitant an sit eius, v. h. Item Librum contra Auerroistas. De vnitæte intellectus, Libros tres. Quæstiones contra Auerroistas. Item Librum De vnitæte formæ. Item Librum vnum quindecim Quæstionum. Item notandum quod est Liber qui in-

titulari solet, *Albertus de natura rerum*. sed hic non est eius, sed ipsius Fratris Thomæ, auctoris Libri Apum, Alberti discipuli; & hoc constat verum esse ex Prologo Libri Apum, & etiam ex ipso Libro de Naturis rerum: in Prologo enim Libri Apum dicit se collegisse Librum de Naturis rerum per quatuordecim vel quindecim annos; & hoc idem ait in Libro de Naturis rerum: imò & stilus indicat quòd ab Alberto editus non sit Liber ille, & hoc idem testatur Frater Iacobus de-Zuzato, Magister in Theologia, in sua Chronica: qui etiam dicit de eodem Thoma, quòd ipse transtulit omnes Libros Aristotelis, Rationalis, Naturalis, & Moralis Philosophiæ, & Metaphysicæ, de Græco in Latinum, verbum è verbo, quibus nunc utimur in Scholis, & hoc ad instantiam sancti Thomæ de Aquino; nam temporibus Alberti translatione veteri omnes communiter utebantur. Quæ autem translatio verior sit, hæc scilicet noua, vel antiqua, mihi non constat. Sed & ipse idem Thomas, auctor Libri Apum, in Libro de Naturis rerum dicit se transtulisse vnum Librum

brum cuiusdam Philosophi nomine Tetel De scripturis lapidum in Latinum. Ex qua autem lingua, Hebræa scilicet vel Græca, non dicit. Scripsit etiam Albertus Magnam Philosophiam, scilicet Moralem, valdè per longum super Libros Ethicorum dupliciter, scilicet per modum commenti, & per modum scripti, v. h. De Monastica Libros quinque, v. h. De Oeconomica Libros quatuor, v. h. De Politica Libros octo, v. h. Item exposuit ad litterã omnes Libros Moralis Philosophiæ Aristotelis. Item Problemata Aristotelis. Item exposuit etiam tres Libros Rhetoricorum.

Omnes scientias Mathematicas copiosissimè pertractavit : nam ipse fecit Summam De scientia Arithmeticæ. Item aliam De scientia Musicali. Item aliam De scientia Geometriæ. Item aliam De scientia perspectiua. Item aliam De scientia Astronomiæ. Item commentavit Arithmeticam Boëtij, Musicam eiusdem, Geometriam Euclidis, Almagestum Ptolemæi, Speculum Astrolabicum. Et notandum quòd Astrolabium non est omnino illicitum; sed tunc tantùm quando quis eo utitur

ad quod institutum non est; sicut illi qui per tale instrumentum diuinare volunt & indicare furem ignotum, & similia, quod in Iure reprobaturum est. Vti autem Astrolabio vt Astronomi, sine superstitione, licitum est. Dicitur autem Astrolabium, eò quòd per ipsum ostenditur qualiter astra labuntur. Item scripsit super Perspectiuam Alacenis. Item fecit librum De sphaera mundi. Librum astrorum. De Alchimia autem scripsit aliqua in Libro Mineraliũ, v. h. vbi fallacias ostendit Alchymistarum, & errores varios eorundem, dicens quòd ferè omnes deceptores sunt. De Libro autem qui *Semita recta* dicitur, superiùs probatum est quòd Alberti non sit; imò specialiter iste Liber damnatur ab Alberto in Libro Mineralium, vt patuit. Item fecit Albertus Speculum Astronomiæ, in quo reprobatur scientias magicas, scilicet Nigromantiam quæ pluribus modis fit; imagines Astronomicas, quas vicinitatem dicit habere ad Nigromanticas, & ideo non vult eas defendere. & addit, *Non commendo eas*. Damnat etiam in eodem Speculo Geomantiam, Hydromantiam, Pyro-

Pyromantiam, Aërimantiam, Chiro-
mantiam, Auruspicium, Horoscopiam,
Annulos, Præstigia; atq, Libros Astro-
nomiæ licitos ab illicitis distinguit; vbi
autem dubium est, sub dubio derelin-
quit. damnatque ibidem characteres &
suffumigationes Nigromanticorum &
Specula, v. h. Item fecit Librum de Na-
tura deorum in plures partes distin-
ctum. Item Librum de Secretis secre-
torum. Hic alius est ab alio qui intitu-
latur *De secretis mulierum*, & Alberti
non est, vt suprà probatum est. Item Li-
brum de Duodecim Alphabetis. Item
Librum de Interpretationibus somnio-
rum; & qualiter hæc interpretatio quan-
doque sine superstitione fit, in suo De
somno & vigilia aliquammodo notatum
est. Item Librum de Magistris purgan-
dis & eligendis.

In Logicalibus scripsit per longum;
scilicet de Vniuersalibus Librū vnum;
de Prædicamentis, de Sex principiis,
super Peri hermenias, v. h. de Diffini-
tionibus, super Libros Priorum Topi-
corum, v. Posteriorum Elenchorum.

Item de Libris Grammaticalibus fe-
cit Summam Grammaticalem. Item

fecit Librum de Arte Rhetorica. Item exposuit antiquos Doctores Grammaticales, scilicet Priscianum in maiori & minori voluminibus; & alios Auctores. Item altissimo stilo scripsit primam Philosophiam, quæ Metaphysica dicitur, in qua posuit XIII. Libros, v. h. Item Librum de Causis, ad complementum Metaphysicę, v. h. Fecit Librum de Medicina. Item Librum de Lanificio. Item Librum de Aratura. Item Librum de Agricultura. Item Librum de Navigatione. Et multa alia tam in Theologicis quàm alijs scientijs edidit, quæ ad notitiam nostram non peruenerunt. Notandum tamen, quòd isti Libri hîc enumerati, feruntur ab Alberto editi; non tamen inueni eos omnes signatos in Legenda quæ Coloniz habetur, nec in ipsa quæ apud Zuzatum est, vbi Monasterium ipse Albertus instituit; sed in alijs Libris quibusdam qui continebant ipsam Legendam reperi; quapropter non sum ita certus de omnibus hîc enumeratis, quemadmodum de illis quos vidi. Et licet non sit impossibile ipsum fecisse hos omnes, solent tamen quandoque attribui Libri Doctoribus qui

qui ipsorum non sunt; ideò volui notare signanter quos vidi, vel quos habemus in nostro Conuentu Colonienſi, ne alicui dubium ſuper his oriatur. De aliis autem hîc poſitis ſpecialiter qui rarè reperiuntur, vt eſt de Secretis ſecretorum, & nonnullis in Aſtronomia; poteſt Lector prudens faciliter, ſi in Alberti doctrina peritus eſt, inuenire ex ſtilo & materia ſi ipſius ſunt vel non, dum ad manus legentis peruenerint. Quos autem vidi, tali ſigno notaui, v. Si verò vidi, & habemus, huiusmodi volui notare ſigno, v. h. vt de leuitate non arguamur: Sancti enim mendaciis commendari non volunt, cùm veritatem conſtat eos amaſſe, & nunc amare.

CAPVT XLIV.

Qualiter indicauit Fratribus ſignum ſui obitus, & qualiter beata Virgo ipſi hoc ſignum promiſerat.

CVM verò quadam vice venerabilis Albertus iam ſenio conſectus in Colonienſi Conuentu legeret præſente copioſa audientium multitudine; in

colligendis ac dicendis quibusdam rationibus memoria ipsius vacillabat.

Cumque omnes praesentes, ex hoc quod acciderat, essent non modicum stupefacti, ipse Albertus, post paululum temporis quo tacuerat, spiritu confortatus, in eisdem Scholis, omnibus praesentibus dixit: *Audite, quaeso, Fratres charissimi. En refero vobis noua pariter & antiqua. Cum enim in annis iuuenilibus constitutus hebes ingenio essem, nec sociis in studio aequalis haberer, sed sine profectu minor in scientia mansissem; quadam sum puerili impatientia permotus ob huiusmodi hebetudinem, quia nondum profectus, de Ordine exire mente disposui. Cum igitur sic per senectarem in proposito concepto, ecce in somnis visio mihi talis illabitur. Videbar namque mihi scalam muris Conuentus apponere, preparans me ad recessum: cumque scalam sic imaginariè ascenderem, aspicio ex aduerso quatuor venerandas personas, vultu multum praclaras; quarum una primò me descendere impulit quasi ad casum. Secundo ascensum peto, & iterum impulsus sum à secunda. Cum verò tertio ascender: tentassem, ait tertia ad me: Et qua causa tui ascensus in-*
uere-

uerecundo aspectu? At ego illi: Obtusus ingenio sum, ceteris inferior scientia maneo; præ rubore ex Ordine hoc recedo. At illa: Ecce nobiscum est dulcis illa Genitrix Dei Maria, misericordia mater, cuius nos sumus ancilla: si ad hanc refugium habueris, unà tecum ad hanc preces fundemus pro te, ut, quod postulas, impetrare valeas. Quo audito, latatus sum in his quæ dicta sunt mihi; & dico ad illas: Libenter facio quæ dicitis; sed deprecor ut aduocatas vos habeam apud illam in ijs quæ desidero. Orabant igitur pro me Genitricem Dei quæ ait ad me: Quid tibi petis dari? Cui ego: O Domina, Philosophiæ scientiam dari mihi postulo tua intercessione. Impetrasti, inquit illa; ecce data est petitio tua: sed studio diligenter intende. Mansi igitur in Ordine sic exhortatus ab illa, consecutus oratione & studio per gratiam Dei quod in promissione acceperam. Sapissimè quoque impetravi oratione, quod legendo capere nequibam. Frequenter autem Matrem misericordia Genitricem Dei gemitibus & orationibus rogare consueveram, ut lumine diuina sapientia illustrari mererer interuentu suo; ac in fidei soliditate cor meum confirmaret, ne Philosophorum rationibus

illaqueatus de Christi fide dubitarem. Tandem verò piissima illa Mater mihi apparens, consolando dixit: Esto fideliter in studio & virtutibus perseverans; Deus namque tua doctrina Ecclesiam suam totam illustrare disposuit; & ne in fide vacillare te contingat, omnis Syllogistica ars ante mortem tuam auferetur à te, & in innocentia puerili atque sinceritate ac veritate fidei ab hoc seculo te Deus assumet. Notitiam verò huius temporis hoc signo scies, quia defectum memoria in publica sustinebis lectione. Fratres igitur amantissimi, quoniam hæc eveniunt, iam cognosco tempus adesse. Vnde nunc coram vobis confiteor publicè & protestor, omnes ac singulos fidei Christiana articulos me firmiter & incunctanter credere. Supplico denique humiliter & deuotè, Ecclesiastica mihi exhiberi Sacramenta tempore opportuno. Si autem aliquid dixero vel scripsero in futurum, nullus ponderis aestimetis, si fidei non concordat. Quibus dictis, profusus lacrymis de cathedra descendit. Quæ res dum Reuerendissimo Domino Archiepiscopo Colonienfi Domino Siffrido de Westerburgh in notitiam deuenisset, qui ipsum

ipsum multum dilexerat, compassionis affectu lacrymatus est.

CAPVT XLV.

Albertus iam senex sibi mortem sciens imminere, quotidie visitat sepulchrum suum, legens Vigiliis Mortuorum pro se; & de obitu ipsius ac sepultura.

ITAQUE venerabilis Pater Albertus tali signo sui recessus certificatus, ex tunc numquam aliquid scripsit; sed quasi puer innocens & columbinus inter Fratres, quamdiu superuixit, conuersatus est, orationibus continuis insistendo. Nam locum suæ sepulturæ quotidie visitans, Vigiliis Defunctorum pro se, iam mundo mortuus, dicebat. Post hoc autem, breui temporis spatio interiecto, anima illa laboriosa & sancta carne soluta est: anno siquidem Domini M. CC. LXXX. quintadecima die Nouembris, consummatis vitæ suæ annis octoginta septem, gloriosus senex in cella sua sedendo super sedile, circumstantibus eum Fratribus, ac orantibus,

bus, vbertimque flentibus, in Coloniensi Conuentu feliciter in Domino obdormiuit; completis verò in Ordine Fratrum Prædicatorum annis ferè septuaginta. Congregatione igitur facta omnium Collegiatarum Ecclesiarum in Colonia, necnon Nobilium in circuitu per Dominum Siffridum Archiepiscopum sæpè dictum, solemniter ac digna cum veneratione tumulatur in Choro Fratrum Prædicatorum ante Altare maius. Epitaphium verò lapidi inscriptum quo sepulchrum clauditur istud est: *Anno Domini M. CC. LXXX. xvii. Kal. Decembris, obiit venerabilis Dominus Frater Albertus, quondam Ecclesie Ratisponensis Episcopus, Ordinis Prædicatorum Magister in Theologia. Requiescat in pace, Amen.* Aliud autem Epitaphium dependens ad sepulchrū ipsius tale est:

*Phœnix Doctorum, ac paris experts,
Philosophorum*

*Princeps, verborum vox fundens dogma
sacrorum*

*Hic iacet Albertus, præclarus in orbe,
disertus*

*Pra cunctis, certus assertor in arte re-
pertus,*

Maiores

*Maior Platone, vix inferior Salomone.
Quem tu Christe bone Doctorem inn-
ge corone.*

*Annis bis denis minùs actis mille
trecentis*

*Christi nascētis, de corporis exit habenis
Quinta post festum Martini luce, mo-
lestum*

*Omne, petendo Deum, transiit; agens
iubileum.*

*Qui legit hos versus, mox ad tumulum
retrouersus,*

*INCLINA dicat Collectam cum RE-
QUIESCAT.*

CAPVT XLVI.

*Quòd miracula fecit in vita, quæ ta-
men in particulari non sunt scri-
pta propter negligentia Fratrum.*

QVAMVIS autem miracula multa
venerabilis Albertus in vita per-
fecerit, scripto tamen in singulari non
sunt commendata ex incuria Fratrum:
nam & de beato Patre nostro Domini-
co legitur quòd multa miracula per ip-
sum facta obliuioni tradita sunt ob Fra-
trum

CAPVT XLVIII.

*De miraculo quod contigit, antequam
fuit sepultus, circa eius venerabi-
le corpus.*

QUALITER verò Dominus de Al-
berti salute nos certos reddidit &
gloria, subsequens prodit miraculum.
Nam Scriptor Legendæ beati Thomæ,
ob commendationem discipuli maio-
rem, de Magistro Alberto mirabile
quid in eadem Legenda commemorat,
sub isto tenore verborum prosequens
sermonem: *Nec vacat, inquit, à commen-
datione discipuli, si aliqua subiungamus de
commendatione Magistri. Erat Magister
Albertus in omnibus scientiis singularis
excellentie, cuius corpus præ deuotionis
gratia requisitum in tumba, quod positum
fuerat, ut est consuetudo, supinum; inuen-
tum est, ut sibi moris erat dum viueret,
quasi in oratione recumbens. Cui discipu-
lum, scilicet Thomam, diuinus Spiritus
mirabiliter adæquauit. hæc in Legenda
sancti Thomæ.*

Ex iam dictis verbis clarè notatur,
hoc miraculum factum fuisse in Alber-

ti corpore diuino nutu, mox post obitum ipsius, cum nondum traditum esset sepultura; quia pertinenter dicit requisitum fuisse ex deuotione Fratrum in tumba, non in sepulchro: ex quo enim Dominus Silfridus Colonienſis Archiepiſcopus ipſum honorificè vnà cum Collegiis & Nobilibus per circuitum ciuitatis Colonienſis, vt ſuperius notatum eſt, ſepultura tradidit, conſtat per aliquot dies corpus Alberti inſepultum in tumba iacuiſſe, antequam Nobiles præfati iuſſu Domini Silfridi ad ſepeliendum ipſum conuenirent: in quo tempore nimirum Fratres præ deuotione accedentes tumbam, vti prædilecti Magiſtri ſui corpus videre cupiunt & requirunt; ſicque factum eſt vt pretioſam illam glebam, corpus videlicet tanti Pontificis, ad modum orantis inuenirent. Quo proſectò miraculo omnipotens Deus palàm facere voluit ſui famuli dignitatem & gloriam, oſtendens hec mirabili facto quantum viuens ad ſuperna orando rapì conſueuerat, cum etiam corpus exanime ſeſe diuino nutu in altum leuando quaſi orans erigebat. In hoc ſiquidem ſimilis beato

Paulo

Paulo primo Eremitæ, de quo simile quasi legitur, quia cùm in oratione spiritum redderet flexis genibus, mansit ipsum corpus examine sic extensum ac si viueret; quod beatus Antonius ita inuenit.

CAPVT XLIX.

Contra fabulantes qui dicunt ipsum petiuisse à Deo Purgatorium.

QUIDAM autem phantastici, peruer-
tentes ea quæ quandoque prædi-
cari audiunt, ob suam ignorantiam lon-
gè aliter alijs insinuant quàm prædica-
tum sit; quemadmodùm de Alberto fieri
contingit, de quo nonnulli recitare so-
lent, quòd petierit decem dies esse in
Purgatorio: alij dicunt quinque aut
tres, & postea apparuisse, & dixisse
quòd stultè petiisset, quia magna esset
pœna. Alij adhuc magis addentes, di-
cunt quòd hoc petiisset in hunc mo-
dum, dicens ad Angelum qui ad ipsum
missus fuerat: Omnia expertus sum
quæ in mundo sunt, volo etiàm experiri
Purgatorium. Hec & similia alia dicunt
fabulantes; & quia fortassis quidã qui
nimis

nimis leues sunt ad scribendum quæcumque audiunt, possent hanc fabulam tamquam verum aliquid notare, placuit inferere hoc, vnde ortum habeat fabula præfata. Nam in secundo Libro Apum cap. Lxxvii. Auctor eiusdem Libri inter alia dicit in hunc modum: *Quanta autem prudentia sit, pœnitentiam agere in hac vita, exemplum subsequens demonstravit. Erat vir fidelis & bonus, sicut Magister Albertus Ordinis Predicatorum, & post Ratisponensis Episcopus, sibi ab ijs qui rem familiariter nouerant, traditum referebat, qui post diutinam pœnitentiam quam sanus fecerat, incidit in languorem grauissimum; quo per annum non modicè tribulatus, rogauit cum lacrymis Dominum vt tanto languori finem imponeret data morte. Nec mora, missus ad eum Angelus Domini dixit ei: Exaudiuit Dominus precem tuam; sed eligas quod vis. Aut tribus diebus Purgatorij pœna torqueberis, si nunc decedis; aut si adhuc per annum in languore manere volueris, sine ullo Purgatorio ad superos euolabis. Tunc ille pœnam presentem recolens, nec futuram aduertens respondit: Mori potius eligo, & non tantum tribus diebus sed quan-*

colligendis ac dicendis quibusdam rationibus memoria ipsius vacillabat. Cumque omnes praesentes, ex hoc quod acciderat, essent non modicum stupefacti, ipse Albertus, post paululum temporis quo tacuerat, spiritu confortatus, in eisdem Scholis, omnibus praesentibus dixit: *Audite, quaeso, Fratres charissimi. En refero vobis noua pariter & antiqua. Cum enim in annis iuuenilibus constitutus hebes ingenio essem, nec sociis in studio aequalis haberer, sed sine profectu minor in scientia mansissem; quadam sum puerili impatientia permotus ob huiusmodi hebetudinem, quia nondum professus, de Ordine exire mente disposui. Cum igitur sic perseuerarem in proposito concepto, ecce in somnis visio mihi talis illabitur. Videbar namque mihi scalam muris Conuentus apponere, preparans me ad recessum: cumque scalam sic imaginariè ascenderem, aspicio ex aduerso quatuor venerandas personas, vultu multum praclaras; quarum una primò me descendere impulit quasi ad casum. Secundò ascensum peto, & iterum impulsus sum à secunda. Cum verò tertio ascendere tentassem, ait tertia ad me: Et qua causa tui ascensus in-*
uere-

uerecundo aspectu? At ego illi: Obtusus ingenio sum, ceteris inferior scientia maneo; præ rubore ex Ordine hoc recedo. At illa: Ecce nobiscum est dulcis illa Genitrix Dei Maria, misericordiae mater, cuius nos summus ancilla: si ad hanc refugium habueris, unà tecum ad hanc preces fundemus pro te, ut, quod postulas, impetrare valeas. Quo audito, letatus sum in his quae dicta sunt mihi; & dico ad illas: Libenter facio quae dicitis; sed deprecor ut aduocatas vos habeam apud illam in ijs quae desidero. Orabant igitur pro me Genitricem Dei. quae ait ad me: Quid tibi petis dari? Cui ego: O Domina, Philosophiae scientiam dari mihi postulo tua intercessione. Impetrasti, inquit illa; ecce data est petitio tua: sed studio diligenter intende. Mansi igitur in Ordine sic exhortatus ab illa, consecutus oratione & studio per gratiam Dei quod in promissione acceperam. Sapissimè quoque impetravi oratione, quod legendo capere nequibam. Frequenter autem Matrem misericordiae Genitricem Dei gemitibus & orationibus rogare consueveram, ut lumine diuina sapientia illustrari mererer interuentu suo; ac in fidei soliditate cor meum confirmaret, ne Philosophorum rationibus

illaqueatus de Christi fide dubitarem. Tandem verò piissima illa Mater mihi apparens, consolando dixit: Esto fideliter in studio & virtutibus persenerans; Deus namque tua doctrina Ecclesiam suam totam illustrare disposuit; & ne in fide vacillare te contingat, omnis Syllogistica ars ante mortem tuam auferetur. à te, & in innocentia puerili atque sinceritate ac veritate fidei ab hoc seculo te Deus assumet. Notitiam verò huius temporis hoc signo scies, quia defectum memoria in publica sustinebis lectione. Fratres igitur amantissimi, quoniam hac eueniunt, iam cognosco tempus adesse. Vnde nunc coram vobis confiteor publicè & proestor, omnes ac singulos fidei Christiana articulos me firmiter & incunctanter credere. Supplico denique humiliter & deuotè, Ecclesiastica mihi exhiberi Sacramenta tempore opportuno. Si autem aliquid dixero vel scripsero in futurum, nullus ponderis aestimetis, si fidei non concordat. Quibus dictis, profusus lacrymis de cathedra descendit. Quæ res dum Reuerendissimo Domino Archiepiscopo Coloniensi Domino Siffrido de Westerburch in notitiam deuenisset, qui ipsum

ipsum multum dilexerat, compassionis affectu lacrymatus est.

CAPVT XLV.

Albertus iam senex sibi mortem sciens imminere, quotidie visitat sepulchrum suum, legens Vigiliis Mortuorum pro se; & de obitu ipsius ac sepultura.

ITAQUE venerabilis Pater Albertus Itali signo sui recessus certificatus, ex tunc numquam aliquid scripsit; sed quasi puer innocens & columbinus inter Fratres, quamdiu superuixit, conuersatus est, orationibus continuis insistendo. Nam locum suæ sepulturæ quotidie visitans, Vigiliis Defunctorum pro se, iam mundo mortuus, dicebat. Post hoc autem, breui temporis spatio interiecto, anima illa laboriosa & sancta carne soluta est: anno siquidem Domini M. CC. LXXX. quintadecima die Nouembris, consummatis vitæ suæ annis octoginta septem, gloriosus senex in cella sua sedendo super sedile, circumstantibus eum Fratribus, ac orantibus,

bus, vbertimque flentibus, in Coloniensi Conuentu feliciter in Domino obdormiuit; completis, verò in Ordine Fratrum Prædicatorum annis ferè septuaginta. Congregatione igitur facta omnium Collegiatarum Ecclesiarum in Colonia, necnon Nobilium in circuitu per Dominum Siffridum Archiepiscopum sæpè dictum, solemniter ac digna cum veneratione tumulatur in Choro Fratrum Prædicatorum ante Altare maius. Epitaphium verò lapidi inscriptum quo sepulchrum clauditur istud est: *Anno Domini M. CC. LXXX. xvii. Kal. Decembris, obiit venerabilis Dominus Frater Albertus, quondam Ecclesie Ratisponensis Episcopus, Ordinis Prædicatorum Magister in Theologia. Requiescat in pace, Amen.* Aliud autem Epitaphium dependens ad sepulchrū ipsius tale est:

*Phoenix Doctorum, ac paris experts,
Philosophorum*

*Princeps, verborum vox fundens dogma
sacrorum*

*Hic iacet Albertus, praeclarus in orbe,
disertus*

*Pra cunctis, certus assertor in arte re-
pertus,*

Maior

Maior Platone, vix inferior Salomone.

*Quem tu Christe bone Doctorem iunge
coronæ.*

*Annis bis denis minùs ætis mille
trecentis*

Christi nascētis, de corporis exit habenis

*Quinta post festum Martini luce, mo-
lestum*

*Omne, petendū Deum, transiit; agens
iubileum.*

*Qui legit hos versus, mox ad tumultum
retrouersus,*

*INCLINA dicat Collectam cum RE-
QUIESCAT.*

CAPVT XLVI.

*Quòd miracula fecit in vita, quæ ta-
men in particulari non sunt scri-
pta propter negligentia Fratrum.*

QVAMVIS autem miracula multa
venerabilis Albertus in vita per-
fecerit, scripto tamen in singulari non
sunt commendata ex incuria Fratrum:
nam & de beato Patre nostro Domini-
co legitur quòd multa miracula per ip-
sum facta obliuioni tradita sunt ob Fra-
trum

trum indiscretam humilitatem : quæ
profectò humilitas inter Fratres & Al-
berti tempore perseuerabat, nec tunc
miracula facere pro magno habebatur,
cùm multi ex Fratribus illo in tempore
hoc dono claruerunt, sicut refert Liber
qui Vitas-Fratrum intitulatùr, & quem-
admodum Auðtor Libri Apum com-
memorationem de quibusdam faciens,
particularia miracula tacet, nihilomi-
nùs tamen in generali ea ponere voluit,
sicut facit de Magistro Salomone, de
quo dicit, quòd in senio Ordinem Præ-
dicatorum Coloniae intrauerat, & per
totam Teutoniam doctrina & miracu-
lis clarens, sanctissimo fine quieuit in
Colonia; cuius tamen miracula in spe-
ciali non reperiuntur, nec locum sepul-
turæ scimus, sicut & de aliis & magnis
& sanctis viris, quorum corpora igno-
rantur propter negligentiam & humili-
tatem Fratrum. Verùm & de beatissimo
Augustino historiam scribens, penè
nulla de eodem Doctore narrat mira-
cula, nisi hæc tantùm, & quidem satis
breuiter, dicens sub hac verborum for-
ma: *Noni Augustinum pro energumenis
orasse quibusdam, & liberatos à maligno.*

& alius quidam cū egrotum illi præsenterasset, orauit pro eo Augustinus, & sanatus est. Non autem alia vel plura describit de Augustino miracula. Sic pari modo & Auctor Libri Apum Alberti vitam, tamquam discipulus eius per longum tempus existens, peroptimè sanctam nouit, ut testatur, de miraculis ipsius breuiter locutus est, dicens post alia in hunc modum: *De Alberto dicimus, quod miraculis multis claruit, quæ eius vita meritum ostendunt.*

CAPVT XLVII.

Quòd meritis Alberti Frater quidam à capitis dolore liberatur.

FRATER autem quidam graui dolore capitis vexatus, non diffidens de Alberti meritis apud Deum, cum fiducia accepto beati viri bireto imponit proprio capiti; & ecce protinus omnis molestia fugata est, pleneque conualuit.

CAPVT XLVIII.

*De miraculo quod contigit, antequam
fuit sepultus, circa eius venerabi-
le corpus.*

QVALITER verò Dominus de Al-
berti salute nos certos reddidit &
gloria, subsequens prodit miraculum.
Nam Scriptor Legendæ beati Thomæ,
ob commendationem discipuli maio-
rem, de Magistro Alberto mirabile
quid in eadem Legenda commemorat,
sub isto tenore verborum prosequens
sermonem: *Nec vacat, inquit, à commen-
datione discipuli, si aliqua subiungamus de
commendatione Magistri. Erat Magister
Albertus in omnibus scientiis singularis
excellentiæ, cuius corpus præ deuotionis
gratia requisitum in tumba, quod positum
fuerat, ut est consuetudo, supinum; inuen-
tum est, ut sibi moris erat dum viueret,
quasi in oratione recumbens. Cui discipu-
lum, scilicet Thomam, diuinus Spiritus
mirabiliter adequauit. hæc in Legenda
sancti Thomæ.*

Ex iam dictis verbis clarè notatur,
hoc miraculum factum fuisse in Alber-

ti corpore diuino nutu, mox post obitum ipsius, cum nondum traditum esset sepulturæ; quia pertinet et dicit requisitum fuisse ex deuotione Fratrum in tumba, non in sepulchro: ex quo enim Dominus Siffridus Colonienſis Archiepiſcopus ipſam honorificè vnà cum Collegiſ & Nobilibus per circuitum ciuitatis Colonienſis, vt ſuperius notatum eſt, ſepulturæ tradidit, conſtat per aliquot dies corpus Alberti in ſepultum in tumba iacuiſſe, antequam Nobiles præſati iuſſu Domini Siffridi ad ſepeliendum ipſum conuenirent: in quo tempore nimirum Fratres præ deuotione accedentes tumbam, vti prædilecti Magiſtri ſui corpus videre cupiunt & requirunt; ſicque factum eſt vt preſioſam illam glebam, corpus videlicet tanti Pontificis, ad modum orantis inuenirent. Quo proſectò miraculo omnipotens Deus palam facere voluit ſui famuli dignitatem & gloriam, oſtendens hoc mirabili factò quantum viuens ad ſuperna orando rapi conſueuerat, cum etiam corpus ex anime ſeſe diuino nutu in altum leuando quaſi orans erigebat. In hoc ſiquidem ſimilis beato

Paulo

Paulo primo Eremitæ, de quo simile quasi legitur, quia cùm in oratione spiritum redderet flexis genibus, mansit ipsum corpus examine sic extensum ac si viueret; quod beatus Antonius ita inuenit.

CAPVT XLIX.

Contra fabulantes qui dicunt ipsum petiuisse à Deo Purgatorium.

QUIDAM autem phantastici, peruer-
tentes ea quæ quandoque prædi-
cari audiunt, ob suam ignorantiam lon-
gè aliter alijs insinuant quàm prædica-
tum sit; quemadmodùm de Alberto fieri
contingit, de quo nonnulli recitare so-
lent, quòd petierit decem dies esse in
Purgatorio: alij dicunt quinque aut
tres, & postea apparuisse, & dixisse
quòd stultè petiisset, quia magna esset
pœna. Alij adhuc magis addentes, di-
cunt quòd hoc petiisset in hunc mo-
dum, dicens ad Angelum qui ad ipsum
missus fuerat: Omnia expertus sum
quæ in mundo sunt, volo etiam experiri
Purgatorium. Hec & similia alia dicunt
fabulantes; & quia fortassis quidã qui
nimis

nimis leues sunt ad scribendum quæcumque audiunt, possent hanc fabulam tamquam verum aliquid notare, placuit inferere hoc, vnde ortum habeat fabula præfata. Nam in secundo Libro Apum cap. LXXVII. Auctor eiusdem Libri inter alia dicit in hunc modum: *Quanta autem prudentia sit, pœnitentiam agere in hac vita, exemplum subsequens demonstravit. Erat vir fidelis & bonus, sicut Magister Albertus Ordinis Predicatorum, & post Ratisponensis Episcopus, sibi ab ijs qui rem familiariter nouerant, traditum referebat, qui post diutinam pœnitentiam quam sanus fecerat, incidit in languorem grauissimum; quo per annum non modicè tribulatus, rogauit cum lacrymis Dominum ut tanto languori finem imponeret data morte. Nec mora, missus ad eum Angelus Domini dixit ei: Exaudiuit Dominus precem tuam; sed eligas quod vis. Aut tribus diebus Purgatorij pœna torqueberis, si nunc decedis; aut si adhuc per annum in languore manere volueris, sine ullo Purgatorio ad superos euolabis. Tunc ille pœnam præsentem recolens, nec futuram aduertens respondit: Mori potius eligo, & non tantum tribus diebus sed quan-*

tum

zum Domino placuerit, in Purgatorio tribulari. Fiat, inquit Angelus, secundum verbum. Nec mora, languens morte solutus est, & eius anima in Purgatorium deportata. Vno ergo exacto die venit Angelus ad locum Purgatorij ubi anima torquebatur; & dixit ei: *Quid nunc agis, ô anima, qua pro languore unius anni tribus diebus elegisti in Purgatorio detineri? Cui anima: O seductor, non Angelus! qui me in pœnis multis annorum curriculis pro dierum spatiis fefellisti. Et Angelus: Non mora, inquit, sed inastimabili tortura decepta es; quia non nisi unum diem de tribus in Purgatorio peregisti: tamen tu adhuc si retractare volueris quod elegisti, Dominus miseretur ut ad corpus tuum, quod nondum sepultum est, reporteris, & per annum unum languorem quem expertus es patiaris. Cui anima, Annuo, inquit, ut non per annum tantum, sed vsque in finem mundi languore etiam detinear acriori. Hoc dicto anima reportatur ad corpus, & per annum unum languore detenta, multos quibus hoc retulit ad pœnitentiam animauit, & post annum iteratò defunctus, transiit ad superna. hæc in Libro Apum. Ecce, hoc exemplum discipulus Alberti, scilicet Tho-*

Thomas Brabantinus, auctor Libri Apum, ex ore Alberti se scripsisse refert: insuper dicit, eundem Albertum hoc audiuisse ab ijs qui rem familiariter noverant. Quomodo ergo prudens vir Albertus sibi elegisset Purgatorium, cum sciebat hoc non esse petendum ex aliena tam dura experientia. Imò Albertus in Postilla sua dicit, quòd viri boni debent sibi dare tribulationes, vt sic purgari euadere possint pœnam Purgatorii. Et certè Albertus optimè sciebat ex fide, quòd acerbissima esset pœna Purgatorii: quod probatur ex scriptis ipsius, vbi ponit quid sit Purgatorium, & qualiter ignis agit in animas. Stultum est ergo dicere quòd sibi hanc pœnam elegisset.

C A P V T L.

*Destructio alterius fabula confictæ
loquacitate rudium.*

ALIA fabula est, habens ortum ex aliquibus quæ scribit Auctor Libri Apum. Nam quidam grossi nonnumquam cum libenter aliquid recita-

re vellent, mirabile fabulantur de Alberto quòd adamauerit filiam Regis Franciæ, & de Parisiis in conspectu multitudinis, vnà cum ipsa inuisibilis effectus Coloniam mirabiliter adduxerit eandem. Quæ fabula ita fatua est, vt nemo ipsam audiens credat eam esse veram, sed fabulantem cum fabula derideat. Sed vnde ortum habeat, apertendum est. Nam in secundo Libro Apum, cap. lxxxiv ita habetur: *In partibus Teutonia plenissima Fratrum Predicatorum & Minorum, præcipuè beata memoria Episcopi Ioannis Ordinis Predicatorum attestatione percepi, puellam esse nobilissimam filiam Comitis de Swannenberg in Claustro Monialium nutritam, quæ per aliquas noctis horas à demonibus rapitur, & in ipso raptu inuisibilis & incontrectabilis comprobatur. Et hoc quidem cum frater eius carnalis de Ordine Fratrum Minorum experiri certius voluisset, accepit dictam puellam sororem suam in gremio, & brachiis eam fortissimis strinxit ac tenuit; & tamen veniente hora, rapta de manibus tenentis inuisibiliter & incontrectabiliter tollebatur. Hoc exemplum Magister Albertus, Frater*
Ordinis

Ordinis Predicatorum, Theologus, in disputatione Parisiis adduxit, cum coram Episcopo Parisiensi prædicta Quæstio de raptu mulierum talium moueretur, sicut ab illis plena fide percepimus qui in Disputatione fuerunt. hæc omnia de verbo ad verbum in Libro Apum habentur. Ecce hoc exemplum de raptu nobilis puellæ Albertus adduxit in disputationem Parisiis coram Parisiensi Episcopo; & fabulatores, qui retinere non possunt rem gestam ut facta est, dum fabulari delectat, & mendacium effugere non curant, de Alberto fabulam ut libet fabricant, sicut & de Purgatorio superiùs notato faciunt. Huiusmodi igitur stulti fabulatores, ignorantes de quibus affirmant, taceant necesse est, cum nulla suspicio de Alberto haberi potest in huiusmodi, eò quòd Parisiis ipse magnificus sit Doctor promotus, & ibi gratiosè legerit, amabilis & graciosus cunctis, & præcipuus fuerit in Religione tunc temporis, quando disciplina & religio in Ordine permaximè floruit. Et quis non ipso auditu fabulam esse confictamprehendit, cum huiusmodi proles regia abduci per hominem in

Coloniam non posset sine pœna capitis? Nec certè latere potuisset Albertus sine infamia in aliquo mundi angulo, si hoc per ipsum fuisset admissum. Iam verò contrarium verum noscimus esse, quia ipse per totum mundum celebris famæ vsque in mortem extitit: vnde Episcopus effectus est, & extirpator multorum errorum in facie totius Ecclesiæ, vt superius probatum est.

C A P V T L I.

Destructio aliarum fabularum de Alberto confictarum.

Est proinde notandum, quòd Vincentius in secunda Parte Speculi historialis libro xx. cap. iiii. sic scribit: *Porro sanctus Antidius Archiepiscopus martyrium subiit, qui aliquando in tertia Feria post Palmas transiens pontem Dini fluminis, vidit agmen demonum gesta sua principi suo referentium, & inter eos Æthiopem manu sandalium preferentem ad iudicium, quòd Romanum Prasulem cum hoc per septem annos impugnatum, tandem ad lapsum traxerit. Qui vocans*
ad

ad se *Æthiopem*, & in virtute Dei & sanctæ Crucis super eum ascendens, præcepit ut eum Roma sub manu Domini eadem velocitate qua venerat, saluum & incolumem perferret. Itaque demoni superpositus, illum sapè versiculum iterans, Deus in adiutorium meum intende, &c. eo vespertante Romam venit FERIA quinta, hora celebrandi Officii. Et damone præ foribus expectante, Papa rem retulit: negantem per sandalum ad pœnitentiam movit, & Missa vice eius celebrata, & parte Chrismatis à se consecrati assumpta, damone revespente ad Ecclesiam suam rediit Sabbatho sancto hora celebrandi Officii. hæc Vincentius. Istud, ut audisti, Vincentius de sancto Antidio scribit: & immediatè ibidem adiungit quoddam prodigiosum quod contigit de gigantea muliere; cui præmittit cum rubrica hoc nomen *Sigebertus*, eò quòd ex illo sumpserit hoc quod scribit. Iam verò quidam non retinentes quæ legunt, nec aliquando intelligunt; cùm noui aliquid, ut placeant hominibus, dicere volunt, cudere fabulas non metuunt: & hoc ex iam præfato facto Antidij quidam faciunt, fabulantes de

Alberto. Dicunt enim quia Albertus cognouit lapsum Papæ, & vectante spiritu maligno ad cameram Summi Pontificis sit perductus, vt impediret eum ne cum muliere peccaret. Addunt-que alij quòd dæmoni iussit pontem quemdam ædificare, & præcipienti mox obediuit. & cùm hoc dicunt, nesciunt tamen vbi pons ille sit edificatus. Atque inferunt consequenter, quòd ipse etiam vno die duas Missas celebrauerit, aut tres, in diuersis locis remotè à se distantibus; nescio quas ciuitates nominant. Sed reuerà mentita est iniquitas sibi; fabulæ enim sunt ex loquacitate hominũ fabulantium fabricatæ. & cùm huiusmodi fabulantur, mirificè Albertum commendant, quòd tanta potuit facere. Ecce, de ponte mentio est habita in præfato exemplo de Antidio, vbi ei dæmones apparuerunt. Similiter quòd Missam celebrauerit Romæ pro Papa, distans remotè à sua Diocesi. Fitque ibi relatio de dæmone cum vectante. Quæ dum mira sunt, tres ex ijs de Alberto fabulas finxerunt. Nec hoc mirum alicui videatur, cùm quotidie huiusmodi fieri solet ab idiotis,

tis, qui dum prædicant, multa falsa dicunt, etiam in ipsis Legendis Sanctorum: sed & populo quandoque dum in priuato narrare volunt quæ legerunt, longè aliter proferunt quàm res sit, propter suam ignorantiam, sicut notum est multis qui talia experiuntur.

CAPVT LII.

Contra alios fabulatores redargutio.

EST aliud quod fertur de Alberto, videlicet quòd ipse composuerit Sequentiam, *Salue Mater Saluatoris*, quæ decantari solet in Festo Assumptionis Virginis gloriosæ: de qua dicunt, quòd dum ipsam dictaret, atque ad illum versum veniret,

Salue mater pietatis,

& deliberaret qualiter continuaret versum ipsum, subitò venit illi in mentem quid subinferendum esset, & adiecit quod sequitur, videlicet,

Et totius Trinitatis

Nobile triclinium.

quapropter obuiauit illi Virgo beata, & regebat eam ei, dicens quòd num-

quam sic salutata esset ab homine. Sed hæc relatio absque dubio non est vera, cum scimus ex Libro Apum quòd hæc Sequentia sit facta à Fratre Adam de sancto Victore; de quo etiam ibidem scribitur, quòd beata Virgo ei apparuit. Quòd autem attribuitur Alberto, non nisi ex ignorantia venit hominum, & inconsideratione ipsorum, qui fabulantur inuenta omnia quæ opinantur vel cogitant. Sic quidam dicunt de Alberto, quòd totum mundum perambulauit cum Alexandro Magno: & quòd fuerit paruus in persona; & vocatus per Papam, qui ei loqui voluit, accesserit, stans ante ipsum, & adedò paruus fuerit, vt Papa ipsum putaret flectere genua: quare dum diceret ei, Surge; respondit Albertus, se stare. & quia paruus corpore fuerit, sed magnus scientia, impositum sit illi hoc nomen Magnus.

Has fabulas hîc notare volui, vt cognoscant singuli quid tenere debeant de ijs & similibus, si eas ab aliquo proferri audierint: nam huiusmodi fabulæ de multis Sanctis proferuntur, de quibus hîc longum est enarrare: sicut de
Carolo

Carolo Magno, de quo dicunt quòd sit admonitus per Angelum vt irèt in campum ad quemdam à quo furari addisceret; & similia. Sic de sancto Petro Apostolo multa à rudibus proferuntur, & vtinam non crederentur! Scio enim ciuitatem de qua fertur (si autem verum est, ignoro) quòd in tantum ibi inualuit opinio hæc, quòd omnes Petri sunt mirabiles, vt nemo ibi assumatur ad Consulatam vocatus hoc nomine. Et reuerà, si verum est quod dicitur, & perseverant in sua sententia, grauitè essent puniendi ob huiusmodi perfidiam. Fabulis igitur refutatis, & fabulatoribus damnatis, veritatem Historiæ prosequamur.

CAPVT LIII.

Qualiter gloriosus apparuit Albertus socio suo post obitum in Ecclesia.

MVLTI autem modis Dominus gratiam sancti huius viri suis fidelibus reuelare dignatus est: nam Frater Gotfridus de Dyuiburck Alberti socius & minister, post mortem venerabilis

rabilis Alberti, ieiuniis, lacrymis, & orationibus continuis pro eius anima Dominum exorabat. Cui Fratri post Matutinas in Ecclesia oranti & vigilantibus Albertus visibiliter apparuit cum splendore mirabili nobilissimis vestibus Pontificalibus adornatus; in capite mitram habens Pontificalem, in cuius fronte erat magnus lapis pretiosus, qui splendore mirabili plures ex se radios emittens, totam illustrabat Ecclesiam: indumentis autem eius inserti erant multi lapides pretiosi. Frater verò hæc videns, stupens præ admiratione tam mirabilis visionis, Albertumque recognoscens, quærit qualiter sibi esset. Cui ille: Optimè, fili mi, humani enim sensus capaces non sunt gloriæ & claritatis, quibus me sua pietate Dominus decorauit; quas corporalis hæc pulchritudo insinuat. Candores enim radiorum de gemma frontis copiosius effluentes, & noctem quasi in meridie illustrantes, inexplicabilem gloriā quam adeptus sum designant. Alij autem lapides pretiosi, Libri sunt multi & Opera Scripturæ, quæ ad defensionem fidei, declarationemque diuinæ sapientiæ ipse

se dono Dei exposui. Et sicut in vita mortali viuens multos de ignorantie tenebris ad veritatis lumen & diuinæ cognitionis eduxi, sic altiùs ad gloriam meam cumulandam donauit mihi Dominus ab omni pœna Purgatorij sex millia animarum meis suffragiis liberare: & disparuit his dictis. Nec impossibile videatur alicui, tot animas de Purgatorio posse liberari Alberti suffragio, cùm Gregorius Turonensis Episcopus in vno Sermone de sancto Laurentio, testatur de eodem Martyre, quòd singulare priuilegium habeat super animas in Purgatorio, ita vt in qualibet hebdomada sexta FERIA per ipsum vna anima liberetur à pœnis Purgatorij. Ponit enim idem Doctor Gregorius ad confirmationem sui dicti exemplum de hoc, sic inferens: *Abbas probata Religionis Monasterij sancti Laurentij desiderabat à Deo scire quanti meriti esset idem Martyr apud Deum. Et ecce cùm hic idem Abbas meruit vt sue preces exaudita essent apud Deum, per visum Angelico alloquio dignus habitus est, & in ipsa visione videbat in quodam terra loco miserrorum cruciatum, sed Dei misericordiam*

quandoque expectantiū. Cū verò quid-
nam hoc esset hesitaret; ecce Lenita qui-
dam sole splendidior & niue candidior,
maxima Angelorum comitatus multitu-
dine adueniens, animam vnā eripuit de
igne illo, eamque ingenti cum tripudio ad
superna gaudia deferebat. Et Angelus ad
Abbatem ait: Iste est gloriosus Martyr &
Lenita Laurentius, Deo acceptissimus, qui
passionem sustinuit pro Saluatoris nomine
sexta Feria; & hoc priuilegium à Deo ha-
bet, vt in qualibet hebdomada ipsa sexta
Feria vnā possit liberare animā de pœnis
Purgatorij. hæc Gregorius præfatus; qui
etiam addit, quòd quicumque in sexta Fe-
ria deuotè commemorationem facit sancti
Laurentij, non præualebit aduersus illum
inimicus. Non igitur inconueniens est,
vt Albertus tam continuus in oratione
deuota, vt præmissum est, & maximi
zeli, sitiens salutem animarum, quem-
admodum copiosissimè demonstrat
eius Libri, insuper tantum fructum fe-
cerit animarum per totum orbem, sin-
gulare acciperet super animas priuile-
gium ex dono Dei; cū zelum anima-
rum acceptissimum sacrificium, teste
beato Gregorio, esse nouimus.

CAPVT LIV.

*Reuelatio quòd Albertus beatus sit,
& altior in beatitudine quàm
communitè saluati.*

FVIT in Treuiris quædam nobilis
femina de Vilsarbruck, quæ vsque
ad octogesimum vitæ suæ annum in
castitate & innocentia Deo seruiens o-
pinione celebris habebatur. Hæc quin-
todecimo die post mortem venerabili
Fratri Theoderico tunc Fratrum Le-
ctori in Treuiris, cui solita fuerat con-
fiteri, ad pulpitum in studio suo resi-
denti, visibiliter apparuit, dulciter ip-
sum salutando; dixitque illi: Ex parte
Dei missa sum ad te, vt de rebus, qua-
rum certitudinem affectas, certus sis.
Tunc religiosus vir ait: Qualem vitam
ducis, Domicella? Quæ respondit: In
conspectu sum sanctæ Trinitatis, æter-
næ beatitudinis gaudio quietata. At ille
rursus: Nosti Magistrum Albertum
nostri Ordinis Fratrem, qui nuper
Colonix apud Fratres Prædicatores
obiit? Respondit illa: Optimè noui.

Et Lector, Vbi est? inquit. Cui respondit illa, dicens: Gaudet lætitia inenarrabili longè valdè supra nos.

CAPVT LV.

Alia reuelatio diuinitus ostensa, ostendens quòd confirmatus sit in gloria.

ALIVD in eius Legenda habetur, & similiter in Vitas-Fratrù Prædicatorum, vbi sic legitur: Quædam in Teutonia Abbatissa Cisterciensis Ordinis, per se atque Sorores suas multas fecit pro Alberto orationes nouiter defuncto, eò quòd viuens frequenter eas sua doctrina & admonitione ad bonum inducere solitus erat. Quodam igitur manè cùm dicta Abbatissa paululùm obdormisset, vidit ipsum Albertum ante Altare paratum vt populo prædicaret, sed in aëre stantem; sancta autem femina præ timore clamans, dicebat: Heu! Frater Albertus cadet, quia fulcrum non habet. Cui adstans persona quædam reuerenda, ait: Frater iste confirmatus est, cadere non potest. Sic igitur

igitur consolata, auscultabat quæ ipse erat prædicaturus. Et inchoans ille ait: *In principio erat Verbum, & Verbum erat apud Deum, usque ad plenum gratia & veritatis.* Statimque subiunxit: Et hoc oculis meis ego video. sicque disparuit.

Ioan. i.

CAPVT LVI.

Reuelatio de gloria Venerabilis Alberti & beati Thomæ eius quondam discipuli.

EST etiam Libellus quidam continens reuelationes & visiones factas cuidam sanctæ virgini, nomine Machildis de Helpede, Ordinis Cisterciensis, quæ ab infantia suam virginitatem Domino consecrauerat, tam immunis à peccatis, sicut duo Confessores eius testati sunt, ut tantam innocentiam se numquam reperisse dicerent. quæ se etiam tam vilem ob humilitatis virtutem reputabat, quòd ea quæ per reuelationem à Domino Iesu acceperat, aliis enarrare non tentasset, nisi coacta à suis fuisset; quemadmodum Frater Henricus

cus de Hallis, Teutonicus, Doctor deuotus & gratioſus, Ordinis Fratrum Prædicatorum, qui ſcribit Librum eumdem, affirmat dicens, non hunc Librum præſumptuoſa audacia compilatum, ſed ſui Prælati conſilio & præcepto. hic verò Liber ex reuelatione Saluatoris, *Liber ſpiritualis gratia* vocatur, habens hunc Prologum: *Benignitas & humanitas Saluatoris noſtri Dei*, &c. incipit autem ſic: *Fuit Virgo quadam ab infantia à Deo in benediſtionibus præuenta*, &c. In quo Libro inter alia & de venerabili Alberto, atque de ſancto Thoma de Aquino, qui in illius Virginis tempore paulò antè obierant, hoc quod ſubiungo continetur, eidem Virgini reuelatum diuinitus. Ait autem iſtius Libri Auctor, in hunc modum proſequens ſermone: *Venerabilis memoria Domini Alberti & Fratris Thomæ de Ordine Prædicatorum animas vidit hac Virgo velut duos prænobiles Principes, hoc modo celeſtia penetraſſe. Ecce thronum, cui inſederat Rex celi, conſpicit, duasque venerandas perſonas accedentes ad Regem; in veſtibus autem eorum, verba aureis litteris conſcripta habebantur, quæ ſingula*

singula splendorem mirificum de se diffunderunt, atque excellentem emiserunt odoris suauitatem. Vnumquemque verò Angeli duo mirificis cum candelis praebant usque ad sedentem in solio maiestatis. Virgini deinde per spiritum reuelatur, has quas viderat personas, Albertum & Thomam esse; qui tamquam diuina cognitione in terris illustrati, necnon igne spiritualis amoris quo flagrabant incensi, aptissimè per Angelos duos cum luminaribus qui praebant, sunt designati; eò quòd non parum de Cherubim atque Seraphim donis haberent. Inscripta autem verba aureis litteris splendorem ex se radiantia, doctrina illorum est, quam de Christi diuinitate atque humanitate scribendo docuerunt: unde iam ipsorum anima mira iucunditate letantur, ac si odore suauissimo sint recreata; similesque effecti sunt Sanctis omnibus ob meritum copiam, eò quòd omnium illorum conuersationem, in virtutibus ac doctrina imitari studuerunt in hac corruptibili vita, hæc ex præfato Libro.

CAPVT LVII.

*De interpretatione nominis eius, &
quare Magnus sit cognominatus.*

NON igitur frustra hic Doctor magnus hoc nomen Albertus gerit, si interpretatio ipsius nominis inspicitur, & ea quæ huic inerant dona iam proposita mente teneantur. Dicitur enim Albertus ab *Al*, quod est altum, & *ber*, quod est fons siue putens, & *thus*, quod nomen est arboris immensæ atque ramosæ, gummi album, solidum, mundum, & odoriferum stillantis. Fuit namque altus in diuinarum scientiarum speculatione, non quidem qualitercumque, sed speciali quadam gratia præuentus illic oculum fixit, quod paucissimis consideratione peruenire donatum est: vnde & alto stilo, quæ intellectu conspexerat, digessit, nec capi faciliter à nobis possunt, nisi transcendens infimis, mente & affectu ad superna transeamus. Hinc etiam in ijs quæ corporalia sunt, cunctos præit ingenio, vt quasi alter Salomon disputare de cedro quæ

quæ in Libano est vsque ad hyssopum
qui de pariete nascitur, potenter vale-
ret. *A ber* dictus est, quod fons siue pu-
teus sonat: fons namque siue puteus
fuit iste ob copiam doctrinarum. Cùm
enim ea quæ Medicorum sunt promit-
tant Medici, tractentque fabrilia fabri;
huic tamen in omni libro sicut Danieli
Dominus dedit sapientiam, vt omnium
Facultatum Professores de fontibus po-
tati Alberti, suam extinguere sitim;
cùm nihil quod scire desiderant homi-
nes, magni Doctoris intellectui credi-
tur defuisse. Et dum nullum scibile ig-
norasse dicitur, putant quidam intelle-
ctum adeptum ipsum habuisse. Quod si
verum est, in quæstione relinquimus;
qui diffinire incerta non nouimus.
vnum tamen affirmare audemus, illud
videlicet, In omnibus experto creden-
dum est Alberro. *Thms* dictus est, quia
arbor alta cælestis agricolæ manu in
medio Ecclesiæ plantata est hic beatus,
qui ad ardua virtutum omnium sese
semper extulit. Ramosa nimis propter
numerositatem discipulorum: quot-
quot enim ex ipsius doctrina siue suo-
rum discipulorum, scilicet beati Tho-
mæ,

mæ, Fratris Vlrici, & alterius Thomæ
 iam sæpè dicti scientiis eruditi sunt, &
 fructum afferunt; quasi tot Albertus
 ramos de se prodire fecit, cùm disci-
 pulorum scientia ex tanti Magistri do-
 ctina originem habuit. Hæc arbor
 gummi mundissimum odoriferum ni-
 mis stillat per sanctæ vitæ mundiciam,
 & bonæ famæ fragrantiam: nam in om-
 nem terram exiuit sonus de bonitate
 eius, ita vt imperfecti etiam balbutire
 gestiant, perfectè loqui non valentes.
 Vel etiam thuris nomine appellatus
 est, quia continuæ orationis incensum
 deuotione præcipua obtulit Deo, cùm
 tantum orationi incumberet, vt Psalte-
 rium integrum quotidie personaret.
Magnus verò cognominatus est, non
 ob aliud, nisi ob excellentiam singula-
 ris scientiæ in omni re scibili, & præ-
 claram famam; eò quòd iuxta Humber-
 ti testimonium innumerabilem fru-
 ctum fama, exemplis, & scriptis per to-
 tum orbem fecerit, & frequentes vi-
 ctorias contra erroneos & hæreticos.

CAPVT LVIII.

De exhumatione corporis Alberti, & qualiter repertum est non omnino consumptum.

DE inuentione autem vel potiùs transpositione corporis eius subiungentes, notandum est, quòd anno Domini M. cccc. lxxxiii. tertio Idus Ianuarij, altera scilicet die sancti Pauli primi Eremitæ, iussu Reuerendi Magistri Ordinis tunc Coloniae præsents, videlicet Fratris Salui de Panorma, apertum est sepulchrum venerabilis Alberti ferreis instrumentis, quia facilis non erat accessus propter lapidem grandem superpositum. quo aperto in præsencia Reuerendi Magistri Salui præfati, ac Prouincialis Prouinciæ Teutoniæ, Priorisq; Conuentus Coloniensis, sacre Theologiæ Professoris; necnon in præsencia Domini Rectoris almæ Vniuersitatis Coloniensis, ac ceterorum Magistrorum Theologiæ Facultatis, & multorum Fratrum, repertum est corpus quod quærebatur. Sarcopha-

cophagus de lapide siquidem inuentus est, in quo tumba lignea continens venerabilis Alberti corpus terra cooper-
tum. Nam asser quo tumba ipsa clausa fuerat, consumptus fuit; nimirum quia sic ducentis & tribus annis cum corpore in terra iacuit. Sarcophago igitur vnà cum lignea tumba & corpore edu-
ctis in lucem, terra omnis per Fratres de tumba exponitur, corpore dimisso intacto; quod baculum Pastoralem ha-
buit in manu, annulum de cupro in digito, sandalia in pedibus, & mitram Pontificalem in capite. Et cùm tanto tempore, vt dictum est, in terra iacuis-
set corpus venerabilis Pontificis, non tamen foetor aliquis de ipso exhalabat, sed odor suauis de illo emissus adstan-
tes refecit. Sed quod mirabilius vide-
tur, nec ipsum corpus omnino consum-
ptum fuerat, quia materia oculorum in ipsis sedibus luminum vsque nunc perseuerat, & caro in mento cum parti-
cula barbæ similiter, atque vna auricu-
la arefacta. Sed & humeri non omnino consumpti sunt, cùm etiam vnus hu-
merus pro maiori parte integer est. In-
super & crura sunt, quibus caro adhæ-

rens arida cernitur, pedesque cum ipsis sandaliis ossibus crurium inhærent, & totum corpus superius indissolutum quoad ossa & iudiuisum vsque hodie in eadem tumba iacet. In collo verò, vbi adhuc vna canna cernitur, quæ, vt puto, continuari solet pulmone, vel alteri membro vitali, dependebant hæc, videlicet particula de Cruce Domini, & denarius perforatus cum clauo Domini, atque vnuum Agnus Dei de cera serico inuolutum: quæ, vt credimus, deuotionis gratia in vita portare consueuerat, cum quibus & sepultus est. Sic ergo hæc membra & nunc cernuntur, cum sit tamen quartus annus post sepulchri aperitionem. Et hoc quidem iuste omnipotens Deus in gleba exanimata Alberti fieri voluit, quia intemeratæ Virginis Matris hic Doctor in vita amator atque laudator singularissimus extitit, nec dubium & imitator feruentior.

CAPVT LIX.

*De miraculis quæ referuntur facta
Alberti meritis.*

ALTERA autem die exhumationis corporis & deinceps multi vtriusque sexus homines præ admiratione corpus iusti viri cernere cupientes, tumbam cum qua extractum fuerat visiterunt; inter quos nonnulli se meritis ipsius sanitatis beneficium referunt accepisse. Et quamuis de talibus examinatio ad integrum subsecuta non est ob incuriam Fratrum; referre tamen ea, ut à fide dignis accepimus, non formidamus, eò quòd incredibilia non sunt hæc, quæ graues viri intinere voluerunt, prout acceperam ab ijs quibus contigerunt huiusmodi beneficia sanitatis.

Fuit proinde vir quidam, Coloniae, filium habens, qui in tantum visu caruerat, ut pænè nihil videret. Is dum hanc ob causam manuale officium nullum posset addiscere; pater illius, quia rebus pauper erat, non modicum turbatus

batus est. Sed dum auxilio destituitur humano, flagitare idem homo non distulit diuinum. Illo ergo in tempore præfatæ exhumationis, credens Albertum virum iustum apud Omnipotentem tanti meriti esse, vt se, qua premebatur angustia posset eripere, illicò votum emittit venerationis, venerabili Doctori se exhibiturum, si cæcitatem illi qui patiebatur, sua intercessione dignaretur auferre. Et ecce, protinus idem quem tenebræ inuoluerant mœrore, per Deo digni Alberti merita redditus est gaudio & luci; iamque voti compos, absque impedimento sutoris artificium is qui sanus factus est, vt aiunt, exercet.

Eodem tempore mulier quædam longa ægritudine cùm premeretur, audiens de fama Alberti venerabilis Pontificis, votum eidem spondit. Quo emissio, restituta est sanitati, reddens ea quæ distinxerunt labia illius: & præstitum sibi beneficium silentio tegere voluit; sed suo Confessori, à quo hæc audiui, in laudem Dei & venerabilis Doctoris honorem narrauit.

Alius vir quidam defectum sensus olfactus incurrerat, vt nec fœtidissimi

P

qui-

quidem odoris posset percipere præsentiam, etiamsi corpus perputridum naribus illius appositum fuisset. Et ecce, eo tempore quo corpus leuatum fuerat è terra, vnà cum aliis idem virtubam venerandi Patris visitat, corpus videre desiderans. Factumque est vt mox dum corpus inspiceret, etiam illius fragrantiam, restituto sibi sensu, sentiret. Hoc factum percepi à fide digno & religioso Sacerdote, qui se hæc audiuisse dicebat ab illo, qui beneficium hoc sentire meruit.

Alius fluxū patiens sanguinis (quam infirmitatem Physici dysenteriam vocant) eodem tempore cum aliis sepulchrum Alberti visitans, quia deuotus illi extitit, beneficium meruit sanitatis; vt à fideli Sacerdote recepi, qui ab ore illius cui sanitas collata est, se & alios multos audiuisse hoc testatur.

Sed aliud quoddam beneficium sanitatis venerabilis Alberti meritis impetratum non dubitamus: quod quidem eò certius, quò familiarius; & tantò est excellentius, quantò mirabilius; à Fratre enim ipso, cui hoc contigit, fideli attestazione accepi. Frater nempe ille
Ordi-

Ordinis Prædicatorum, grauiſſima moleſtia capitis vexari frequenter ante ingreſſum Ordinis ſolebat: qui dum ingreſſus fuiſſet Ordinem, poſt aliquot annos infirmitas per incrementa temporum inualeſcebat. Cumque in tantum hæc abundaret moleſtia, vt nec ſomnum caperet, nec vel vnũ Reſponſorium decantare cum Choro poſſet; & quod grauius erat, Pſalmodiam cum leuiter ſonaret, pœnam ingerebat verborum prolatio: dẽmum, dum ambularet, mouebatur quandoque cerebrum in tantum, vt motum ipſum audiret; vehementerque timuit, ne penitus cerebro à teſta capitis diſſoluto, perenne & incurabile diſcrimen ægritudinis incurreret. Quamobrem compulſus medicaminum ſubſidia quærere, nequaquam tum releuatus eſt per ipſa, imò deterius habuit. Sic ergo quaſi per annum aut ampliùs, hac deſolatione Frater ipſe attritus, anxius plurimis, de remedio acquirendo diffidebat. Humano igitur auxilio deſtitutus, cæleſte quærit patrociniũ. Adiit proinde venerabilis Alberti ſepulchrum, quem ob iuſtitie meritum patrocinari credidit, ſi indu-

bitata fide cum deuotione inuocaretur; flectensque genua, orationem quam statuit ob venerationem ipsius semper deinceps offerre, inchoat ea fide qua potuit. Et ecce, paucos post dies tantam recuperabat de hac inualetudine sanitatem, in qua & iam perseuerat, ut singulis diebus adhuc, comparata pristina ægritudine ad præsentem valetudinem, magna teneatur admiratione animi sui: prima enim nocte qua orationem fudit, quasi sensibiliber immutationem in vertice capitis ad sanitatem aduertit; quæ consequenter per incrementa cum orationis continuatione vsque ad perfectum est deducta, fauente Deo, cui laus perennis, haud dubium Alberti meritis indulta. Contigit autem ad tres vel amplius annos ante venerabilis Pontificis Alberti exhumationem.

HANC Legendam fideliter ampliando collegi, auxiliante Deo, ego Frater Ordinis Prædicatorum Conuentus Colonienſis, notus Fratribus nostris, utinam nominari inter electos merear! sperans Alberti suffragiis

giis adiuvare, pro cuius honore hunc laborem assumpsi; non tamen audacia presumptuosa, sed iussu & ex beneplacito mei Superioris. Rogo igitur ne quis aliquid apponat vel immutet, nisi certissimum sit quod apponere vult; & unde sumpserit vel habuerit, notet: aliàs enim, si quisque inferre voluerit quod ei placet, vel vaga & incerta relatione vel fabulatione perceperit, mendacem se, non veridicum Scriptorem, comprobavit. Tenui namque ego hæc compilando sic sobrietatem, ut nonnisi ea quæ certa sunt & probabilia scribere volui; & unde sumpta sunt, Prologus & ipsa Legenda Lectori demonstrabit.

INDEX
CAPITVLM
LIBRI
B. ALBERTI
DE
ADHÆRENDO DEO.

- C**AP. I. *De ultima & summa perfectione hominis, quantum in hac vita possibile est.* Pag. 7.
- CAP. II. *Qualiter quis omnibus aliis spre-
tis soli Christo inkareat & intendat.* 9.
- CAP. III. *Qua sit conformitas perfectionis
hominis in hac vita.* 11.
- CAP. IV. *Qualiter operatio humana de-
beat esse in solo intellectu, & non in sen-
sibus.* 13.
- CAP. V. *Decordis puritate, qua est præ
omnibus sectanda.* 17.
- CAP. VI. *Quòd adherere debet homo de-
votus Deo, nudato intellectu & affe-
ctu.* 21.
- CAP.

INDEX CAPITVM.

- CAP. VII. *Qualiter cor sit recolligendum intra se.* 24.
- CAP. VIII. *Quomodo in quolibet euentu homo deuotus se debeat Deo committere.* 28.
- CAP. IX. *Contemplatio in Deo, quatenus omnibus aliis exercitiis est praponenda.* 31.
- CAP. X. *Actualis deuotio & sensibilis non tantum curanda est, sicut voluntate Deo adherere.* 35.
- CAP. XI. *Qualiter tentationibus sit resistendum, & tribulationes qualiter sustinende.* 38.
- CAP. XII. *De amore Dei, quàm efficax sit.* 40.
- CAP. XIII. *Orationis qualitas & utilitas: & quomodo cor sit recolligendum intra se.* 43.
- CAP. XIV. *Conscientie attestatio in omni iudicio requirenda est.* 47.
- CAP. XV. *Contemptus sui, qualiter cause- tur in homine, & quàm utilis sit.* 50.
- CAP. XVI. *Providentiâ Dei, qualiter ad omnia se extendat.* 55.

INDEX
CAPITV M
VITÆ
B. ALBERTI.

CAP. I. De pueritia eius, & qualiter à beata Virgine in visione admonitus sit ut Ordinem intraret Fratrum Predicatorum. Pag. 77.

CAP. II. Quòd Ordinem intravit in iuuentute, ex propriis verbis ipsius habetur: & de modo quo ingressus est, & qualiter à beato Iordane vestitus Padua. 79.

CAP. III. Quòd oratione magis adeptus sit scientiam quàm studio & labore, & quòd precipuus fuerit inter deuotiores fratres. 85.

CAP. IV. Quòd adhuc iuuenis existens habuit notitiam naturalium rerum; & quòd vulgari vocabulo Philosophus vocabatur. 88.

CAP. V. Quòd Lector ordinatur in multis locis; in quo officio præ aliis excellentior

INDEX CAPITVM.

- tior extitit, non tamen propter scientiam elatior. 90.
- CAP. VI. Quòd Parisios mittitur, ubi magistralem cathedram ascendit, & qualiter malignus spiritus per ipsum fugatur signo sanctæ Crucis. 95.
- CAP. VII. Quòd beatus Thomas studuit sub Alberto, & qualiter spiritu Prophetico præuidit beati Thomæ in studio profectum. 101.
- CAP. VIII. Qua intentione scripsit tantum in Philosophia, & quàm necessarium fuit hoc fieri sua ætate. 106.
- CAP. IX. Qualiter Albertus reprehendit Nigromantiam & alias scientias conterminales Nigromantie, & quòd laudandus sit specialiter ob hoc cum Daniele & Moyse. 112.
- CAP. X. Quòd nemo debet studere Nigromantiam nec magicam artem. 123.
- CAP. XI. De gradu malitiæ artium conterminalium Nigromantie: & quare nominantur ab Alberto Garrimantie, & non merentur nomen scientiæ. 128.
- CAP. XII. Quòd fascinatio non est naturaliter, sed ministerio daemonum fit: quòd autem homines quidam generantur qui mira agunt, rarò tamen, per

I N D E X

Albertum declaratur. 135.

CAP. XIII. Quòd sculptura lapidum ad aspectus astrorum sunt prohibita: & quòd imagines sculptæ ad aspectus astrorum non possunt loqui. Insuper de pygmaeis & psittaco aue quæ loquuntur quo modo intelligantur. 137

CAP. XIV. Contra Astronomos excedentes in arte Astronomia, & quòd sint parum litterati: gaudeant ferè omnes deceptionibus. 149.

CAP. XV. Quid de Interrogationibus sciendum sit. 150.

CAP. XVI. Qualiter Albertus Alchimistas reprehendit, & deceptiones appellat. 151.

CAP. XVII. Quàm utile sit scire naturalia & occulta in rerum natura, & quòd talium Scriptores laudandi sunt. 161.

CAP. XVIII. Quòd scire naturalia, etiam impudica, utile sit & necessarium. 165.

CAP. XIX. Quòd Albertus quotidie legit integrum Psalterium Davidicum. 173.

CAP. XX. De Alberii deuotione ad venerabile Sacramentum, & de scriptis ipsius de eodem: & quòd Episcopatum coactus suscepit, atque voluntarie resignauit: sed & de eius simplicitate & pau-

paupertate in libris. 177.

CAP. XXI. De eiusdem deuotione ad Dominicam passionem, & qualiter probauit lignum sanctæ Crucis. 183.

CAP. XXII. De Alberti deuotione ad beatissimam Virginem Mariam. 190.

CAP. XXIII. De eiusdem admonitione ut frequenter & sapienter laudemus beatam Virginem. 193.

CAP. XXIV. Quòd beata Virgo creditur Alberto apparuisse, cum Librum de Laudibus gloriosa Virginis scriberet. 196.

CAP. XXV. Quòd beatus Paulus in visione apparuit Alberto, atque ipsum animauit ad continuandum Librum de Ecclesiastica hierarchia. 198.

CAP. XXVI. Quòd Albertus efficitur Prouincialis Teutonia, & quid gessit in illo officio. 202.

CAP. XXVII. De sollicitudine Alberti quam habuit in Prouincialatus officio circa sanctimoniam habendam à Fratribus. 210.

CAP. XXVIII. De zelo Alberti contra omne vitium, maxime Ecclesiasticorum; & quid Canonizatio confert Sanctis. 214.

CAP. XXIX. De tribulatione quam susti-

- merunt Fratres Predicatores & Mi-
nores, & qualiter liberati sunt diuini-
tus ab illa; atque de visione mirabili
ostensa de Alberto. 223.
- CAP. XXX. Qualiter disputauit Albertus
contra V Vilhelmum de sancto amore,
& eius complices; & de gratia in labiis
Alberti infusa diuino munere. 232.
- CAP. XXXI. De exempla quod retulit Al-
bertus Fratribus causâ adificationis; &
quod in omni necessitate inuocandum
sit diuinum auxilium. 234.
- CAP. XXXII. De erroribus quos damnavit
Albertus tam scriptis quàm disputa-
tionibus. 236.
- CAP. XXXIII. Quod Albertus coactus per
obedientiam Episcopatum suscepit: &
de Epistola Humberti, in qua multi-
pliciter Alberti laus describitur. 252.
- CAP. XXXIV. Quod Albertus multiplici-
ter de virtutibus & scientiis laudatur
à magnis viris. 258.
- CAP. XXXV. Qualiter Albertus ad Ra-
tissponam venit missus cum benedictione
à Papa. 262.
- CAP. XXXVI. De simplicitate eius in Epi-
scopatu, & alijs quæ gessit. 263.
- CAP. XXXVII. Quare Albertus resignauit
Episco-

Episcopatum, & quod laudandus sit propter hoc factum. 266.

CAP. XXXVIII. Albertus fundat Monasterium Virginum, & Chorum Fratrum construxit ob rationabilem causam: & de reverentia ei exhibita ab omnibus ob suam probitatem. 271.

CAP. XXXIX. Albertus cum magna devotione biennio ante mortem suam transfudit sanctam Cordulam. 273.

CAP. XL. Alberto Colonia revelatur obitus sancti Thome, qui in Campania partibus obiit: & de lacrymis eiusdem Alberti quas ex devotione fudit. 277.

CAP. XLI. Quod Albertus multis profuit, & quid in Concilio Lugdunensi egerit. 278.

CAP. XLII. Albertus usque ad finem vite sue divinis Scripturis fuit intentus. 281.

CAP. XLIII. Numerus Librorum Alberti, tam in Theologia quam in Philosophia. 282.

CAP. XLIV. Qualiter indicavit Fratribus signum sui obitus, & qualiter beata Virgo ipsi hoc signum promiserat. 299.

CAP. XLV. Albertus iam senex sibi mortem sciens imminere, quotidie visitat

I N D E X

- sepulchrum suum , legens *Vigilias*
Mortuorum pro se ; & de obitu ipsius
 ac sepultura. 303.
- CAP. XLVI. Quòd miracula fecit in vita,
 quæ tamen in particulari non sunt scri-
 pta propter negligentiam Fratrum. 305.
- CAP. XLVII. Quòd meritis Alberti Frater
 quidam à capitis dolore liberatur. 307.
- CAP. XLVIII. De miraculo quod contigit,
 antequam fuit sepultus, circa eius ve-
 nerabile corpus. 308.
- CAP. XLIX. Contra fabulantes qui di-
 cunt ipsum petiuisse à Deo *Purgato-*
rium. 310.
- CAP. L. Destructio alterius fabula con-
 fictæ loquacitate rudium. 313.
- CAP. LI. Destructio aliarum fabularum
 de Alberto confictarum. 316.
- CAP. LII. Contra alios fabulatores redar-
 gutio. 319.
- CAP. LIII. Qualiter gloriosus apparuit
 Albertus Socio suo post obitum in Ec-
 clesia. 321.
- CAP. LIV. Revelatio quòd Albertus bea-
 tus sit , & altior in beatitudine quàm
 communiter saluati. 325.
- CAP. LV. Alia revelatio diuinitus os-
 tensa, ostendens quòd confirmatus sit
 in

in gloria. 326.

CAP. LVI. *Reuelatio de gloria venerabilis Alberti & beati Thoma eius quondam discipuli.* 327.

CAP. LVII. *De interpretatione nominis eius, & quare Magnus sit cognominatus.* 330.

CAP. LVIII. *De exhumatione corporis Alberti, & qualiter repertum est non omnino consumptum.* 333.

CAP. LIX. *De miraculis qua referuntur facta Alberti meritis.* 336.

Typographus Lectori.

Implendis pagellis, B. ALBERTI ad Venerabile Sacramentum & beatissimam Virginem Orationes adiungo. Fruere Lector, & Doctrinam in ijs Pietatemque agnosce.

*Oratio venerabilis Domini Alberti
Episcopi ad venerabile Sacramentum Eucharistiæ.*

OMNIPOTENS sempiternæ Deus,
Fili Dei vnigenite, qui ex nostro,
& à nobis, & propter nos corpus &
san-

sanguinem & animam humanam & spiritum assumpsisti, & per sanctum Ieremiam Prophetam, quem in utero sanctificasti, pronuntiare dignatus es, dicens, quod animas Sacerdotum impleturus esses pinguedine, & populus tuus abundaturus bonis: imple sagina Corporis tui animas nostras, & reple in bonis desiderium nostrum; & presta, ut tui Corporis & Sanguinis admirabile Sacramentum omnem sui in nobis veritatis, virtutis, unitatis, charitatis, puritatis, pietatis, deuotionis & sanctitatis operetur effectum: ut sicut tu in Patre & Pater in te est, & tu in nobis per incorruptam tuæ susceptionis naturam; ita in te per corporis & animæ maneamus & spiritus integritatē, incorporati tibi sacrosancto Corpore tuo ad Sacramentorum tuorum salutarem communionem, & tui ipsius dulcissimam participationem; infusi sacrosancto Sanguine tuo, ad omnium intimorum nostrorum asperersionem & emundationem; redempti sacrosancta anima tua, salutis pretio, ad veram tecum & cum Patre & cum Spiritu sancto reconciliationem & redemptionem; viuificati sacrosancto

cro sancto spiritu tuo ad omnem spiri-
tualis vitæ in nobis deperditæ restaura-
tionem, & sensuum nostrorum illumi-
nationem; gratificati tibi sacrosancta
tua diuinitate ad omnem virtutis perfe-
ctionem, & de Eucharistia, quæ vas est
omnis gratiæ, de plenitudine tua gra-
tiâ pro gratia accipientes: fac nos com-
municare gratiis, quibus sancti Aposto-
li tui & discipuli de manu tua hoc Sa-
cramentum percipientes communica-
uerunt. Operare in nobis sensum & ex-
perimentum spiritualis refectionis in-
tercessione omnium eorum qui à te spi-
ritualiter refectioni sunt. Operare in no-
bis fidem, dilectionem, pietatē, deuo-
tionem sacrosanctæ vñctionis per spi-
ritualem perfectionem, quam tibi in
cœna beatissima Maria Magdalena ex-
hibuit sollicitudinem, frequentiam,
operositatem, diligentiam obsequendi
membris tuis, vt experimentalem sen-
sum spiritualis refectionis à te capite
mereamur accipere. Operare in nobis
confessum Lazari & omnium tecum
quiescentium in bonis tuis quibus dis-
posuisti regnum, sicut illud tibi Pater
disposuit, vt edant & bibant super men-
sam

fam tuam in regno tuo; quia verè beati
qui manducabunt panem, qui tu es, in
regno Dei. Operare in nobis zelum Pe-
tri ignoscentem, & omnia destruentem
quæ tuæ sunt contraria voluntati, quem
in cœna tua Petrus contra traditorem
concepit. Operare in nobis quietam
resolutionem, à mundi delectabilibus
perfectam sopitationem, felicitatem
gustum sancti Ioannis Euangelistæ,
quibus ad pectus tuum inclinati, &
haustum sapientiæ, & gustum tuæ feli-
cissimæ accipiamus dulcedinis & boni-
tatis. Operare in nobis fidem rectam,
spem firmam, charitatem perfectam, in-
tercessione omnium Apostolorum &
Discipulorum tuorum de manu tua hoc
Sacramentum suscipientium; & fac nos
semper aspernari Iudæ proditionem, &
in mentem sæpè nobis veniat illa salu-
taris influentia quam hoc Sacramen-
tum designat, qua te Beatis in cælo se-
cundùm Deitatem influens, operaris in
eis omnem suæ beatitudinis perfectio-
nem: Qui cum dulcissimo Patre & Spi-
ritu sancto viuis & regnas per omnia
sæcula sæculorum. Amen.

Salu-

*Salutatio eiusdem ad venerabile
Sacramentum.*

SALVE salus mundi, Verbum Patris,
hostia vera, viua caro, Deitas inte-
gra, verus homo. Tibi incorporati me-
reamur offerri in templo maiestatis di-
uinæ, ad Corpus tuum, quod in dextra
Patris est, tibi sociati, vt æternitatis tuæ
futuri simus participes, & beatitudinis
tuæ consortes, & sanctæ incorporatio-
nis tuæ concorporales; quia tibi est ho-
nor & gloria in sæcula sæculorū. Amen.

Collecta.

PERFICIENT in nobis, Domine, tua
Sacramenta quod continent; vt
quod nunc specie gerimus, rerum veri-
tate capiamus. Per Christum Domi-
num nostrum. Amen.

*Salutatio eiusdem Patris ad beatam
Virginem MARIAM, eiusq; Fi-
lium benedictissimum.*

SALVE in vtero virginali æternæ diui-
nitati vnita Saluatoris humanitas.
Salve carnis nostræ tegmine velata ad
nos

nos egressa summa & sempiterna Diuinitas. Salue ineffabiliter Spiritus sancti potentia virgineæ carni copulata. Salue in qua habitauit plenitudo Diuinitatis corporaliter. Salue in qua habitauit absque mensura Spiritus sancti graria. Salue à Deo Patre consecrata Filij Dei mundissima ex te humanitas. Salue super omnes choros Angelorum nunc exaltata, illibata virginitas. Gaude mundi Domina, quæ purissimæ humanitatis Christi templum esse meruisti. Gaude & lætare Virgo virginum, in cuius virginea carne beata Deitas huic almæ humanitati se voluit sociare. Iucundare cælorum Regina, in cuius sacratissimo utero hæc felix humanitas iucundissimum habitaculum inuenit. Salue & exulta summi Patriarchæ nobilissima proles, quæ hanc sacram humanitatem fouere, & tuis virgineis vberibus lactare meruisti. Salue in æternum benedicta, fecundissima virginitas, per quam fructum vitæ & gaudium salutis æternæ percipere meruimus. Amen.

F I N I S.

A P.

A P P R O B A T I O.

BEATI ALBERTI, ex Ordine Prædicatorum Theologi verè Magni, Libellum De adharendo Deo, argumento & à pietate commendabilem; atque eiusdem Auctoris Vitam, per Vener. F. Petrum de Prussia iam olim conscriptam, recensui. Quodque in illo Christianus instruat, & ad Deum sequendum excitetur; in hac verò ab obtrusionum calumniis idem Auctor vindicetur, prælo committenda iudicaui.

*Laurentius Beyerlinck Canonicus
& Archipresbyter Eccles. Cathedral. Antuerpiensis, Librorumque Censor.*

*Cum Priuilegio Serenissimorum
Belgicæ Principum.*

De VVitte.

Aol 147/301

A N T V E R P I A E,
EX OFFICINA PLANTINIANA
BALTHASARIS MORETI.

M. DC. XXI.

NA









